



Pule a le Matai Sa'o

Ripoti Faaiu (RF 18/17)

Fepuari 2017



MĀLŌ O SĀMOA

'ŌFISA O LE PALEMIA MA LE MINISITĀ MO LE KOMISI O LE TOEFUATA'IGA O TULAFONO A SĀMOA

Le Afioga i le Fofoga Fetalai **LE FONO AOAQ FAITULAFONO A SĀMOA**

E tusa ai ma le vaega 9 (2) o le *Tulafono o le Komisi o le Toefuata'iga o Tulafono 2008*, ou te tu'uina atu ma le fa'aaloalo kopi o le Līpoti o le toefuataiga o le Mataupu o le *Pule a le Matai Sa'o* e pei ona tu'uina mai i le Komisi o le Toefuata'iga o Tulafono mo se iloiloga.

Ua folasia atu i lenei līpoti fautuaga a le Komisi i le toefuataiga o le Mataupu o le *Pule a le Matai Sa'o* ina ua mǎe'a fetufaa'iga ma le atunu'u ma sǎ'ili'iliga uma e tusa ai ma le vaega 4 o le *Tulafono o le Komisi o le Toefuata'iga o Tulafono 2008*.

(Afioga Tuilaepa Lupesoliai Fatialofa Dr. Sailele Malielegaoi)

**PALEMIA MA LE MINISITĀ MO LE KOMISI O LE TOEFUATA'IGA O
TULAFONO**



MĀLŌ O SĀMOA

Afioga Tuilaepa Lupesoliai Fatialofa Dr. Sailele Malielegaoi
**PALEMIA MA LE MINISITĀ MO LE KOMISI O LE TOEFUATA'IGA O
TULAFONO**

E tusa ai ma le vaega 9 (2) o le *Tulafono o le Komisi o le Toefuata'iga o Tulafono 2008*, ou te tu'uina atu ma le fa'aaloalo kopi o le Līpoti o le toefuataiga o le Mataupu o le *Pule a le Matai Sa'o* e pei ona tu'uina mai i le Komisi o le Toefuata'iga o Tulafono mo se iloiloga.

Ua folasia atu i lenei līpoti fautuaga a le Komisi i le toefuataiga o le Mataupu o le *Pule a le Matai Sa'o* ina ua mĀe'a fetufaa'iga ma le atunu'u ma sĀ'ili'iliga uma e tusa ai ma le vaega 4 o le *Tulafono o le Komisi o le Toefuata'iga o Tulafono 2008*.

(Ulupale Fuimaono)

SUI PULE FA'ATONU

KOMISI O LE TOEFUATA'IGA O TULAFONO A SĀMOA

Laulau Faasinoala

UPU TOMUA.....	5
1. FAATOMUAGA.....	7
A. Talaaga:.....	7
E. Auivi/Faatulagaga o le Ripoti	8
2. FAIGA FA'AMATAI MA LE FA'ASAMOA	8
A. Aotelega o le Faamatai.....	8
E. <i>Pule</i> (Authority).....	9
I. Matafaioi a le <i>matai</i>	10
O. Matafaioi a le <i>Sa'o</i>	11
3. TULAFONO O IAI LE TAIMI NEI.....	12
A. Faavae o le Malo Tutoatasi o Samoa.....	12
E. Tulafono o Fanua ma Suafa 1981.....	12
4. MATAUPU AUTU:.....	15
A. Agavaa mo le tofiga o se matai ma Matai Sa'o.....	15
E. Matafaioi a le <i>Sa'o</i>	25
E. Aveesea mo le Matai Sa'o ma le Matai.....	35
D. Toatele <i>Sa'o</i> ma <i>Matai</i>	42
F. Soalaupulega.....	54
G. Alafua e le faatulafonoina.....	68
5. LISI O FAUTUAGA.....	72

UPU TOMUA

O Aperila 2015 na taulimaina ai e le Komisi o le Toefuataiga o Tulafono a Samoa se faasinoala mai le Afioga i le Alii Palemia ina ia faatalanoa le tulaga o le faaaoga faaletatau o le pule a le Matai Sa’o o se aiga. O le faasinoala o se tali atu i faitioga masani i le faaaoga faaletatau o le pule e Matai Sa’o aemaise lava i le tulaga o suafa matai ma fanua faaleaganuu lea e mafua ai ona tele feeseeseaiga i le va o tagata o le aiga ma le Sa’o o le aiga.

Talu ai ona o le maaleale o lenei galuega faapea ai ma le feagai ai ma le faigapalota lautele sa tulimataia e le atunuu i lenei taimi, o lea na faatoa amata ai le galuega ia Mati 2016. O le Pepa o Talanoaga sa lolomiina ia Aukuso ina ua mae’a le ulua’i su’esu’ega ma faatalanoaga sa sailia ai finagalo o le atunuu i mataupu talafeagai.

Sa faagasolo faatalanoaga mo le fa (4) aso i Upolu ma Savaii ia Oketopa ma Novema 2016 e faatatau i mataupu sa faatulai mai i le Pepa o Talanoaga. E sili atu ma le 700 le numera o le mamalu o le atunuu sa auai ma e faaalua i lea numera le toatele o le atunuu o lo o tulimataia lenei mataupu. O le fuafuaga e aoina mai manatu o le toatele o le atunuu, o lea na faatino ai faatalatalanoaga faalauaitele i itumalo eseese i aso sa faatulaga ai. O faasilasilaga o faatalanoaga sa auala atu i luga o televise, leitio ma isi auala o fesootaiga i luga o upega taifailagi. O faasilasilaga mo nuu ma afioga i tua sa ui atu i le Matagaluega o Tina ma Tamaita’i, Atina’e o Nuū ma Afioga ma Agafesootai, sa faapea foi ona logoina Pulenuu ma Sui Tamaita’i o nuu ma afioga o le atunuu.

Sa valaaulia foi le mamalu o le atunuu e tuuina mai a latou folasaga tusitusia i le Komisi i soo se mataupu o loo faatulai mai i le Pepa o Talanoaga . Sa taulimaina e le Komisi le tele o folasaga tusitusia mai tagata taitoatasi o loo faaalua ai le maualuga ma le taua o mataupu o loo silasila iai le iloiloga.

E tusa ai ma vaega o le faagasologa o le galuega mo tulafono toe iloilo, e tuufaatasi uma e le Komisi folasaga, vailiili lelei ma silasila toto’a iai i nei folasaga ua taulimaina mai le mamalu o le atunuu ina ia tapena iai ana fautuaga.

O lenei ripoti o loo faataoto atu ai fautuaga a le Komisi mo le toefuataiga o le tulafono e pei ona iai mataupu autu sa faatulai mai i Pepa o Talanoaga ma faatalanoaga faalauaitele ma le mamalu o le atunuu. I le tali atu i mataupu e aumai e aiga e le tasi se Sa’o, ua tuuina atu e le Komisi nisi o auala mo le toe fuataiga mo le malo, e tusa ai ma le tulaga maaleale o le mataupu ma ituaiga finagalo eseese oi latou o loo aafia.

E fia faaleo le amanaia e le Komisi o le tulaga maaleale o lenei galuega ona o mataupu uma sa tagofia e aafia ai le aganuu ma le faasamoa, ae faapitoaugafa se manatu i le taua o le Matai Sa’o i totonu o le faasamoa. O lea, sa matua faaeteete foi le Komisi ina ia mautinoa o fautuaga uma mo le toe fuataiga (tulafono ma le faatulafonoina) e silasila foi ma faataua tu ma aganuu a Samoa i le soifuaga faasamoa. I le faaiuga, ua faamauina e le Komisi e “mala eseese” lava faiga o le soifuaga o loo tatou soifua ma ola ai ma e tofu foi le aiga, nuu ma afioga ma le faatinoina o le aganuu ma le faasamoa o loo soifua ma

galulue ai. E talalasi le atunuu. E tofu le nuu ma lona faasinomaga, tofu le nuu ma ana talatuu ma agaifanua ma mau.

E faafetaia foi e le Komisi le fesoasoani a le Afioga i le Faamasino Sili ia Patu Falefatu Sapolu, o le Peresetene talu ai o Fanua ma Suafa le afioga ia Tagaloa Tuala Kerlake, le Ofisa Sili o Pulega o le Matagaluega o Faamasinoga ma Auaunaga tau le Faamasinoga le susuga a Papalii John Taimalelagi Afele ma le afaigaluega a le Vaega o Fanua ma Suafa a le Matagaluega faapea le tofa Masinalupe Tusipa Masinalupe, o le Pule Sili talu ai o le Matagaluega o Faamasinoga ae le gata i lea o sui mamalu o le atunuu na maua le avanoa e faatalanoa ai ma sasaa mai foi le tele o le latou silafia i le aganuu ma le faasamoa. E fia faailo foi le agaga faafetai o le Komisi ia i latou sa auai i faatalanoaga faalauaitele, ma e tele foi lo latou sao i le galuega a le Komisi. E faafetaia foi sui o le Komiti Faufautua mo le latou lagolago faifaipea i galuega a le Komisi. E faaleo foi le agaga faafetai o le Komisi i le matagaluega o Faamasinoga ma Auaunaga tau le Faamasinoga, le Ofisa o le Loia Sili, Matagaluega o Tina ma Tamaitai, Atinae o Nuu ma Afioga ma Agafesootai faapea le Ofisa o Leoleo mo la latou lagolago ma le fesoasoani i le faatautaia o faatalanoaga faalaua'itele ma le mamalu o le atunuu.

1. FAATOMUAGA

A. Talaaga:

1. O le faasinoala o lenei galuega o le silasila i faafitauli i le faaaoga faaletatau o le pule e Matai Sa’o aemaise lava i le tulaga o suafa matai ma fanua faaleaganuu ma aumai ai ni fautuaga i ni vaifofo e faaitiitia ai nei tulaga i le agai atu i le lumanai.
2. O le manatu lea i le faaaoga faaletatau e Matai Sa’o o a latou pule i le tulaga o faiga faaiuga o se mataupu taatele ma ua autausaga o tulai mai i totonu o le Faamasinoga o Fanua ma Suafa. O tuuaiga masani lava e agai i Matai Sa’o i le faia o faaiuga e aafia ai le tulaga lelei o le aiga e aunoa ma le faia lelei o ni feiloaiga e faatalanoa ai mataupu ma aiga potopoto poo sulii ma feoi o aiga. O nei feeseeseaiga e tulai soo mai ona o le tulaga i le faaaogaina, lisiina atu o fanua faaleaganuu, o le filiina o suafa matai, poo le faasoaina o tupe i lalo o le pule a le Matai Sa’o. E iai foi nisi o faitioga e faapea o le Sa’o e le amiotonu i le faia o faaiuga fai ma le tausiga o le aiga i le tulaga o le le tutusa ona fai o tagata o le aiga, e faapito le silasila i le isi itu o le aiga ma le faaeeina o suafa matai ina ia le mafai ai ona agavaa le isi vaega o le aiga i suafa matai ona e le o faia se tautua i le aiga. O nisi o atugaluga sa faailo mai o le tulaga le lelei lea e faatino e le tele o Matai Sa’o e ala i le faaee atu o suafa matai i totonu o aiga ma le tulaga lea o le tete’e o le Matai Sa’o o loo aumau i atunuu i fafo i ni faaiuga e faia e matai poo le Matai Sa’o o loo alaala i Samoa nei.
3. Mo le faamoemoe o lenei ripoti, ua tuu eseese e le Komisi le tulaga o le *matai* ma le *Matai Sa’o* ina ia manino le eseese o matafaioi faatino faaopoopo, pule, faiga masani mo tofiga poo le toe faau ese o suafa mai le Matai Sa’o ma le matai. Pe a talanoa le Komisi i le tulaga o le ‘*matai*’ i lona faalaua’itelega, e faasino i suafa matai ua mae’a resitala ma teuina i lalo o le Tulafono o Fanua ma Suafa 1981, ae le o mafaufau e ta aofa’i ai ma suafa matai lea ua ave iai faaaloaloga a aiga poo Matai Sa’o.
4. Ma lenei, e tele le numera o folasaga na taulimaina e le Komisi ina ia suia le upu “*Sa’o*”, “*Matai Sa’o*” poo le “*Pule*”. O le malamalamaaga o le toatele o le atunuu sa auai i faatalanoaga e latou te taofi ua na o le Sa’o e iai le pule toatasi e pule ai i tagata toe pule foi i eleele o le aiga. O lea, e tatau ai i le Sa’o ona faia faaiuga sa’o e pei ona faalupe ai o le ‘*Sa’o*’. Peitai, e le o le faauigaga sa’o lea o le tiute o le Sa’o i le *faasamoa*. O manatu faaalua poo le tuualalo a le atunuu o le faaupuga talafegai e tatau ona faalupe ai le matafaioi poo le nafa tausiga a le *Matai Sa’o* o ia o le Tausimea a le aiga, ma o lana pule foi e faia pe faalagolago i le maliega autasi a sulii ma feoi o le aiga poo le auaiga.
5. O le ogatotonu o finagalo e pei ona tuuina mai e aofia ai le Taitai o le Aiga (leader of the family); Tausi Measina (custodian of the family estate/assets); Matai Tausi Aiga (Family caretaker); Leoleomea a le Aiga (provide of protection); Faatama (father-like figure); Sui o le Aiga (representative of the family). O i e iloa ai le eseese o le

faauigaga o le Sa’o i totonu o aiga e pei foi ona molimauina i le suifefiloi o folasaga na tuuina mai i le Komisi ma faamamafa ai le tulaga faigata ma le maaleale o lenei galuega.

6. E taua le silafia ma faamauina, o lenei ripoti o loo matua ave ai le faataua i le matafaioi a le aiga ma le *Matai Sa’o* i le faia o faaiuga lelei e maua ai le maopoopoga ma le filemu o aiga ma fofo ai ni feeseeseaiga e ala i tu ma agaifanua i totonu o aiga faapea ai le aganuu *Faasamoa*. O fautuaga o loo aofia ai auala faale-tulafono ma le faatulafonoina mo lenei mataupu. O le tele lava o auala faaletulafono ua fautuaina o loo o gatasi lava foi ma le tele o finagalo oi latou sa faatalanoaina, lea e mafuli le lagolago i se tulafono e atagia ai tiute, matafaioi ma uiga moomia mai se *Matai Sa’o* e pei ona taatele i totonu o aiga Samoa, e ui i le eseese o le faauigaina ma le faiga o loo fai ai i totonu o aiga.

E. Auivi/Faatulagaga o le Ripoti

7. Ua faatulagaina le ripoti i se faatulagaga e agai sa’o ai le silasila i mataupu autu e pei ona faailoa e le Komisi ma faatulai mai i faatalanoaga faalauaitete ma le atunuu sa faatino. Ua vaevaeina le ripoti i ni vaega se fa (4):
 - Vaega 1 o loo talanoa i le *Faiga o le Faamatai* ma le *fa’asamoa*, faatasi ai ma le aotelega puupuu o le pule e pei ona ogatotonu i faiga faamatai. O loo faatalanoa ai foi tiute o le matai ma Matai Sa’o.
 - Vaega 2 o loo talanoa i faiga faamatai ma le faasamoa
 - Vaega 3 o loo talanoa i tulafono o loo iai i le taimi nei
 - Vaega 4 o loo talanoa i mataupu autu sa faailoa i folasaga ma faatalanoaga faalauaitete faapea ai ma finagalo o le Komisi ma fautuaga. O mataupu o loo aofia ai:
 - Agavaa e tofia ai se Matai ma Matai Sa’o
 - Matafaioi a le Sa’o, Matai ma Suli
 - Aveesea o le Sa’o
 - Toatele o Sa’o ma matai
 - Fofo mo Feeseeseaiga
 - Auala e le faatulafonoinaO le a faataatia foi folasaga i lalo o mataupu taitasi
 - Vaega 5 ua aumai ai le lisi o fautuaga a le Komisi mo le toe iloiloaina.


2. FAIGA FA’AMATAI MA LE FA’ASAMOA

A. Aotelega o le Faamatai

1. O le *faasamoa* e faigofie ona faamatalaina o le olaga Faasamoa. O le *fa’asamoa* ua uma ona mamana vaega uma mo le olaga i aso uma o le Samoa: tamaoiga, upufai o malo/polokiki, siomiaga i totonu o nuu ma afioaga ma le aganuu. E faamatala ai tu ma agaifanua faapea ma le sootaga o le isi Samoa i le isi Samoa faatasi ai ma i latou o

loo umia tulaga o le pule. O totonu o le fatu poo le ogatotonugalemu o le *fa'asamoa* o loo iai le “*faamatai*”, lea e fausia ai le faavaa o agatausili e soifua ma ola ai tagata Samoa i totonu o aiga, nuu ma ekalesia.

2. *Samoa ua uma ona tofi* – o le mau a Samoa, o Samoa ua uma ona tofi e aofia ai aiga, afioaga ma le atunuu. O lea faatulagaga o loo uumau e le faiga faamatai e afua mai i suafa aga'i i tupuaga ma itutino e soo toto. O lenei faiga na faavae mai i tu ma agaifanua i totonu o nuu ma afioga ma faamau ai i eleele ma suafa matai.
3. *O suafa Matai* o Measina tuufaasolo ia i latou e tau i le suafa poo suli. O le *matai* poo le *Sa'o* e filifilia e le aiga potopoto e ala i se maliega autasi e na te tauaveina ai le suafa o le aiga i totonu o le nuu poo le aiga lava latou, ma e “tatau ona matua tinou ma loto atoa iai i le tausiga o le aiga i le filemu e le gata i totonu o le lotoifale o le aiga ae o le va ma le nuu.
4. Mo le faafaigofie ona malamalama, o le ata ua faailoa atu i lalo o loo faatusa ai le auivi o le faamatai i le auivi o se faalapotopotoga a le Malo lea e faatusatusa o le *Sa'o* o le Pule Sili, o le matai o le komiti faatonu ma le pulega, ae o sui o le aiga o le au fai sea i vasega eseese e fua i le sootaga i le aiga ma le mafuaaga ma le tulaga o le tagata i totonu o le aiga.



E. *Pule (Authority)*

5. O le autu poo le ogatotonu o le faiga faamatai o le pule lea e limataitaina ai le faaaogaina, tufatufaina ma le puipuia o eleele faaleaganuu ma punaoa i totonu o afioaga. O lea pule e le umia toatasi e se matai poo se vaega o matai ae e mafai foi ona tuuina atu i nisi o itu o le aiga.

6. I totonu o faiganuu, e fa (4) vaega ua vaevae iai le pule: *pule faavae* (constitutive authority), *pule faaaoga* (exploitative authority), *pule faasoa* (distributive authority) ma le *pule faamalumalu* (protective authority).
7. O le *Pule Faavae* (Constitutive Authority) lea e finau ai faapea o le pule lea e tele lona faaaogaina lea e faaaoga e suli o matai lea foi e faasino iai ma measina a nuu ma i latou o loo nonofo ai. O le pule lea, lea e faatino ai amioga e ono aafia ai pe ua aafia ai foi le faavae o aiga potopoto. E fesootai ia faiga i le tele o mataupu e pei o le tofia o ni suli i suafa matai faavae o aiga ma faatinoga e ono aveesea ai se vaega o measina ona o le pule ua soonafai ma taofiofi. O se faataitaiga, o le tuuese atu o le pule o le suafa matai aemaise lava o suafa matai faavae i se isi vaega o le aiga poo le tuuese atu foi o le pule o eleele o le aiga.
8. O le tuualalo, o gaioga e aafia ai meatotino a aiga e tatau lava ona tagofia e le aiga ona e aafia ai lona faavae ma o ia gaioga e faatoa faamaonia ma aloaia pe a malilie pe faamaonia foi e le pule faale-faavae a le aiga.
9. O le isi itu, o le pule faaleaganuu i le tulaga lea o le *Pule Faaaoga* (Exploitative Authority) e ave ai i tagata taitoatasi le aia tatau e vaavaai ma faaaoga ai eleele o le aiga lea e latou te nofoia ma tuuina atu ia latou e latou te faaaogaina. Peitai, e ui lava o eleele o aiga, e le faapea e umia ma faaaoga e se vasega o augatupulaga o se tagata se toatasi poo ni tagata, o le umiaina lava o eleele e tumau pea i le aiga potopoto i lalo o lana pule faale-faavae. O lea mau e aumai mai tulaga faavae o eleele faaleaganuu lea e faapea o eleele uma o aiga e umia e le aiga potopoto seia oo i le faavavau ae le umia e ni tagata taitoatasi.
10. E pei ona saunoa le afitoga i le Faamasino Sili ia Patu Tiavaasue Falefatu Maka Sapolu e faapea:

O eleele faale-aganuu e le o ni eleele e umia e ni tagata taitoatasi. O eleele e i lalo o le pule faamalumalu a Alii ma Faipule ae matau ile pule a le matai e faataga ai le faaaogaina o eleele o aiga. E leai ni eleele o tagata taitoatasi, o eleele na tuuina atu e le nuu i le matai ma e pau le mea o le nofoia ma faaaoga e le tagata ae na te le umiaina.

I. Matafaioi a le Matai

11. O *matai* e nafa ma le faatumauina o le nofo lelei ma le va-fealoaloai, aganuu ma le tausiga o le nuu. E tele le taua o le matafaioi a le matai poo le sa’o o ia lea e fai ma sui o le aiga potopoto oi latou ia na faaeea le suafa o le aiga i le matai. O lea matafaioi e o gatasi ma le alagaupu faasamoa “*O le ala i le pule o le tautua*”.

12. E lua vaega ua faatulaga ai matai, o le *ali'i* ma le *tulafale*. O le *ali'i* o le suafa ali'i sili lea e fesootai i le tupuaga o Samoa faapea e mamalu ma paia ona latou te tauavea le mana o tatou atua. O *tulafale* poo tootoo lauga e tauavea matafaioi faapitoa lea e eseese ona o nisi e tautua i alii poo le fofoga o le aiga ma isi tulaga faapena. O le matafaioi a le *ali'i* o le faia o faaiuga ma amanaia foi se fautuaga a le tulafale lea e fai ma fofoga o ana poloaiga.

O. Matafaioi a le *Sa'o*

13. O le faatumutumuga o le faasologa o matai o le *Sa'o*. E iai isi vaimatai o le aiga potopoto, peitai o le faauluuluga poo suafa o aiga e umia e le *Matai Sa'o* poo le *Matai Sili* o le aiga.

14. O le *Sa'o* o loo iai le pule atoa e faafoefoe ai le aiga faatasi ma le tele o ona tiute tauave i lalo o tulafono faaleaganuu e aofia ai le faia o tulafono, o le puleaina ma le faia o le amiotonu i luga o meatotino a le aiga ma tagata.

15. Ua tuuina foi i le *Sa'o* o le aiga le pule ma le malosiaga e faasoa ai eleele ma tufatufa ai le faamanuiaga mo le aiga – e taua o le *Pule Faasoa* (Distributive Authority). Ona o lea pule faasoa ua iai i le *Sa'o* le malosiaga e:

- Faasoa ai eleele i tagata o lona auaiaga e silafia ua talafeagai ona latou faaogaina ia eleele,
- Tofi suli e faasuafa i vaimatai fua i le talaaga o le aiga poo le pule ua tuuina i le *Sa'o* ma ua faamaonia e itutino o le aiga mo le tausiga lelei o ia itutino.

16. O le atoaga o matafaioi a le *Sa'o* o le siitia lea o le soifua lelei o lona auaiaga e le gata i le olaga o aso uma ae o le tamaoaiga. E ao foi i le *Sa'o* ona tausia le filemu ma le nofo fealofani i totonu o le aiga, tausi ma vaai lelei meatotino a le aiga, fai faaiuga talafeagai mo le manuia o le aiga ma mafai ona tali atu i le aiga pe a fesiligia. O le taitaiga a le *Sa'o* ma le puipuiga o meatotino a le aiga ma ana measina e faaosofia ai le faaaloaloga e le auaiaga.

17. E tatau i le *Sa'o* ona talanoa ma saili se fautuaga mai lona auaiaga aemaise lava o matai, i mataupu taua e aafia ai le ola saoloto ma le nofo lelei o le aiga. E tatau foi ona saili se manatu o suli i le faiga o faaiuga ina ia maua ai le nofo fealofani o le aiga. O matai ma le *Sa'o* e latou te faatuina se itutino faafoe o le aiga e faatalanoa, fau ma faatino ni galuega lelei mo le ola fiafia ma le manuia o le aiga.

18. O le *Sa'o* ma *matai* o le aiga e latou te puipuia tagata o le aiga ma meatotino mai le faaleagaina ma le ave faamalosiaga e isi tagata. O lea matafaioi e taua o le *Pule Faamalumu* (Protective Authority).

19. O le malosiaga o le *Matai Sa'o* e iai lona tapulaa, peitai, o le filifilia o se isi *Matai Sa'o* e tauavea le suafa, o le faiga masani o suli e faia le faaiuga.

20. E iai *Sa'o* e faasino lava na o aiga ae iai foi *Sa'o* e faasino tonu i aiga ma nuu.

3. TULAFONO O IAI LE TAIMI NEI

A. Faavae o le Malo Tutoatasi o Samoa

Vaega e faatatau i suafa matai ma eleele faale-aganuu

1. O loo iai i le Faavae o Samoa aiaiga e faafoefoe ai suafa matai ma eleele faaleaganuu. O nei aiaiga o loo faataoto mai ai tulaga faavae e faafoe ai suafa matai ma eleele faaleaganuu lea e faataua tele ai le faasamoa. O se faataitaiga, e tatau ona umia suafa matai e tusa ai o tu ma aganuu a Samoa faapea ai ma le tulafono e faatatau i le aganuu ma le faaaogaina o eleele.
2. I eleele faaleaganuu lava latou, e tatau lava ona umia e tusa ai ma aganuu a Samoa ma lona faaaogaina ma e le mafai ona faaliliueseina pe foaia. O le faaliliuese poo le foaia o eleele faaleaganuu e matua solitulafono i lalo o le Faavae. Peitai, e iai lava mafuaaga talafeagai e mafai ai e se Tulafono a le Palemene ona faataga le lisiina ma le faaaogaina o eleele faaleaganuu mo faamoemoe lautele faapea ai ma atinae mo le manuia lautele o le atunuu.

E. Tulafono o Fanua ma Suafa 1981

Faamoemoe o le Tulafono ma le pule faaletulafono a le Faamasinoga

3. O le Tulafono o Fanua ma Suafa 1981 (le tulafono) e feagai tonu lava ma mataupu e faatatau i eleele faaleaganuu, suafa matai ma le Faamasinoga o Fanua ma Suafa (le Faamasinoga).
4. O lea Faamasinoga e feagai ma nao mataupu lava e aofia ai igoa ma suafa Samoa faapea ai ma tagi ma feeseeseaiga e faatatau i eleele faaleaganuu. I le tulaga o igoa ma suafa, e iai i le Faamasinoga le malosiaga e faia ai poloaiga poo tautinoga talafeagai e faatumauina ai pe faamanino ai ia igoa ma suafa, ma faamanino ma faatumauina ai aia tatau ma matafaioi e afua mai i ia igoa ma suafa. E feagai foi le Faamasinoga ma mataupu uma e faatatau i tagi ma feeseeseaiga i eleele faaleaganuu ma aia tatau ai latou e au i meatotino poo eleele e tusa ai ma le aganuu ma lona faaaogaina.

Faauigaina o le 'suafa Matai'

5. O le faauigaina o le 'Matai' i le Tulafono o loo iai nei, o se tagata ua uma ona resitala lona matai i lalo o le Tulafono.

Tulafono o loo faaaogaina e le faamasinoga pe a faia ana faaiuga

6. E faaaoga e le Faamasinoga le aganuu ma lona faaaogaina, tulafono e faatatau i le aganuu ma lona faaaogaina ma soo se tulafono lava e manatu le Faamasinoga e talafeagai ona faaaoga i soo se mataupu e tuuina atu i luma o le faamasinoga. O le isi vaega, e matua moomia lava e le Faamasinoga ona iloilo mataupu e tusa ai ma le amiotonu ma le sa’o i le va o itu faa-faamasinoga. E ese mai i ia aiaiga, o loo aumai e le Tulafono nai taiala e limataitaina ai le Faamasinoga i ana iloiloga i le tulaga sa’o ma le amiotonu.
7. I le faatalanoaga ma le Peresetene talu ai o le Faamasinoga o Fanua ma Suafa, sa ia faailoa i le Komisi, o le fuafuaina poo le a le sa’o ma le amiotonu, e faaaoga e le Faamasinoga i ana galuega le tofamamao ma le faautautaga loloto. I lea faiga, e amanaia foi e le Faamasinoga faauigaga eseese o le faasamoa e aiga, faalapotopotoga, nuu ma afioaga. O ni faataitaiga na tuuina mai, e le tutusa uma tu ma agaifanua a nuu ma afioaga e fofofogaina i totonu o aiga, ma o matafaioi foi a *Suli* e iai lona eseesea mai lea afioaga i lea afioaga.

Galuega ma Taiala a le Faamasinoga

8. O loo aumaia i le Tulafono o le Ao o le Malo e iai le malosiaga (i luga o le fautuaga a le Kapeneta) e faia ai tulafono faavae e faatonutonu ai galuega ma taiala a le Faamasinoga. E aofia ai tulafono faavae mo le:
 - Faafoeina/vaavaaia o tualumaga faa-faamasinoga;
 - Tolopoina o tualumaga o faamasinoga;
 - Soalaupule ma faatalanoaga ao lumanai ai le fofofogaina ose mataupu;
 - Puipuia pe faamuta ni mataupu e manatu le faamasinoga e leai se taua pe tulai mai ai se vevesi;
 - Aotelega o le faaleaogaina o faamasinoga;
 - Pe faapefea ona fai se talosaga i le faamasinoga;
 - Auala e faagasolo ai se teuteuga o se feeseeseaiga ma taiala e mulimulitaia pe a mae’a faatino se teuteuga o se feeseeseaiga;
 - Poloaiga o maliega ua autasi iai itu faa-faamasinoga ise maliega e faatatau i le mataupu faa-faamasinoga sa feeseeseai ai; ma
 - Nisi mataupu e manatu le Faamasinoga e talafeagai.
9. O loo faapea mai le Tulafono afai e leai ni tulafono faavae e faatonutonu ai faiga ma taiala a le Faamasinoga, o le a faaaoga loa tulafono faavae a le Faamasinoga Maua luga sei vagana ua le tutusa pe ogatasi poo le le talafeagai ma le Tulafono. O lea, i mataupu o faiga poo taiala e le o taua, poo le faamalosi o le mulimulitai i nisi o tulafono faavae o faiga poo taiala e ono le tutusa pe le sa’o, o le a tu loa le Faamasinoga i lona tulaga e faaaoga ai le aganuu a Samoa ma lona faaaogaina, o le amiotonu, talafeagai ma faigofie ma vave. E oo mai ile taimi nei, e leai ni tulafono faavae i lalo o le Tulafono e faatulafonoina ai le faatonutonuina o faiga ma taiala a le Faamasinoga.

10. O le mataupu lea faatasi ai ma le tele o isi mataupu ae le gata i lea o le faatinoga o galuega a faamasino o le Faamasinoga, lea sa suesueina e le Komiti Suesue Faapitoa a le Palemene. Ua fautuaina e le Komisi Suesue e tatau ona faatulafono Tulafono Faavae ma Taiala a le Faamasinoga ina ia mautinoa le vave, lelei sailiili ma lelei le faatinoga o galuega a le Faamasinoga. Ua fautuaina foi le faia o polokalame poo aoaoga faaauau e saga tapu'e, faaleleia ma siitia ai le silafia o faamasino o le Faamasinoga ina ia mautinoa e matua lelei ma maualuga lo latou silafia ma le tomai i tulafono ma tulafono faavae e faaoga i faaiuga a le faamasinoga.

Tuufaatasiga/Faaleleiga

11. O lo'o aumaia i le Tulafono ni aiaiga lautele mo faaleleiga e faafoe ai feeseeseaiga e faatatau i suafa matai ma eleele faaleaganuu. Mo se faataitaiga, o loo aiaia itu faamasino e feiloai lelei ma talanoa ina ia mafai ona fofu alamea feeseeseaiga i tulaga faasamoa ma ia tuuina atu se talosaga tusitusia ma ni auala e faia ai se teuteuga.

12. E mafai e le Resitara ona faatino le faaleleiga faasamoa i soo se vaega lava o le faamasinoga poo le lei faauluina o tagi, ma e mafai ai foi ona faatuai le faatulagaina o le matuapu mo le fofogaina sei vagana ua malilie iai itu faa-faamasinoga poo le faatino o le faaleleiga e tusa ai ma tu ma aganuu a Samoa.

13. E le o aumaia foi i le tulafono e mafai e le Resitara ona fai le tuualalo ma tuuina atu fautuaga ma le fesoasoani i itu faa-faamasinoga o feeseeseai, ona o le manatu e mafai ona fofu alamea se feeseeseaiga e ui e lei faauluina se tagi.

14. O loo manino i le tulafono afai ae le uia e itu faa-faamasinoga le faaleleiga faasamoa o le a le talia e le Faamasinoga le fofogaina o soo se mataupu e oo atu i luma o le Faamasinoga. E mafai e le Faamasinoga ona tuuina atu le mataupu e soalaupule (i le iai poo le leai o se maliaga a itu faa-faamasinoga) lea e tatau ona maea i totonu o le 45 aso, poo le fautuaina o itu faa-faamasinoga e faaoga le faiga mo le fofoina o feeseeseaiga.

Agavaa i le Matai poo le Aveesea o le Suafa Matai

15. O loo faataoto mai foi i le Tulafono aiaiga e faatatau i le agavaa o le tagata i le suafa matai. O loo aiaia e faapea e le agavaa se tagata e umia le suafa matai sei vagana e le i lalo ifo o le 25 tausaga le matua o le soifua. O le isi vaega, e le agavaa foi se tagata e avea ma matai pe afai e lei saunia ma tapena e tauave tuite o le suafa matai e aofia ai ma le tautuaina lelei o lona aiga, nuu ma le atunuu e tusa ai ma tu ma aganuu a Samoa.

16. A iai se tagi e faaulu e se Sa’o poo se suli e fesiligia ai le auala na faatino ai e le Sa’o lana pule, e mafai foi e le Faamasinoga ona aveesea le suafa matai e fua i luga o mafuaaga ua tuuina mai. O ia mafuaaga e aofia ai pe sa faatino e le matai se amioga ua tauvalea ai le aiga, nuu ma le atunuu poo le le mafai ona faatino lelei o ona tiute, poo le faamaonia o se soligatulafono matuia ma ogaoga ma o le faasalaga e falepuipui mo le olaga atoa.

Faaaliga o le Fuafuaga e Tofia se Matai

17. A fuafua e tofi se matai, e iai aiaiga moomia o loo aiaia i le Tulafono. A manatu se Samoa e tofi se matai tusa pe le o faatulafonoina, e mafai ona faailoa i le Resitara lea manatu. Afai ae taulimaina e le Resitara lea faaaliga, ma faamalieina i latou o lea manatu e sa’o ma faamaoni, o lea e tatau ai loa ona faasalalau le faaaliga o finagalo e fia tofi se matai ini lomiga se lua (2) a le Nusipepa o le Savali, ma e tatau ona tuuina atu le faaaliga i soo se tasi o aafia i lea tofiga e faauluina ai se talosaga tete’e.

4. MATAUPU AUTU:

A. Agavaa mo le tofiga o se matai ma Matai Sa’o

1. O se tasi o mataupu autu o loo laualuga i le uluai faatalanoaga ma faaleo mai foi i Pepa o Talanoaga a le Komisi, o le mataupu e faatatau i le filifilia ma le tofia o Matai Sa’o ma poo a foi agavaa moomia e tatau ona ausia e le Matai Sa’o e faamaonia ai mo le tofiga (aofia ai pe le tatau ona faatulafonoina agavaa).
2. E pei ona taua i luga, o loo faataoto mai i le Tulafono Autu o Fanua ma Suafa 1981, agavaa e tatau ona ausia mo se matai, e tatau i lea tagata ona le i lalo ifo o le 25 tausaga ma ua lava tapena e tauave tiute o le matai. E aofia ai le tautuaina o le aiga, nuu ma le atunuu e tusa ai o tu ma aganuu mamalu a Samoa. E le o tatala tele atu i tua le Tulafono e aumai sao ni agavaa moomia poo ni agavaa faaopoopo mo le Matai Sa’o.
3. O loo aofia foi i totonu o le Tulafono nisi o aiaiga o faasilasilaga e faatatau i le tofiaina o matai, e ui e le o faatulafonoina le logo o le Resitara i lea tofiga. O lea matafaioi o loo tuuina atu i le tagata ua manatu e tofi le matai ma e tatala foi poo ai tonu lea tagata. O le isi itu, o aiaiga o faasilasilaga o loo iai i le taimi nei, o loo tatala na o le Savali ae le o aofia ai isi auala o faasalalaga e iai leitio ma televise.

Tofiga o le Sa’o

4. I le Fonotaga Lona 7 a le Measina lea sa faatautaia i le Iunivesite Aoao o Samoa i le Papaigalagala, sa fofogaina ai e faapea o aso ua mavae i le filifilia o le Matai Sa’o sa faatino e tusa ai o le mavaega a le Sa’o o loo tausia le aiga. Peitai, i mataupu ua tuumalo se Sa’o ae lei faia tofiga o le a tuu atu loa i suli e faia le faaiuga.

5. O aso nei, o le tofia ose sui e avea ma Sa’o o se aiga e moomia le maliega atoa a le auaiga oi latou e iai le aia i le Matai Sa’o. O le mea masani lava o le Sa’o e filifili mai e sulii o le Matai Sa’o. O le faaleaganuu e na oi latou e tupuga mai le uluai Sa’o o le aiga e mafai ona auai i le tofiaina o le Matai Sa’o ma faatalanoa sui talafeagai.
6. O isi sui o le aiga e le tupuga mai le uluai Sa’o e masani lava oi latou ia e faatoa faataga e faalogologo i talanoaga a le aiga e faatatau i le tofia o le Matai Sa’o. E aofia ai i latou e tau i le aiga e ala i sootaga o le suafa matai ma maupaolo. Ao fagasolo ia talanoaga, e masani lava ona avanoa pe saoloto le faaalii o finagalo o matai o le aiga ma fetufaai ai le tofa ma le moe ina ia maua se tasi.
7. O le faiga taatele/masani o loo filifili ai Sa’o e aofia ai:
 - E logo e le fofoga o le aiga matai o le aiga e potopoto e talanoa se maliega e fili ai se suafa Matai Sa’o o avanoa.
 - E logo foi e le fofoga o le aiga le auaiga atoa ma isi uma tagata o le aiga e le o ni matai ina ia potopoto faatasi ise feiloaiga lea e valaaulia ai ma le au maupaolo. E fesilafai ma fefaasoai i lea talanoaga e faatatau i mataupu autu ua faatulaga e talanoaina.
 - O le a faailoa foi e le fofoga o le aiga, o le a omai lava le tino latou ma le latou sui filifilia mo le suafa ile isi faatasiga a le aiga o lumanai.
 - I le aso o le a fai ai le tofiga, e tatala le feiloaiga i le ava faaleaganuu ao lei faia le upega lauga e faailoa mai ai sui filifilia a lea tino ma lea tino o le aiga. O le a matua finau foi le tino ia ma aumai mafuaaga e tatau ai ona filifilia le latou sui e tauavea le suafa. E le faatagaina taulelea ma fafine e tautatala i le feiloaiga ae faataga ona auai oi latou o sulii o le aiga.
8. O le faiga masani, o le Matai Sa’o e faaee atu i le tagata e:
 - Autasi iai le aiga atoa ma faamaonia le iai o agavaa talafeagi, agatausili e tatau ona iai ise Matai Sa’o ;
 - Iai le silafia e faatumau ai le filemu ma le nofo fealofani o le aiga, mo se faataitaiga, toe fausia ma tuufaatasi se aiga ua malepe ma fefulituaai ma toe faaleleia sootaga o tagata o le aiga sa faaletonu.
 - Tau toto, ivi ma aano i le aiga lea e umia le suafa ma ua iai le aia tatau ona o lona tupuga i le itu o lona tina poo le tama;
 - Iai le atamai ma le silafia i le aganuu ma le faasamoa; ma
 - Iai le silafia i le talaaga/gafa o le aiga; ma
 - Sa tautua matavela i le aiga e ala i le tautuaina o isi sa umia le suafa faapea ai ma le nuu.
9. I le tulaga o le tautua i le aiga, nuu ma le atunuu, o le tasi lea o faailoga mautu e fuafua iai le filifilia o se Matai Sa’o fou, aua o ia lea o le a tauavea le suafa ma le faasinomaga o le aiga. O ia faailoga mautu e aofia ai le soifua aoaoina lelei ma le

tamaoaiga ua avea ma itu ua faatupulaia le aafia ai o le filiina o suafa i nei aso. O le tautua i le aiga e aofia ai:

- Tautua tuavae i le aiga, faamaoni ma galue malosi (*Tautua Tuavae*);
- Silafia le gafa o le aiga, tapu a le aiga ma le talaaga/gafa, lava le silafia i le aganuu (*Tautua Upu*);
- Agamalu, to'a ma loto-toa, e le fefe e tu ma puipui le aiga i soo se mea (*Tautua Toto*); ma
- Ia iai i taimi uma e tautua le Sa'o (*Tautua Mamao*).¹

Taiala mo Resitala

10. I lalo o le Tulafono, a mae'a loa ona faasalalau le tofiga o le matai mo le 3 masina e leai ni faalavelave, ona resitala loa lea o le suafa pe a mae'a totogi le tau e pei ona aiaia. O le taimi nei, e le o iai nisi agavaa moomia e tatau ona faamalieina poo se faamaoniga moomia e le Resitala ae lei resitalaina le suafa.

Amerika Samoa

11. E tai tutusa lava aganuu a Samoa ma Amerika Samoa ona e fetufaai a laua talaaga ma luitau.

Agavaa

12. E pei lava o Samoa, o aiaiga o tulafono a Amerika Samoa e tatau i le tagata ona faamalieina a'o lei aga'i atu e avea ma matai. Soo se matai e faaee atu i se tagata e le tusa ai ma le tulafono o le a le aloaia lava i soo se auala.

13. *E tuuina atu le suafa Matai* i le tagata e ala i le maliega a le aiga ma le faamaoniga a le Faamasinoga. O aiga Samoa oi latou lava e nafa ma iai le faatagana e filifili ai lava ei latou se tagata e tatau ona umia le suafa matai ina ua faamalieina uma aiaiga faaletulafono.

14. O loo faamatalaina i le Tulafono a Amerika Samoa o le a agavaa se tagata e faasuafaina i se suafa matai pe afai o lea tagata e:

- i. E iai le toto Samoa/ totolua;
- ii. Fanau i totonu o eleele o Amerika;
- iii. Ausia le 18 tausaga o le soifua;
- iv. Ua filifilia e lona aiga mo le suafa;
- v. Nonofo ma se Samoa ao ia foi o le Samoa.

15. O loo aiaia foi e le agavaa se tagata e tagi pe tetee i le faaeeina o se suafa matai sei vagana o alala ma nofo i totonu o Amerika Samoa mo le tasi (1) le tausaga faakalena mai le aso o le tagi poo le tetee. Peitai o tagata Amerika Samoa e toesea mai ma le teritori mo se faamoemoe taua e pei o aoga, tautuaina o le vaegaau a le Malo Tele,

¹ Tuia Logoiai Pu'a Letoa, 'E Sui Faiga Ae Tumau Fa'avae' (Paper presented at the 7th International Measina Conference, National University of Samoa, 15-17 November 2016).

aoaoga faafomai ma sailiga malosi, malaga faavaitaimi ma galuega faamisionare, o le a tumau lava le agavaa e tagi pe tetee i le faia o se suafa matai ona o loo nonofo lava i Amerika Samoa.

Taiala o Tofiga

16. O le tagata e tagi faasaga i le faaee atu o le suafa matai e tatau na faaulu lana tagi tusitusia ma e tatau ona iai faatasi ma mea nei:

- Tusipasi mai Alii ma Faipule o le nuu e iai le suafa matai e tusia ai o le suafa o le suafa matai faaleaganuu o tagata Samoa;
- Tagi e saina e tagata e 25 e tau toto i le suafa o loo finau ai e tusia ai sa faia le feiloaiga a le aiga e filifili ai se isi e agavaa mo le suafa e tusa ai ma tu ma aganuu a Samoa.

17. E tuuina atu e le Resitala le faasilasilaga mo le 60 aso e faaulu ai se talosaga tetee a se tasi e fia faia. O soo se tala tetee e tatau ona lagolagoina e ni tagata o le aiga poo suli e le i lalo ifo ole 25 le aofai e ala ise talosaga ua maea sainia. Afai ae leai se talosaga tetee e faauluina i totonu o le 60 aso mai le aso o le faasilasilaga, ua tatau loa i le Resitala ona resitala le suafa i le ua faaee atu iai.

Finauina o Tofiga

18. O le a fofogaina e le Faamasinoga maualuga ma iloilo soo se tagi ma e aiaia le tuuina atu o se faaiuga tusitusia e fua i luga o le faatatau e pei ona faataoto mai i le tulafono i le lisi o vaega faamamafaina:

- i. O le suli moni ma talafeagai i le suafa;
- ii. O le finagalo e mafuli iai loto o tino o le aiga o le faasamoa lea i lena aiga;
- iii. O le malosiaga o le tagata lilo ma agatausaafia oi latou o le a faia iai le filifiliga mo le suafa ma lo latou silaifa o le aganuu a Samoa; ma
- iv. le taua o le tagata o le a faasuafa i le aiga, nuu ma le atunuu.

Folasaga

19. I Pepa o Talanoaga , sa sailia e le Komisi folasaga i vaega nei:

- *O ai tonu e auai i le filiina ma le tofiina o le Matai Sa'o? O le a se finagalo o le atunuu pe a faatulafono ni agavaa e fili ai se Matai Sa'o?*
- *O a ni agavaa autu e tatau i le Matai Sa'o ona ausia e agavaa ai e faamaonia mo le tulaga o le Matai Sa'o i totonu o le aiga? O le a se finagalo pe a faatulafono ni agavaa?*

Auai i le Filifilia o le Sa'o

20. O le tele o folasaga sa taulimaina e le Komisi mai Upolu o loo taua ai e na o suli moni e agavaa e auai i le filifilia ma le tofiga o se Matai Sa'o. O le finagalo o Alii ma Faipule

o Savaii o loo faapea mai e tatau lava ona faaaauau le filifiliina e suli o latou Matai Sa'o ae le o le Faamasinoga.

21. O loo latou folasia e faapea e tatau i le tulafono ona faataga sui o aiga e filifili se isi suli i le Matai Sa'o pe afai ua le agavaa le Matai Sa'o o iai e tauave ona tiute ma matafaioi e tatau ona ia faatinoina.
22. O se numera o le atunuu na faia folasaga o loo finagalo e faaaauau le faatauaina o le faatulafono o taiala e faatulaga lelei ai taiala faavae e amanaia ai suli pe a filifili le Matai Sa'o.
23. Ua talosagaina e Alii ma Faipule o Upolu le faatulafonoina o le faia o se maliega tusitusia a le aiga e filifili ai le Matai Sa'o e puipuia pe faaitiitia ai feeseeseaiga i le lumanai. E tatau foi ona faia se maliega a suli pe a filifilia le Matai Sa'o.
24. Sa faatalanoa foi e le Komisi le Sa'o mai le afioaga o Matautu lea sa faaalua lona le malie ma le tete'e i le faiga o le faasamoa i le tulaga lea o le faau i le ula. O lona finagalo o lea faiga faavae e le amiotonu ona sa ia faamatalaina o lea faiga e mafai ai lava ona tuu atu e le Sa'o le suafa i lona atalii poo se sui o lona aiga e na te umia le suafa Sa'o e aunoa mase talanoaga ma le auaiga atoa. E malosia lona finagalo e faapea e le tatau ona toe faia lea faiga ina ia mautinoa e tatau ona faatalanoa le aiga atoa pe a filifili se e talafeagai ma onomea mo le tauaveina o le Matai Sa'o.
25. Sa faamauina e Polofesa Asofou Soo, o le faiga e tofia ai se Sa'o e lua auala e fai ai. Muamua faamaonia le sui o le a nofo i le suafa e le aiga ona tuu atu lea i le fonu a le nuu e faamaonia le tofiga ma aloaia le faaiuga a le aiga. O le isi vaega o lea faiga, e masani lava ona siaki e le fonu a le nuu le gafa o suli faapea ma le ua tofia e faamaonia ai pe o le tofiga ua faia e le aiga o o gatasi ma tu ma ganuu a Samoa. Sa ia faatu mai lona finagalo o le faiga lea e faatino ai le usu e tatau lava ona faamalosi ona o le auala lea e faaoga i totonu o le fonu a le nuu e sailia ai le agavaa ao lei faamaonia le faaee atu o suafa matai.

Agavaa Moomia o le Sa'o

26. O le toatele lava o le atunuu sa auai i faatalanoaga o lo latou manatu, o agavaa mo le filifilia o le Matai Sa'o e tatau ona faatulafono. O le toatele foi ua manatu o le isi agavaa taua e tatau i le Sao ona alala i Samoa.
27. O le toatele o le atunuu sa faatalanoa i Upolu e mafuli lo latou manatu e tatau ile tulafono ona aiaia le tofi e suli o le Matai Sa'o poo i latou e tino/toto i le aiga nai lo le fili mai i sui ua saofaga i totonu o le aiga ona o le tautua sa faatino.
28. O isi vaega sa taatele ona folasia i faatalanoaga, o le faatau lea o le tatau i le Matai Sa'o ona lava le silafia i Measina a le aiga, meatotino/eleele ma le vaavaaia o

meatotino ma o se faamalumaluga o le aiga i le tauleleia ma le aloaia, ma ia tatau foi o ia o se sulii moni e agavaa i le avea ai ma Sa’o.

29. O Alii ma Faipule o Savaii ua o latou faamamafaina le tatau i le Matai Sa’o ona alala tumau i Samoa i totonu o nuu ma afioaga. Talu ai e lelei ona faatino tiute o le Sa’o pe afai e alala i Samoa. O le isi itu o loo aumaia e Alii ma Faipule o Upolu e faapea e tatau ona faataoto mai se aiaiga i le tulafono e faatoa faataga ai le tagata e filifili i le Matai Sa’o pe a nofo mau i Samoa mo le umi e 5 i le 10 tausaga.
30. Sa matua faamamafa e le afiga ia Polofesa Asofou So’o e faapea o le filifiliina o se Matai Sa’o e tauaveina le igoa o le aiga, e tatau ona faatau le tulaga sa iai le tautua a le tagata aemaise lava pe a oo i le taimi e aumai ai e le tulafono le pule ma le malosiaga e tuu atu i le Matai Sa’o.
31. I le faatalanoaga ma le Afiga i le Faamasino Sili ia Patu Sapolu, sa ia saunoa ai, soo se agavaa lava e umia ai se Matai Sa’o e le tatau ona lautele se lisi ona e eseese uma agavaa e fili ai e aiga o latou Matai Sa’o. Mo se faataitaiga e tatau ona faamanino mai i le tulafono ni aiaiga e filifili ai le Matai Sa’o faaatasi ai ma ni agavaa faapoopo e manatu iai le aiga e fua i lea aiga ma a latou faiga masani.

Tetee i le faatulafonoina o Agavaa Moomia

32. E toaititi le numera oi latou o loo tetee e faatulafono agavaa moomia e tofi ai le Matai Sa’o. Sa faailoa lo latou atugaluga i le aia/faalavelave o le Malo i mataupu e patino lava i aiga, ona o aiga Samoa e ese ma o taiala e fuafua/faatalanoa ai matuapu e eseese faiga a lea aiga ma lea aiga.
33. E iai foi le isi atugaluga e faapea o ia tulafono o le a avea ma faitotoa e faaaoga e tagata e ave ai mataupu e le ono oo i le faamasinoga nai lo le fofō alamea lava i totonu o le lotoifale o le aiga. O isi finagalo e le mananao e faatulafono ae mananao e taofi pea i le tu ma aganuu a Samoa e ese mai le tulafono.
34. O nisi e manatu e le tatau ona faatulafono le filiina o le Matai Sa’o ae tuu atu lava i le aiga e faatino le latou aia tatau faatulafono e filifili ai le latou Sa’o. Sa faaleo le fingalo o Alii ma Faipule o Upolu e tuu atu lava i le aiga e faaaoga agavaa ua manatu i latou e talafegai mo le filiina o a latou Matai Sa’o.
35. E manatu nisi o le a avea le tulafono ma pa pupuni e taotaomia ai le aia tatau a tagata e filifili ai le Matai Sa’o. Ae finagalo e fai ni taiala o agavaa mo le Matai Sa’o aemaise lava e eseese lava aiga ma a latou faiga. O le isi tulaga, o le faatulafono o agavaa o le a aveese ai le mamalu ma le tumati’e o le aganuu a Samoa.

Manatu o le Komisi

36. E matua faataua e le Komisi le tumau pea i le aiga le filifilia o le Matai Sa'o e tusa ai ma a latou tu ma agaifanua ona e eseese uma lava aiga ma a latou faiga e fili ai Matai Sa'o.
37. E ui lava o le faiga masani o sulii o aiga e filifilia le Sa'o e tusa ai ma a latou tu ma aganuu, peitai e eseese lava finagalo o le atunuu poo ai tonu sulii e agavaaa e auai i le filiina ma le tofiaina o le Sa'o. O le toatele o le mamalu o le atunuu latou te fautuaina na o sulii moni e tatau ona faataga e auai i le filifilia o le Sa'o ae o loo latou faatauaina foi nisi o aiga e le na o sulii moni e filia le Sa'o ona e mafai ona auai i nisi taimi i latou ua lavea i le lio o le aiga ona o le tautua sa faatino i le aiga. O nisi aiga, e faaee atu le Matai Sa'o i se isi sui o le aiga e latou te manatu ua onomea ma talafeagai ona pale i le suafa.
38. O loo faataua foi e le Komisi, e ui lava i le eseese o tu ma aganuu a aiga i le filifilia poo ai e agavaa e auai i le filiina ma le tofiaina o le Matai Sa'o, e tatau foi ona silasila i agavaa moomia nei. O agavaa nei e tatau ona i le tagata e tofia e avea ma Matai Sa'o:
- O se *sulii*;
 - Iai silafia ma agavaa o matafaioi ma tiute o le *Sa'o* ;
 - Iai le silafia o Measina, gafa ma le talaaga o le aiga, agavaa e faatumau ai le filemu ma le fealofani o le aiga;
 - Sa tautua matavela i le aiga ma le nuu; ma
 - Soo se agavaa e faatatau i tu ma agaifanua a le aiga.
39. O nei agavaa o loo o faatasi ma le tele o finagalo oi latou sa faatalanoa, lea e atagia ai o le faamoemoe lava o le filiina o Matai Sa'o e tele lava ina tai tutusa uma le faiga o loo faatino ai e aiga i totonu o le atunuu. E fautuaina e le Komisi le tatau ona faataua e aiga o nei agavaa e filifili ai le tagata e talafeagai ma onomea mo le tauaveina o tiute ma matafaioi o le Matai Sa'o aua le manuia o le aiga. O nei agavaa e le o atoa ai le aotelega o agavaa moomia, ae e i le aiga lava le faitalia e fai ai nisi agavaa faaopoopo e patino i a latou tu ma agaifanua. E manatu foi le Komisi o le lelei ma atoatoa o le iloiloga e le aiga o nei agavaa o le a faaititia ai feeseeseaiga e tuuina atu i luma o le Faamasinoga o Fania ma Suafa e faatatau i le tofia o Matai Sa'o.
40. E ui lava o nei agavaa moomia o loo atagia ai le tagatasi i aiga Samoa o tiute ma matafaioi a le Matai Sa'o, ae fautuaina e le Komisi le faatulafono o nei agavaa. O le faatinoina o lea tulaga o le a iloa ai le taua o agavaa ma faamalosi ai aiga e matua filifili ma le faaeteete ma le toto'a le tagata e tofia i le Sa'o. E tatau ona malamalama aiga i aiaiga o le tulafono e ala i le faia o ni polokalame faalauiloa i tua i aiga ma nuu e tauala atu i matagaluega a le Malo (ose faaitaitaiga o le Matagaluega o Faamasinoga ma Auaunaga tau le Faamasinoga ma le Matagaluega o Tina ma Tamaitai, Atinae o Nuu Afioaga ma Agafesootai).

41. Peitai, afai e le faatulafonoina nei agavaa, e fautuaina e le Komisi le faia o ni polokalame faalauiloa i nuu i tua ma aiga e faalauiloa ai le faatauaina o nei taiala pe a filifilia ma tofia Matai Sa’o o aiga. O nei polokalame e faatautaia e matagaluga a le Malo e fitoitonu ma nei mataupu. O ia polokalame e tatau ona faamanino ai pe faapefea ona matua iloilo lelei ia agavaa ina ia tuu itiitia ai le tulai mai o tofiga le talafeagai ma faaitiitia ai le tele o feeseeseaiga e tuuina atu i luma o le Faamasinoga o Fanua ma Suafa i le va o Matai Sa’o ma suli. O le isi tulaga, o le iloilo ina lelei o nei agavaa o le a faatumauina ai le filemu ma le nofo lelei i totonu o aiga ma afioaga.
42. O le toatele o finagalo oi latou sa faatalanoa e mafuli lo latou taofi i le tatau ona alala i Samoa le Matai Sa’o e tofia. O le popolega taatele sa faaleoina e faatatau i le lelei faatino o tiute ma matafaioi a le Matai Sa’o pe afai e alala i atunuu mamao, ma o le a le lava ai foi se taimi e logo ai i mataupu e faatatau i le aiga i Samoa nei. O le isi faitioga taatele e faapea o Sa’o e alala i atunuu mamao o le a taofia ai atinae mo le aiga o loo fia faatino i Samoa nei, ona o le tele o taimi e toesea ai ma Samoa.
43. E manatu le Komisi o le aiaiga mo le mea e nofo ai, lea e tatau ai i le Matai Sa’o ona alala i Samoa mo se taimi umi, o se tasi o aiaiga e tatau ona faatau mo le agavaa ai o le tagata i le tofiga. O lea aiaiga e tai tutusa ma le aiaiga mo se sui e tamoe i le faigapalota, lea e aiaia le tatau ona alala i Samoa mo le umi e le i lalo ifo o le 240 aso i tausaga taitasi mo le 3 tausaga e faaiuina i le aso e filifilia ai. Afai ae faia lea aiaiga, e tatau ona faataoto i totonu o le tulafono.
44. E fautuaina e le Komisi afai ae faia se aiaiga ole nofoaga e alala ai le tagata, e tatau ona ave le faatau e aiaia ai le tagata o le a avea ma Matai Sa’o ina ia alala i Samoa mo le umi e le i lalo ifo o le 1 le tausaga e faaiuina i le aso o le tofiga, ma e tatau foi ona ausia le iai o le tagata i Samoa i le umi e le i lalo ifo o le tasi vae tolu o le tausaga (poo le 120 aso). Afai ae fai lea aiaiga, e manatu le Komisi e tatau ona ausia lea aiaiga, ae mafai foi ona filifili e aiga se aiaiga e umi atu i lo le umi ua faataoto mai e le tulafono pe afai e finagalo ma manatu e talafeagai.
45. E manatu le Komisi o le faia o lea aiaiga o le a faaitiitia ai atugaluga taatele e faatatau i le tofia o tagata i Matai Sa’o ae o loo nonofo ma alala i atunuu mamao, ma o le a faaitiitia ai foi le numera o tagata e nonofo i atunuu mamao e tofia e avea ma Matai Sa’o.
46. I lalo ole Tulafono o loo iai nei, a finagalo se tagata e tofi se matai e mafai ona filifili e logo le Resitala i lea finagalo, ma faasalalau ai loa e le Resitala mo i latou uma e aafia ai e mafai ai ona faaulu ni a latou faalavelave i totonu o le 3 masina. E fautua atu le Komisi o lea faitalia e logo ai le Resitala ise finagalo o le a tofi se matai (poo se Matai Sa’o) e tatau ona faatulafono. O lea faiga e mautinoa ai ao le’i resitalaina le matai, ua mae’a logo le aiga atoa ma le lautele i lea finagalo ina ia maua le avanoa e faia ai ni a latou faalavelave. O le a maua ai foi se isi manatu lelei mo le aiga e iloilo toto’a ai agavaa moomia ua faatu atu ma faaitiitia ai le faia o tofiga le talafeagai. O ia aiaiga o

le a lelei ona faamalasia e ala i le tuuina atu o le matafaioi e logoina ai le Resitala i le tagata lea o le a tofia e avea ma matai (poo le Matai Sa'o).

47. E ui o loo fautuaina e le Komisi le faatulafono o le aiaiga o faasilasilaga, ae manatu foi o le aiaiga e faasalalau ai mo le 3 masina ao lei faia le tofiga e mafai ona faaleaoga e le Resitala pe a faamalieina ua mae'a soalaupule le mataupu ae lei faia le faasalalauga. O lea manatu e mo mataupu ia e faatalanoa ai aiga ma faia ai se maliega mo le tofiga ua o latou fingalo iai.
48. E tusa ai ma auala e faatino ai faasalalauga o tofiga, e manatu le Komisi o le aiaiga o faasalalauga o loo faataoto mai i le Tulafono o Faigapalota 1963 o loo faaalua ai le lelei ona taulimaina o faamatalaga e le atunuu i nei aso ma e tatau foi ona faaaoga e faalautele ai aiaiga o faasilasilaga i le Tulafono o Fanua ma Suafa 1981. E aofia ai le tatau ona faasalalau i nusipepa, leitio poo isi nofoaga iloa gofie i Apia ia faasalalauga. E amanaia e le Komisi le avega o tau faaopoopo i le faalautele atu o faasalalauga, peitai e faamauina o nei tau o le a totogi e le o le a tofia i le matai (poo le Matai Sa'o) ae o le taua o le logoina oi latou o loo aafia i le tofiga o matai e taua atu i lo tau o loo fuafuaina. O le matai (poo le Matai Sa'o) e na te sailia le faamalieina o le Resitala i le mae'a faia ai o le faasalalauga ma e le toe moomia le faasalalauga mo le 3 masina, e tatau ona faamalieina nei aiaiga e faatatau i auala e faia ai faasalalauga.
49. E manatu foi le Komisi e matua taua foi le itu lea, ao lei resitalaina le tofiga o se Matai Sa'o e tatau ona faamalieina le Resitala o le tagata o le a filifilia e na te ausia le aiaiga o le mea o nofo ai ma isi uma aiaiga e aiaia mai e le tulafono. E tatau foi ona faamalieina le Resitala i le taulimaina o ni pepa faamaonia mai le ua filifilia i le Matai Sa'o, o loo faaalua ai le faamalieina o le aiaiga o le mea o nofo ai ma isi uma aiaiga o agavaa. O faamaoniga e mafai ona aumai o se Pepa o Faamatalaga Faatautoina e faamatala ai pe faapefea ona ausia le nofoaga agavaa moomia. O ia pepa faamaonia e tatau ona taofia e le Faamasinoga aua nisi feeseeseaiga mulimuli ane e faatatau i le tofiga o le Matai Sa'o, ma e manatu le Komisi o le a faaitiitia ai mataupu e tulai mai i le le talafeagai ona totofi o Matai Sa'o. O le matafaioi a le o le a tofia i le Matai Sa'o le tuuina atu o nei pepa faamaonia.
50. E manatu le Komisi o nei suiga e mafai ona tuu faatasi ma tuu atu o se aiaiga faaopoopo i lalo o le Vaega 4 o le Tulafono, o se tagata e tofia ma Matai Sa'o e tatau ona tuuina atu i le Faamasinoga se faamaoniga e nate ausia agavaa moomia mo le tofiga e pei ona faataoto mai i le Tulafono. E tatau ona iai se pepa e faamatala ai lea faamoemoe. O lea pepa e tatau ona taulimaina e le Resitala ao lei resitalaina le suafa i lalo o le Tulafono.

Fautuaga

1. Ina ia o gatasi ma le tele o finagalo o le atunuu sa faatalanoa lea e mafuli i le filiina o Matai Sa'o i totonu o aiga i Samoa, o agavaa moomia nei e tatau ona faatauaina e aiga o le filiina ma le tofia o Matai Sa'o mo le manuia o aiga. O lea e faatoa agavaa le tagata i le tofiga pe afai e na te ausia agavaa nei:
 - i. O le *suli*;
 - ii. Lava le silafia i tiute ma matafaioi tauave a le *Sa'o* ;
 - iii. Lava le silafia i measina a le aiga, gafa o le aiga ma le talaaga ma ia iai le agavaa e tausi ai le filemu ma le fealofani i totonu o le aiga;
 - iv. Sa faatino le tautua lelei i le aiga ma le nuu; ma
 - v. Nisi agavaa e patino i le aiga e tusa ai o ana tu ma agaifanua.
2. O nei aiaiga e mafai ona:
 - i. Faataoto mai i le tulafono (e faailoa ai le taua o nei agavaa ma faamanino ai agavaa moomia mo aiga e matua iloilo lelei iai pe a filifili poo ai e tatau ona tofia i le Matai Sa'o); poo
 - ii. Le le faatulafonoina ae mo matagaluega a le Malo (faataitaiga o le Matagaluega o Faamasinoga ma le Matagaluega o Tina ma Tamaitai) e tuuina atu le lagolago e ala i polokalame faalauiloa i aiga ma nuu, e faalauiloa ai le faataua o nei agavaa pe a filifili ma tofia Matai Sa'o ina ia faaitiitia ai le tulai mai o tofiga e le talafeagai ma tuuaitiitia ai foi feeseeseaiga a aiga e tuuina atu i le Faamasinoga o Fanua ma Suafa i le va o Matai Sa'o ma sulii.
3. Pe faatulafono pe le faatulafonoina foi ia agavaa moomia, e le faapea o le a pau ai lea o agavaa ae e iloilo lava e aiga pe iai nisi agavaa faaopoopo pe a filifili ma tofia a latou Matai Sa'o, aemaise o le tulaga e talafeuga ma a latou tu ma agaifanua.
4. E tatau foi ona faataua le aiaiga o le mea e aumau ai lea e tatau ai i le o le a avea ma Matai Sa'o ona alala i Samoa mo se taimi umi, o se tasi o aiaiga e tatau ona agavaa ai le tagata mo le tofiga (tai pei o le aiaiga e agavaa ai le sui tauva mo le faigapalota). E aiaia ai le o le a avea ma Matai Sa'o e alala i Samoa mo le umi e le i lalo ifo o le 1 le tausaga ma e faaiuina lea i le aso o le tofiga, ma e ausia lea vaega pe a nofo le tagata i totonu o Samoa ia le i lalo ifo o le tasi vae tolu o le tausaga (poo le 120 aso). Afai ae faaaoga lea aiaiga o le mea e aumau ai, e fautuaina le tatau ona tuu i totonu o le tulafono.
5. Afai ae faatulafono lea aiaiga o le mea e aumau ai, e tatau ona faatoa faaaoga ini tofiga Matai Sa'o i le lumanai.
6. Afai ae faatulafono le aiaiga o le mea e aumau ai, e tatau ona faataua le ausia o lea aiaiga, ae mafai lava ona filifili aiga ise aiaiga e umi atu pe a finagalo e talafegai.

7. E tatau ona teuteu le Tulafono o Fanua ma Suafa 1981 (vaega 14):
- i. Faamalosia faaetulafono le tatau ona ave o le faaaliga o finagalo i le Resitala mo le tofia o se matai (poo le Matai Sa'o); ma
 - ii. O le tagata e nafa ma le tuuina atu o lea faaaliga o le matai (poo le Matai Sa'o) lea o le a tofia.
8. Teuteu le (vaega 15) o le Tulafono o Fanua ma Suafa 1981 e aiaia ai le faasalalau i nusipepa, leitio ma isi uma nofoaga e iloa gofie i Apia ma Samoa faaaliga o finagalo e tofi ai se matai. O tau o ia faasalalauga o le a tofogi e le o le a tofia i le suafa matai (poo le Matai Sa'o).
9. E tatau ona aofia i le Vaega 4 le auese, lea e mafai ai e le Resitala ona aveese le aiaiga o le 3 masina o le faasalalauga pe afai ae faamalieina sa talo le aiga ma faia se soalaupulega e faaoga ai auala o faasalalauga e pei ona aiaia i le vaega 15.
10. Afai ae faatulafono le fautuaga 1 poo le 3, e tatau ona tuu iai ma se aiaiga faaopoopo i lalo o le Vaea 4 o le Tulafono, o le tagata o le a tofia e avea ma Matai Sa'o e tatau ona tuuina atu i le Resitala le faamaoniga e nate ausia uma agavaa moomia mo le tofiga e pei ona faataoto mai i le Tulafono. E tatau ona iai se pepa mo lea faamoemoe. E tatau ona taulimaina e le Resitala lea Pepa ao lei resitalaina le suafa i lalo o le Tulafono.

E. Matafaioi a le Sa'o

51. O matafaioi a le Sa'o o loo faamatala auiliili atu i le Vaega 2 o lenei ripoti. Ae o le faapuupuu, o le Matai Sa'o e nafa ma le pui puiga/faamalumaluga o le aiga, o meatotino a le aiga faapea le tauleleia o le suafa Sa'o.

Folasaga

52. I le Pepa o Talanoaga, sa sailia e le Komisi folasaga i vaega nei:

- *O le a, pe afai e iai, tiute ma matafaioi a le Matai Sa'o e tatau ona faataoto manino mai i le tulafono?*

53. Sa sailia e le Komisi finagalo o le atunuu i tiute ma matafaioi a le Matai Sa'o e tatau ona iai ae poo a foi matafaioi e tatau ona faamanino mai i le tulafono. O tiute lautele o le Matai Sa'o o loo faamatala muamua atu i le Vaega 2.

54. O le tele o folasaga a le atunuu sa taulimaina e le Komisi e mafuli lava i le faatulafono o tiute ma matafaioi patino a le Matai Sa’o. Sa taulimaina e le Komisi le tele o folasaga e faatatau i ituaiga o tiute ma matafaioi e tatau ona faatulafonoina. Ua vaevae atu matafaioi taatele e pei ona aumaia i folasaga a le atunuu:

- Logo ma faatalanoa le aiga i mataupu e pei ole faaee atu o suafa matai;
- Logo ma faatalanoa le aiga i le lisiina o eleele e aia tutusa iai le aiga (ma mataupu e faaaoga ai eleele mo ni pisinisi);
- Vaavaaia lelei meatotino a le aiga;
- Faia faaiuga talafeagai, sa’o ma amaionu ma ia tusa ai ma tulafono, tu ma aganuu mamalu a Samoa;
- Alala i Samoa;
- Faatumau le toafilemu ma le manuia o le aiga;
- Fai sao i mea fai a le aiga.

Logo ma faatalanoa mataupu lautele a le aiga.

55. O le matafaioi atu poo le matafaioi taua o loo aumaia i folasaga o le tiute o le Sa’o e logo ma faatalanoa le aiga atoa ao lei faia ni faaiuga taua e ono aafia ai le aiga poo meatotino a le aiga. Ua fautuaina o le tiute o le logo ma faatalanoa e aafia ai le tuu atu e le Matai Sa’o o le avanoa i le aiga e faaalua ai o latou manatu ma lagona ise mataupu. O finagalo ma manatu faaalua o le aiga o le a fesoasoani i le Sa’o e faia ai sana faaiuga mulimuli lea e tele ina faatulai mai i folasaga a le atunuu ma o le taua o lea tiute e faamautu i le faamanino mai i le tulafono ma o le a mautinoa foi le faaititia ai o feeseeseaiga e tulai mai ona o lea tulaga.

56. Peitai, e iai foi atugaluga sa faatulai mai pe a faatino le faatulafonoina o le tiute lea o le faatalanoa. O se tasi o popolega na faamauina e le Komisi sa saunoa iai le afioga a Polofesa Asofou Soo e faapea, e iai faaiuga e faatino toatasi lava e le Matai Sa’o e fua i luga o le tulaga faanatinati ma ose faaiuga foi e faaaoga ai le tofa loloto ma le tofa fetalai e le tau moomia ai le faatalanoa. O le isi popolega ona o le mea moni lava o aiga potopoto e fetaaloloi pe nonofo solo ma o le maua o se finagalo autasi ma ia i latou e faigata tele.

57. O nisi fingalo sa aumai i folasaga e faapea o le fai mea tonu o le Sa’o e tatau ai ona faatalanoa le aiga ma ua lava lena e iloa ai sa faatino lea tiute tusa lava pe lei iai se maliega na taunuu iai.

Matafaioi e logo ma faatalanoa i le faaeeina o suafa matai

58. O loo faatulai mai foi i folasaga, soo se mataupu lava e aafia ai suafa matai, e tatau ona faatalanoa le aiga. O loo taua foi i folasaga o le tele o feeseeseaiga e tulai mai ona o le faaiuga a le Matai Sa’o e faae’atu suafa matai o le aiga e aunoa ma le logoina ma le faatalanoaina o le aiga. O finagalo o le atunuu o loo faamamafa ai o suafa matai o

measina a aiga, ma e tatau lava ona filifili faatasi e le aiga ma le Matai Sa’o tagata talafeagai e tauavea suafa matai.

Matafaioi e logo ma faatalanoa i le tulaga o lisi o eleele o le aiga (ma mataupu e faaoga ai eleele i pisinisi)

59. Sa logoina foi le Komisi o le tele o feeseeseaiga i le va o aiga ma Matai Sa’o ona o mataupu e aafia ai eleele poo tupe, ma o tulaga masani lava lea o le pule toatasi o le Matai Sa’o ma manuia ai lava na o ia i tupe.

60. O finagalo taatele lava o le atunuu sa faatalanoa faatasi ai ma faamatalaga mai le Matagaluega o Faamasinoga e faapea o feeseeseaiga i mataupu tau eleele ua faasolo ina maaleale lea e aafia ai faamanuiaga tau tupe e ala i le faia o feutagaiga i lisi. Sa folasia foi e le Matagaluega o Punaoa Faalenatura ma le Siosiomaga e tele foi mataupu e aafia ai le vaaia lelei o tupe o lisi e Matai Sa’o o aiga. Ona o lea tulaga, ua taulimaina foi e le Matagaluega talosaga mai le mamalu o le atunuu e fautuaina ai le faia o ni tulafono faatonutou e faafoe ai tupe o lisi e foia ai le faaoga faaletatau ma soona fai e Matai Sa’o. O se tuualalo e faailoa ai faafitauli, ua faaalua e le Matagaluega ua iai le manatu o le a teuteu le Tulafono o le Faaliliuina o Fanua Faaleaganuu 1975. O nisi faataitaiga sa folasia i le Komisi e aafia ai mataupu o le lisi atu ai e le Sa’o o le fanua i lana lava fanau.

61. O le manatu laualuga o le Komisi ma e pipii foi iai le finagalo o Alii ma Faipule o Savaii ma Upolu sa faatalanoa e faapea, e tatau lava ona faatalanoa e le Sa’o le aiga i se faaiuga e faatatau i eleele ma faamanuiaga tau tupe (mo se faataitaiga o le lisi o eleele faaleaganuu poo le mananao o ni faipisinisi e faatu ni pisinisi i luga o eleele faaleaganuu). Sa faamaonia e le afiga i le Faamasino Sili nei finagalo e faapea o le tiute o le faatalanoa o se itu lelei i le tulaga ua faatino le tiute o le Matai Sa’o e ala i le sailia o finagalo o lona aiga. Peitai, na faaalua foi e le Faamasino Sili nisi o popolega pe afai ae faatulafono lenei matafaioi. Sa ia taua o se aiaiga e tatau ona faatalanoa le aiga e ono faatuai ai ona faaoga eleele faaleaganuu o loo finagalo le malo e faia ai poloketi aua le atinaeina o le tamaoaiga o le atunuu. Sa ia saunoa e toe faalautele lona finagalo, o le faatalanoa o aiga, silasila i o latou finagalo ma aumai la latou ioega o se faiga e umi se taimi o faagasolo ma o le a maumau ai avanoa taua mo aiga.

62. O nisi finagalo e tai tutusa sa faaalua e nisi o le atunuu i le faatulafonoina o le aiaiga e faatalanoa se mataupu ina ia maua se finagalo autasi o le aiga o le a puipuia mai ai foi faipisinisi mai fafo e mananao e faafaigaluega a latou tupe i Samoa e ala i le umi o le faagasologa e fai ai ona o ia tagata e masani lava latou i mea faigofoe ma vave e faatino ai ia tulaga. O le aiaiga mo le faatalanoa ma le autasi o se aiga o lona uiga a iai se tasi e tete’e i le mea ua autasi iai le toatele o le aiga o le a tele le avanoa e taofia ai se atinae o loo fia faatino i luga o le eleele o le aiga, aemaise lava pe a toatele ni Sa’o o se aiga.

63. E lagolagoina foi e Polofea Asofou Soo le lisiina o eleele faaleaganuu i le aufaipisinisi mai fafo ae tatau foi ona silasila i le faiga o loo fai ai i le taimi nei lea e na o le toatasi lava le tagata poo se vaega toaititi e mauaina faamanuiaga o le lisi. Sa ia fesiligia le faiga o loo faatino ai i le tulaga pe sili atu i le 300 i latou e umia le suafa e pei ona iai lenei vaitau i nisi o aiga, ma ia folasia ai le matua faiga tele ona maua se finagalo autasi ma e mautinoa lava le tulai mai o ni feeseeseiga i le va o le aiga. Sa ia fautuaina e tasi lava le auala e faafoe ai mataupu nei o le aiaia o le Matai Sa'o e faatalanoa ma taumafai sa'o e aumai se maliega a le aiga ise mataupu, ma afai ae mae'a ni feiloaiga se 2 ae le maua se maliega, ua tatau loa i le Matai Sa'o ona faagasolo pe faaauau le faiga o se faaiuga.

64. O le finagalo o Alii ma Faipule o Savaii oi latou sa faatalanoa ua latou fautuaina le faia o se faiga faa-resitala (system) e resitala uma ai suli o le aiga, ma e tatau foi ona aumai uma ioega a suli ua resitala ao lei lisiina atu se eleele. Peitai e toatele foi sa fesiligia le faatinoina o lea faiga ona e le se galuega faigofie aemaise lava i aiga toatele ma nonofo i atunuu mamao o latou suli. O le isi tulaga o le toe faaopoopo ai foi o nisi eseeseiga pe a resitala ia suli.

65. O nisi sa fautuaina e tatau ona aumai i le tulafono e faapea, o tupe maua uma mai lisi o eleele faaleaganuu e tatau ona teuina ise tusitupe a le aiga poo se tusi tupe faaletulafono (trust account). Ua fautuaina foi e tatau ona aumai i le tulafono se matafaioi patino a le Matai Sa'o e faasoa ma tufatufa ai ma le amiotonu ma le faamaoni tupe o le lisi i tagata o le aiga. O isi ua fautuaina le tatau foi i le tulafono ona aumai ai se vaega poo se pasene o le tupe e maua mai lisi e tatau ona faasoa ma tufa atu i tagata o le aiga ma le Sa'o.

Matafaioi o se Tausimea e vaaia lelei meatotino a le aiga

66. Na taulimaina foi e le Komisi se numera o folasaga a le atunuu o loo faaalua ai e tatau ona aumai i le tulafono le tiute o le Matai Sa'o na te vaavaaia lelei ai meatotino a le aiga i lona tulaga o ia o le Tausimea. E mafuli lava folasaga i le tulaga o le tasi lea o tiute o le Matai Sa'o o loo finauina e tagata ona o loo aofia ai meatotino a le aiga, ma o le malupuipua o ia meatotino mai le faaoga sese e le Matai Sa'o o ia o le Tausimea a le aiga, e tatau ona matua faamanino mai i le tulafono.

67. O loo folasia foi i nei folasaga le tatau ona matua faamaioio mai i le Tulafono, o le Matai Sa'o e le o ia e umiaina meatotino a le aiga ae o ia o le Tausimea o meatotino a le aiga. O se tasi folasaga o loo faapea mai o le pule a le Matai Sa'o i meatotino ale aiga ua na o se tausi mea i lona tulaga faa-Sa'o ae leai sana pule toatasi e faaoga ai meatotino e patino i le aiga atoa. Sa ia faamamafa foi e leai se pule a le Sa'o e nate faaliliuina ai eleele o le aiga poo le faaoga toatasi o tupe a le aiga poo isi meatotino.

Matafaifoi e faia ai faaiuga talafeagai, sa’o ma tusa ai ma le tulafono, tu ma aganuu mamalu a Samoa

68. Sa taulimaina foi e le Komisi folasaga o loo faaalua ai le moomia o le faatulafono o taiala e faatonutonu ai le pule a le Matai Sa’o i ana faaiuga fai.

69. Ua fautuaina e le Faamasino Sili ia Sapolu le faatulafono o ni taiala mo le Faamasinoga e loilo ai mataupu ole faaaoga sese o le pule a le Matai Sa’o. Sa ia fautuaina o le taiala e tatau ona aiaia ai le faamasinoga e vailiili pe talafeagai, sa’o ma tusa ai ma le tulafono ma tu ma aganuu mamalu a Samoa. Sa ia fautuaina foi e tatau ona fausia le tulafono i le gagana/faaupuga lautele ina ia faataga ai le tulafono e tali mo mataupu e mafai ona silasila mamao iai ma mataupu foi e le mafai ona vaai mamao iai. Sa ioe foi Polofesa Asofou Soo e faatulafono ni taiala ma fautuaina ai le tatau i le faamasinoga ona iloilo lelei pe o le faaiuga sa faia e le Sa’o ose faaiuga e manuia ai le aiga ma faatumau ai le toafilemu ma le nofo fealofani o le aiga.

Matafaifoi ia alala/nofo i Samoa

70. Sa mauaina foi e le Komisi ni folasaga e faatatau i Matai Sa’o e afifio ma alala i atunuu mamao. O le tasi vaega o folasaga o loo talosagaina ai se tulafono e patino lava i le faasaina o Matai Sa’o ona alala i atunuu mamao. O le aiga tonu o lea taofi ona e sili atu ona lelei le tautuaina o le aiga pe a alala ma papaaao i Samoa nei le Sa’o. O nei folasaga o loo iai faataitaiga o le le faamalieina o tagata ona o le tulaga lea e uma loa ona faaee atu suafa matai ona o loa lea i atunuu mamao e aunoa ma se fesootaiga e toe maua ma le leai se tautua e faia i le aiga i Samoa nei. O isi foi folasaga e faapea, o le a noatia ai atinae fai a le aiga i luga o eleele ona o le leai ose asi mai o le Sa’o i le aiga mo se taimi umi.

71. Peitai, o le tele foi o folasaga o loo taua ai o le mea moni o loo iai i le atunuu i le taimi nei, o le tele o Matai Sa’o o loo alala i atunuu mamao o loo tele foi lo latou sao i le tautuaina mai o latou aiga e le gata i le itu tau tupe ae o isi tulaga e faaleleia le atinaeina o aiga. O loo taua i folasaga e tatau foi ona faamanino mai i le tulafono, a le toe foi mai le Matai e nofo mau i Samoa, tautua faamaoni mai lona aiga mai atunuu mamao o loo alala ai, poo le ui atu loa o le ula i se tasi o le aiga o loo nofo mai i Samoa nei.

72. O isi folasaga o loo folasia ai nisi o faiga e aofia ai le faamalosia o le taimi faatulagaina i totonu o le tausaga e tatau ona alala ai i Samoa le Matai Sa’o. O loo faaalua foi e tatau i le tulafono ona iai aiaiga e tai tutusa lava ma aiaiga o loo fai i le palota lea e tatau ai ile matai ona fai le monotaga tusa lava pe alala i atunuu mamao.

Matafaioi ia faatumau le toafilemu ma le manuia o le aiga

73. O folasaga ua taulimaina o loo faamamafa ai o le isi tiute taua o le Matai Sa’o o le faatumauina lea le toafilemu ma mautinoa le tulaga manuia o le aiga. Afai ae iai ni feeseeseaiga e tulai mai i le va o le aiga, o le Matai Sa’o e amatamea i le faia o teuteuga ma toe tuufaatasi le aiga ina ia mafai ona fofo malie se eseese. Sa faamamafa foi e Polofesa Asofou Soo o se tasi lea o tiute faigata o le Sa’o o le taumafai e faanonofa lelei ma toafilemu le aiga. Sa ia faaalua foi o le faatumauina o le filemu ma le fealofani o le aiga e iai le taimi e fai ai foi ma faafitauli i nisi itu o le aiga lea e faailo ai nisi o finagalo pe tatau ona faatulafono tiute o le Matai Sa’o.

Matafaioi e fai sao o mea fai a le aiga ma tuuina atu le tautua i le aiga ma le nuu

74. Na taulimaina foi e le Komisi se numera o folasaga o faaalua ai e tatau ona iai se aiaiga o le tulafono e fai sao ai le Matai Sa’o ia tutusa lelei i mea fai a le aiga. Sa saunoa Polofesa Asofou e faalatele le tulaga lea o se mea masani lava lea i totonu o aiga latou te manatu e tatau lava ona maua atu le saofaga a le Matai Sa’o e faatusa i isi tagata o le aiga pe a oo ina faatino faalavelave. Sa faamamafa i folasaga le tulaga e iai Matai Sa’o e le fai saofaga i tupe poo isi tulaga i mea fai a le aiga, peitai e leai se aafiaga aua o loo latou umia suafa taua o aiga.

75. O loo folasia foi e tatau i le tulafono ona aafia ai le tiute o le Matai Sa’o e faatino lana monotaga poo le tautua i le nuu. O le uiga o le *Monotaga* o le tautua faamalosi, fesoasoani poo le saofaga e faatino mo le aganuu ma tu poo mea fai a le ekalesia ma isi lava faamoemoega e tusa ai ma tu ma aganuu a lea afioaga. Sa logoina foi le Komisi o isi vaega o matafaioi a le Matai Sa’o e le gata o le aiga ae o le tautuaina foi o le nuu ma le afioaga.

Atugaluga i le faatulafonoina o Matafaioi

76. E malosi foi nisi o finagalo e tetee ai i le faatulafonoina o matafaioi a le Matai Sa’o. O se tasi o finagalo taatele o loo faaalua i le tetee, o le natura o le aganuu e fesuisuia ma ua uma foi ona mamana ma tuulaupua mea uma ma e iai foi le mea e gata ai lea mea ma lea mea. Sa folasia e Polofesa Asofou Soo o le mamana ma le faatulagaga ua uma ona iai ona tapulaa i soo se tafa o le aganuu ma le faasamoa. O nisi o nei manatu sa faasoa ai foi le afioga i le Faamasino Sili ia Patu lea sa ia faaalua o le aganuu lava ia e iai lava suiga mai lea taimi i lea taimi. O lea la, o tu ma aganuu i tupulaga o nei aso o le a ese foi ma tu ma aganuu a tupulaga o le lumanai. Sa ia fautuaina foi e tatau i le tulafono ona iai se vaega e faamautu ai leaga e fai si faigata ona o le siomaga o le aganuu a Samoa ma lona faaogaina e eseese lava faiga a lea nuu ma lea nuu. Sa fautuaina foi e le Faamasino Sili e faigata le tulaga o loo manaomia ai le faapaleniina ia ausia ae o le taua e le tatau i le tulafono ona mamafa tele pe tamau ona o le aganuu ma lona natura e fesuisuia e le tumau ise mea e tasi.

77. Sa faaalua foi o le mea moni lava, e matua faigata i le Matai Sa'o ona faamalieina uma tagata i totonu o le aiga potopoto. E pei ona saunoa Polofesa Asofou Soo i lana folasaga, o se faaiuga e faia ina ia mafai ona nonofo fealofani ma toafilemu le aiga, e iai lava taimi e iai foi tagata e fai ma faafitauli. O le popolega o le faavasegaina o tiute o le a faamalosia ai aiga mafatia e ave a latou tagi i le faamasinoga i le solia o tiute fai o le Matai Sa'o nai lo le teuteu i totonu o le lotoifale o le aiga.

- *O a matafaioi ma tiute tauave o sulii ae o a foi pe afai e iai ni tiute e tatau ona faataoto manino mai i le tulafono?*

78. E le tele ni folasaga na taulimaina e faatatau i tiute ma matafaioi tauave a sulii e faatusa i tiute ma matafaioi tauave a le Matai Sa'o. O se tasi o tiute o loo faaalua e le atunuu e mo sulii e fesoasoani i le Sa'o e vaai lelei le aiga ma isi tiute e faatatau i le manuia lautele o le aiga. O loo faamamafaina foi e tatau ona iai se leo o sulii i faaiuga fai i eleele o le aiga faapea punaoa. O loo taua foi i folasaga a le atunuu e tatau i sulii uma ona auai ma faatalanoa ma soalaupule muamua e latou faalotoifale se mataupu pe afai ua le lelei le faatinoina o matafaioi ma tiute o le Matai Sa'o.

79. Sa faamauina foi e le atunuu o le matafaioi a sulimoni o le filifilia o le Matai Sa'o e tatau ona faatumauiina ma faamalosia lona faatauaina e tusa ai o tu ma aganuu faasamoa. Sa fautuaina e se tasi o tootoo e tatau ona faamanino i lalo o le tulafono le aia tatau a sulimoni e aveese ai le Matai Sa'o.

80. O nisi o tootoo o le atunuu sa fautuaina e moomia le matua faamatala manino mai e le tulafono le aia tatau a sulii ma a latou matafaioi.

Manatu o le Komisi

81. E tele le numera o folasaga sa taulimaina e le Komisi mai le atunuu o loo faamamafa ai le manaomia o le faamanino mai i le tulafono o tiute ma matafaioi a le Matai Sa'o.

82. O folasaga a le mamalu o le atunuu e mafuli ma taula'i i le tulaga moomia o le faavasegaina o tiute o le Matai Sa'o ina ia logo ma faatalanoa le aiga ae lei faia faaiuga. O nei folasaga o loo faamamafa ai o le tele o feeseeseaiga a aiga e mafua mai ona o le le lelei o le faatalanoaina ma manino faaiuga fai a le Matai Sa'o. Peitai, e iai foi nisi manatu e feteenai o loo faapea mai o le Matai Sa'o e na te faia toatasi faaiuga pe afai o ni faaiuga e faaaoaga ai le tofa loloto ma le faautautaga mamao poo nisi foi taimi e le moomia ai ni talanoaga ma le aiga. E iai le manatu o le Komisi e au i lea finagalo ona e iai mataupu e le moomia ai le faatalanoa o le aiga e aofia ai mataupu lautele ma faaiuga fai i lea aso ma lea aso mo le lelei o le aiga.

83. Peitai, e faataua foi e le Komisi afai e aafia measina a le aiga i faiga faaiuga e pei o suafa ma eleele, e iai la le tiute patino o le Matai Sa'o e tatau ai ona logo ma faatalanoa le aiga. E lagolagoina e le Komisi le finagalo o loo faavae ai le tele o

folasaga na tuuina mai i luma o le Komisi e faapea talu ai o measina e patino tonu i le aiga, e tatau foi ona sailia manatu ma finagalo o le aiga i soo se faaiuga e faatatau i measina.

84. Sa taulimaina foi e le Komisi le tele o fautuaga mai le mamalu o le atunuu sa faatalanoa lea latou te finagalo e faatulafono matafaioi a le Matai Sa’o o le faatalanoa o mataupu lautele e manuia ai aiga e pei o le lisiina o eleele faaleaganuu. E faataua foi e le Komisi mataupu e aafia ai le itu tau pisinisi ma faamanuiaga tau tupe e tatau lava ona moomia le faatalanoa ona o le tele o mafuaaga. O le mafuaaga muamua o lisi e lelei ona faatalanoa muamua ma o le a puipuia mai pe itiiti le avanoa e tulai mai ai ni faafitauli i le lumanai mai itu o loo aafia pe a mae’a ona sainia le lisi. O le a fesoasoani foi e faaititia ni mataupu e tuuina atu i le faamasinoga e itu o loo aafia faapea ai ma ni toatuga o le a aafia ai le aiga ona nei faiga. O le a sefe ai tupe faaalu ma punaoa a le faamasinoga ae le gata i lea o le a maua ai le avanoa lelei mo i latou o loo fia atina’e. E iai le manatu o le Komisi o le faavasegaina o faatalanoaga e mafai ona fai ma puipuiga faasaga i le faaaoga faaletatau o le pule a le Matai Sa’o e na te faaaoga toatasi ai eleele mo lona lava manuia na o ia. O lea faiga o le a tuuititia ai feeseeseaiga e oo atu i le faamasinoga ona o lea faafitauli.

85. O le isi mataupu e faatatau i le tiute o le faatalanoa o le aiga poo le tu e faatino ai le faatalanoaga. E faataua e le Komisi a iai se mataupu e manatu le Matai Sa’o poo se sui o le aiga e talo ai se feiloaiga ise mataupu e faatatau i suafa matai, eleele poo se isi mataupu taua, e tatau ona faia se faasilasilaga faalauaitete. E tatau ona tuuina atu lea faasilasilaga i totonu o le taimi e le i lalo ifo ma le 1 le masina ao lei faia le feiloaiga, ma e tatau foi ona iai le aso tuupoina, taimi, nofoaga ma le mataupu o le a faatalanoa i le feiloaiga. O lea faasilasilaga e tatau ona faataamilo i nusipepa, leitio ma isi nofoaga iloa gofie i Apia ma Samoa. O aiaiga mo le faasilasilaga e tatau ona faataoto mai i le tulafono. Tusa pe ausia nei aiaiga mo le faasilasilaga, ae afai e le auai tagata o le aiga, e le ausia lava le tiute o le faatalanoaga.

86. Sa taulimaina foi e le Komisi finagalo mai le atunuu ina ia faamanino mai i le tulafono le tiute o le Matai Sa’o e faatatau i meatotino a le aiga. O folasaga o loo faamanino mai ai o le tiute o le Matai Sa’o o le vaavaaia o meatotinu a le aiga i lona tulaga o ia o le Tausimea. Ua faaalua foi e tatau lava ona faamatala manino mai i le tulafono o le Matai Sa’o o le Tausimea o meatotino a le aiga ae le o ia e umia. E ioe le taofi o le Komisi i fingalo ua faaalua o le natura o le pule a le Matai Sa’o e le o ia e umia meatotino ae o ia o le Tausimea o meatotino a le aiga.

87. O nisi folasaga o loo faamamafa ai le manaomia o le faia o tulafono e aumai ai taiala e fesoasoani i le fuafuaina pe sa talafeaga ona faaaoga le pule a le Sa’o e faia ai faaiuga. Ua fautuaina foi e le Faamasino Sili ia Sapolu o le faavasegaina o ni taiala e aiaia ai le faamasinoga e iloilo pe sa sa’o ona faia le faaiuga, talafeagai ma tusa ai ma le tulafono, tu ma aganuu a Samoa. Sa saunoa faalautete foi Sapolu e tatau ona faaaoga le gagana lautele e faamalie ai mataupu e mafai ona iloa atu ile vaai ma mataupu e le

mafai ona vave iloa lea e faatautaia e le faamasinoga. E au le Komisi i nei manatu ma e fautuaina e tatau ona faavasega e fesoasoani ai i le galuega a le faamasinoga i le faafoeina o mataupu e faaoga sese ai le pule a le Matai Sa'o.

88. O le mataupu i finauga a'o faatino le faatalanoaga lea e iai le atugaluga i le aiaiga lea o le Matai Sa'o e tatau ona nofomau i Samoa. O le tele o folasaga e mafuli lo latou taofi e tatau ona nofo pe alala i Samoa le Matai Sa'o. Peitai, sa logoina le Komisi o le mea moni o loo iai le vaitau lenei, o le tele o Matai Sa'o o loo nonofo ma papaaao i atunuu mamao ma tautua mai ai o latou aiga. E faataua foi e le Komisi le aiaiga lautele mo le Matai Sa'o e nofomau i Samoa o le a le talafeagai ma noatia ai Matai Sao o loo nonofo i atunuu mamao ma tautua faamaoni mai o latou aiga. Peitai, e amanaia foi e le Komisi le tele o folasaga o loo faamatala mai ai lo latou foi silafia i Matai Sa'o ua malaga i atunuu mamao ina ua uma ona faaee atu le suafa ma e le toe maua mai ai se fesootaiga poo le faia mai foi o le tautua i le aiga.

89. E fautuaina e le Komisi o le aiaiga mo le mea e nofo ai e tatau ona faaoga mo le Matai Sa'o e nofo ai i Samoa mo le umi e le i lalo ifo o le 120 aso i totonu o le tausaga. E tatau ona faataoto mai i le tulafono le aiaiga lea o le mea e nofo ai pe afai ae faaoga.

90. Ua taulimaina foi e le Komisi folasaga o loo fautuaina ai le faia o se aiaiga i le tulafono mo le Matai Sa'o e fai sao ai i mea fai a le aiga ma faia monotaga poo le tautua i le nuu. O le tele o folasaga o loo faaalua ai le le fiafia o tagata i le Matai Sa'o e le fai mea i mea fai a le aiga ae o ia e na te avea uma le tele o faaaloaloga e maua e le aiga. O loo faailoa foi i folasaga o le itu lea e tele ai feeseeseaiga i totonu o aiga ona o le le faia o ni saofaga a le Sa'o i mea fai a le aiga ma le le faia o se monotaga i le nuu. E manatu le Komisi o le lelei faatino o tiute o le Matai Sa'o o le faia lea o se aiaiga e tatau ona fai sao le Sa'o i mea fai a le aiga ma tautua le nuu e ala i le faia o lana monotaga. Peitai, e faamauina foi e le Komisi o lenei aiaiga e le tatau ona aafia ai nuu ma afioaga ia latou tu ma agaifanua lea e le aafia nisi o suafa matai i faiga monotaga a nuu.

91. Sa logoina foi le Komisi o se tasi o matafaioi taua a le Matai Sa'o o le faatumau o le toafilemu ma le manuia o le aiga. O lea manatu e fesootai ma nisi o atugaluga sa faaalua e faapea o le faatumauina o le filemu o se faiga e le o manino lelei. Sa faamanino mai e Polofesa Asofou Soo ina ua ia saunoa e faapea o le faatumauina o le filemu ma le nofo fealofani e ai foi taimi e faafaigata ai le isi vaega o le aiga ma e iai foi latou faafilemu. E mafai ona ausia ma maua le filemu ma le nofo fealofani peitai e iai lava tagata o le aiga e maua i le loto tiga ma le le fiafia. E ioe le Komisi e iai lava faafilemu ma faigata i le faatinoina o le faavasegaina o lenei matafaioi. Peitai, o le ogatotonu lea o matafaioi a le Matai Sa'o ma e fautuaina e le Komisi afai ae aafia i le tulafono lea matafaioi, e tatau ona lautele lona faauigaina.

92. E faamauina e le Komisi o le toatale o le atunuu sa faatalanoa e manatu o tiute ma matafaioi a le Matai Sa'o o loo tele ina laugatasia ai aiga i totonu o Samoa ma e

lagolagoina le tuu i totonu o le tulafono. Peitai, e manatu le Komisi, o le faataoto mai o matafaioi i le tulafono e fai si maaleale i le tulaga faaleaganuu ma e tatau ona matua fefulisai faalaau mamafa le mataupu. Ae manatu foi le Komisi e le gata ina faamanino mai i le tulafono le taua o nei matafaioi, ae o le a faaali manino ai foi pe a iai ni talosaga mo le aveesea o se matai.

93. E manatu le Komisi o le lisi o matafaioi ua taua i lalo e tatau ona faataoto mai ile tulafono:

- Tiute e logo ma faatalanoa mataupu i le faaee atu o suafa matai;
- Tiute e logo ma faatalanoa mataupu i lisi o eleele faaleaganuu (ma mataupu tau pisinisi);
- Tiute o se Tausimea e vaaia lelei meatotino a le aiga;
- Tiute ia nofo i Samoa;
- Tiute e faatumau le toafilemu ma mautinoa le soifua manuia o le aiga;
- Tiute e fai sao i mea fai a le aiga ma faatino le tautua i le nuu; ma le
- Tiute e fai faaiuga talafeagai, sa’o ma tusa ai ma le tulafono, tu ma aganuu mamalu a Samoa.

Fautuaga

11. O tiute ma matafaioi a le Matai Sa’o e tatau ona faataoto mai i le tulafono. O nei tiute ma matafaioi e le tatau ona tamau, ma e tatau ona aofia ai:

- Tiute e logo ma faatalanoa mataupu i le faaeeina o suafa matai;
- Tiute e logo ma faatalanoa mataupu i lisi o eleele e aia tutusa iai le aiga (ma mataupu tau pisinisi);
- Tiute o le Tausimea e vaaia lelei meatotino a le aiga;
- Tiute ia aumau i Samoa;
- Tiute e faatumau le toafilemu ma ia mautinoa le soifua manuia o le aiga;
- Tiute e fai sao i mea fai a le aiga ma faatino le tautua i le nuu; ma le
- Tiute e fai faaiuga talafeagai, sa’o ma tusa ai ma le tulafono, tu ma aganuu mamalu a Samoa.

12. Talu ai e iai faafitauli i le faatinoina o le faavasegaina o le tiute ia faatumau le toafilemu ma le manuia o le aiga, afai ae aofia i le tulafono, e tatau ona lautele lona faauigaina.

13. I le tulaga o le ‘tiute ia aumau i totonu o Samoa’, e tatau ona manino mai i le tulafono o le aiaiga mo le Matai Sa’o ia aumau i Samoa o lona uiga e tatau ona nofo i totonu o Samoa mo le umi e le i lalo ifo o le 120 aso o le tausaga ao ia tauaveina le Matai Sa’o.

14. E tatau foi ona faatonu mai i le tulafono, a’o lei faia le talanoaga e faatatau i suafa matai poo eleele, e tatau ona tuuina atu se faasilasilaga i totonu o le masina e 1 ao lei oo i le aso tuupoina ma e tatau foi ona aofia ai le taimi, nofoaga ma mataupu o le a

talanoa i le feiloaiga. O lea faasilasilaga e tatau ona faataamilo e ala i nuispepa, leitio ma isi nofoaga iloga i Apia ma Samoa.

E. Aveesea mo le Matai Sa’o ma le Matai

94. O loo aumai manino i le Tulafono o Fanua ma Suafa 1981 le aveesea ai o le suafa matai, e faapea:

Aveesea o le Suafa Matai – E mafai e le Faamasinoga ise talosaga a le Sa’o poo se Suli ona aveesea mai le suafa matai ise tagata pe afai o lea tagata:

- a. *Sa faia se amio ua tauvalea ai le aiga, nuu poo se faalapotopotoga o iai le matai; poo le*
- b. *Le faatinoa lelei o ona tiute faamatai; poo le*
- c. *Faamaonia o se solitulafono matuia o lona faasalaga e olaga atoa i le falepuipui.*

95. O se tasi o mataupu sa mafai ona aveesea ai se Matai Sa’o e faaoga ai le aiaiga lenei, ose talosaga a se Suli e aveesea le Matai Sa’o ona o lona faaoga faaletatau o lana pule e maua ai lona lava manuia e aunoa ma se feiloaiga/talanoaga ma le aiga potopoto. Sa faasea lea aiga e faapea e musu le Sa’o e feiloai ma maua se toafilemu ma le aigapotopoto e faatatau i mataupu tau eleele, ma o lea e le o mafai ona faatino lona tiute o le fofo o feeseeseaiga i totonu ole aiga. Sa faailoa e le Faamasinoga o le Matai Sa’o o ia o le *tausimeasina* ma le tagata e tausia le filemu i totonu o le aiga i le aganuu ma le *fa’asamoa*. Talu ai ona o le le atoatoa o le faatinoina o le tiute o le Sa’o e fofo feeseeseaiga i totonu o le aiga, faatasi ai ma le leai o se lagolagoina e Suli ua matua aliali ai le le faatuatuaina i lona tulaga e tausia le filemu ma fofo faaaitulau poo eeseeseaga i totonu o lona aiga, o lea sa talia ai le talosaga ma aveesea ai le Sa’o.

96. E iai foi le mataupu e lei manuia le talosaga i lalo lava o le aiaiga lenei, sa talosaga le aiga e aveesea le suafa Matai Sa’o mai le sa tete’e ona o mafuaaga e faapea e na te lei tausia le aiga ma e le galue malosi i le tauaveina o ona tiute. Sa faasea foi le aiga o faaiuga fai a le Sa’o e faaituau ma sa faaoga faaletatau foi lana pule ma tauvalea ai le aiga. I le faaiuga a le Faamasinoga sa teena ai le talosaga ma faapea mai:

’e sao o gaioiga ma tuuaiga ua i luma o le Faamasinoga e tauleagaina ai le aiga ma faaalua foi ua le faia le tiute o le Sa’o i lona mafai e gata ai, peitai, o nei tuuaiga ma moliaga e le faavaea.

97. E ese mai i le aiaiga lea, e mafai ona feiloai le aigapotopoto ma filifili lelei ai pe aveesea le Matai Sa’o e tusa ai ma lo latou finagalo autasi. Peitai, afai ae tete’e le Matai Sa’o i le faaiuga a le aiga, pau le isi avanoa mo le aigapotopoto o le Faamasinoga, e faalagolago lea i le vaega 20B.

98. O le taimi nei i le faasamoa ma le vaega 20B o le tulafono, e leai se malosiaga i le Fono a Nuu e aveese ai se Matai Sa'o.

Amerika Samoa

99. E tusa ai ma tulaga faaleaganuu, e faaono aveesea e le aiga se *matai* (e aofia ai ma se *Matai Sa'o*) ma tofia se isi sui ole aiga e na te umia se suafa *matai* poo se tofiga *Matai Sa'o*. O lenei faiga o loo faaauau pea ona faatino, ae peitai sa faia iai ni toe teuteuga ina ia faatagaina ai le faamasinoga e aveesea se *matai* poo se *Matai Sa'o*. O sui o se aiga ua manana'o e aveesea se *matai* poo se *Matai Sa'o* e faaono tuuina atu se talosaga i le Faamasinoga Maua-luga. E pei ona manaomia i lalo o le tulafono, e 25 sui o le aiga e tatau ona tuuina atu le talosaga (suli tau toto ma 'aano), e i luga atu o le 18 tausaga le matutua, ma o loo tautua i le *matai* i le taimi na tuuina atu ai se talosaga, e tusa ai ma tu ma aganuu a Samoa. E le taliaina e le Faamasinoga se talosaga mo le aveesea o se *matai* poo se *Matai Sa'o* pe afai o i latou na talosaga e le o ni sulii o le aiga, ma e faaono faaleaogaina ai le talosaga pe afai ua lē usita'ia tu ma aganuu i le taumafai lea e faia se soalaupulega ma le *matai*.

100. O le faasilasilaga e tuuina atu mo le 30 aso. Afai e lei tuuina atu se tali pe le auai foi i le valaauga, e mafai e le faamasinoga ona faia le faaiuga mo itu finau e auanoa ma le toe valaauina e le faamasinoga. E filifili e le aiga se isi matai e tusa ai ma agaifanua a aiga ao lei aveesea le matai.

101. O se aiaiga taua o loo i totonu o le tulafono a Amerika Samoa o loo faapea mai o soo se *matai* lava e le o i totonu o Samoa mo le silia ma le 1 tausaga e faaono aveesea lona tofiga i luga o se talosaga na tuuina atu e soo se sui lava o le aiga i le Faamasinoga Maua-luga. E tusa ai o lenei faaiuga, e tatau ona iloilo e le Faamasinoga mafuaaga ua toesea ai le matai faapea faanaunautaiga o le aiga o loo tautua i le *matai*.

Manatu na tuuina mai

102. I totonu o le Pepa o Talanoaga, na sailia ai e le Komisi ni sao ma manatu i tulaga e pei ona ta'ua i lalo:

- *Faamata e moomia e le tulafono o iai nei mo le aveesea o le suafa matai (vaega 20B) ona toe faamanino atili (faataitaiga. o a ni faataitaiga o le faalumaina o le aiga e le matai, faatoilalo poo le le faaaloalo i le aiga faapea ai ma le le faatinoina o ona tiute) poo le faalautele?*
- *E ono faaititia le faaoga le tatau o le pule a le Matai Sa'o pe afai e faia tulafona a nuu ma tuu ai totonu le malosiaga e aveese ai le Matai Sa'o?*

Faalumaina o le Aiga ma le lē faatinoina o tiute

103. I le taimi o faatalanoaga faalauaitele sa atagia mai ai le tele o faataitaiga e faatino e *Matai* ua faalumaina ai le aiga, faato'ilalo aiga, o le leai o se faaaloalo i le va fealoai, poo le le faatinoina foi o ona tiute. O nei faataitaiga e le o manino ma e faaono avea

ma tulaga e aveesea ai pe leai foi se *Matai Sa'o* isona e faalagolago i faamaumauga moni o nei mataupu.

104. Ua tuuina atu i lalo ni faataitaiga o mataupu ua atagia mai ai le tulaga faalumaina, faatoilaloina poo le le faaloalo i le aiga:
- Mulilua/Soli tofaga;
 - Lē Faamaoni –mo se faataitaiga o le faaoloatauaina lea o *pulenuu* ina ia resitala *suafa matai*;
 - Soligatulafono ogaoga – mo se faataitaiga o soligatulafono o faiga aiga, soli tofaga, sopo tuaoi o fanua;
 - Amioga le pulea ona o le faasuā'avā ; ma le
 - Lē faamanuiaina i se mataupu tau faamasinoga .
105. Ua tuuina atu i lalo faataitaiga ua atagia ai le lē faatinoina o tiute o le *Matai*:
- O le lē faatalanoaina o sui uma o le aiga i faaiuga fai, e patino lava i fanua faaleaganuu ma meatotino a le aiga;
 - Failure to provide impartiality in their decision making and acting in self interest;
 - Soona faaaoga lē tatau le pule – o faataitaiga na tuuina mai e aofia ai *Matai Sa'oo* loo faatinoina le pule i le aiga ae peitai e le o aumau i totonu o le afio'aga, ma pe afai ua taliaina e se *Matai Sa'ose* faaoloataua mo le tuuina atu o suafa matai i ai latou e le o ni suli o le aiga; ma
 - Tu'u ti'ai tiute ma matafai ai ae o loo aumau i atunuu mamao.

Faamata e tatau ona faamalamalama atili pe faaopoopo atu mafuaaga mo le aveesea o matai?

106. O le toatele oi latou na faatalanoa i Upolu ma Savaii sa manatu e manaomia ona toe teuteu le Vaega 20B o le tulafono ina ia faaopoopo iai mafuaaga mo le aveesea o le *Matai Sa'o*, ina ia puipuia ai le soona faaaoga lē tatau o le pule aemaise o le faiga lē amiotonu i meatotino a le aiga (fanua ma suafa).
107. Sa lagolagoina e le Faamasino Sili, Afioga FalefatuSapolu le manatu ina ia atagia ma maioio mai i le tulafono mafuaaga e aveesea ai se *Matai Sa'o*, ae peitai, e tatau ona tagofia ma le faaeteete ona e faaono faaitiitia ai le flexibility o le Faamasinoga e faia ai faaiuga e tusa ai o mafuaaga moni o se mataupu. Sa tuuina mai sana fautuaga e faapea, e tatau i le tulafono ona maioio mai ai mataupu e tatau ona vaavaai iai le Faamasinoga mo faaiuga fai pe faamata e tatau ona aveesea se *Matai Sa'o*, ma o se lisi o mataupu e talafeagai.
108. I faatalanoaga ma le Matagaluega o le Soifua Maloloina sa tuuina mai ai ni manatu e faapea, o le taumafai e atagia mafuaaga mo le aveesea o se *matai* i lalo o le

tulafono o se tulaga faigata tele, ona o mafuaaga e ono talafeagai i le taimi nei e faaono lē talafeagai i le lumanai ona o le tu mati'e o le *Faa-Matai*.

109. O le toatele o le mamalu o le atunuu i Upolu ma Savaii ua talitonu ua onomea le faamanino atili aiaiga o le tulafono o loo iai nei ma toe faaopoopo nisi mafuaaga mo le aveesea o se *matai* ae ia patino tonu lava i le aveesea o le *Matai Sa'o*.

110. O nei fautuaga e aofia ai:

- Le 'faatoilalo aiga, afio'aga ma le atunuu'e tatau ona faamanino atili ma ia aofia ai ma ni faataitaiga patino i totonu o le tulafono. Mo se faataitaiga, e le o manino i totonu o le tulafono pe faamata e faatatau lea aiaiga i na o amioga le pulea e pei o le soligatulafono i faiga aiga, poo le mulilua/solitifaga (aua o loo manino lelei le faatoilalo aiga) – poo e faamata e aofia ai foi ma le faaitu'au o faaiuga fai a le *Matai Sa'o* e na'o lona aiga ae faatuatuana'i ma le amanaia manatu o le aiga atoa.
- Na fautua mai foi i latou e faapea 'o le le faatinoina o tiute o se *matai* i sona tulaga lelei'e tatau ona faamanino atili i totonu o le tulafono ma ia tuu iai ni faataitaiga talafeagai o tiute o se *matai* ona e le tutusa uma tiute i totonu o aiga taitasi.

111. Mo le aveesea o se suafa *matai* ona ua solitulafono i se soligatulafono ogaoga ma faasalaina i le olaga atoa i le falepuipui, ua manatu le toatele o le mamalu o le atunuu e tatau ona faalautele ina ia aofia uma ai ma isi soligatulafono ogaoga (ae le na o soligatulafono e faasalaina faa-falepuipui). O nisi sa fautua mai e tatau ona faamanino atu ai ma se lisi o soligatulafono e patino mo le aveesea o se suafa. E tusa ai o nei mafuaaga, o nisi sa fautua mai e tatau lava ona aveesea se suafa mai se *Matai Sa'o* i le taimi lava ua faamaonia ai i se soligatulafono ogaoga (e pei o le soligatulafono i faiga aiga) nai lo le faatali i se malelega mai le *Sa'o* poo se *Suli* e pei ona tuuina mai i le tulafono o loo iai nei.

O agavaa faaopoopo e tatau ona aofia i totonu o lea aiaiga

112. O le toatele o manatu sa faapea mai o agavaa ua tuuina atu i lalo e tatau ona faatulafonoina ma aofia ai ma ni faataitaiga o se suafa o se *Matai Sa'o* ua aveesea e tusa ai ma se malelega poo se talosaga aloaia mai i se *Sa'o* poo se *Suli*:

- pe afai o loo faatumauina pea le soona faaaoga le tatau o le pule a se *Matai Sa'o*. Sa tuuina mai se fautuaga e faapea e tatau ona aofia i totonu o le tulafono se faataitaiga ina ia limataitaia ai le faamasinoga, mo se faataitaiga o le le pulea lelei o fanua o le aiga.
- pe afai o le *Matai Sa'oe* aumau tumau i atunuu mamao.
- pe afai e 'au ese le *Matai Sa'oi* manatu o le aiga ua autasi i se sui o le aiga o le a faaeeina atu ai se suafa *Matai* .

- pe afai o se *Matai Sa'oua* faamaonia e le atoatoa le malosi o le tino ma le mafaukau.

113. E itiiti lava i latou na faapea mai e le tatau ona aiāina e le Malo lea tulaga ona o loo iai tulafono faatonutonu a le Fono a Nuu, ma o le matafaioi lava a le aiga le talanoaina lava e i latou se faaiuga mo le aveesea o se suafa *Matai*. O nisi sa faapea mai o loo mautu le tulafono o loo iai nei ma e le manaomia le toe iloilo.

Aveesea e le Fono a Nuu

114. O manatu na tuuina mai e faasino i le matafaioi a le fono a nuu i le aveesea o se *Matai Sa'o*, o le faamalosi lea o le fono a nuu ina ia faasala pe faatula'i'ese pe mu le foaga o se *Matai Sa'o*, ona ua le usitaia tulafono faavae ma tulafono faatonutonu a le nuu.

Aveesea o se matai e le oi totonu o Samoa

115. Na tuuina mai ni manatu e faapea e tatau ona iai se aiaiga i le tulafono e mafai ai e soo se sui o le aiga i luga o se talosaga ona aveesea se suafa mai se *matai* o loo toesea ma Samoa mo se taimi umi. O loo mulimulitai lenei manatu i le tulaga o loo iai Amerika Samoa, lea e aveesea pe afai ua silia ma se tausaga ona to'esea.

Manatu o le Komisi

116. Ua matua'i faamamafa atu e le Komisi e faapea, o le malosiaga mo le aveesea o se *matai* poo se *Matai Sa'o* e tatau ona faatumauina pea i le aiga latou, ma e tatau i aiga ona taumafai e soalaupule a latou faafitauli ma feeseeseaiga i le latou vai tua, ae le i faao'oina atu i le faamasinoga.

117. Ua matauina e le Komisi manatu na tuuina mai ma o loo mamafa lava i le aiaiga o loo iai nei i le tulafono (*Tulafono o Fanua ma Suafa vaega 20B*) mo le aveesea o matai ina ia faamanino atili. O le tele o faagaulemalie o loo faamatala mai ai le le malilie i le aiaiga o loo iai nei mo le aveesea o suafa matai. Sa tuualalo mai e faapea, o le aiaiga e le o manino ma o le mafuaaga lea ua le malamalama ai, mo se faataitaiga poo a tulafa e faailoa mai ai ua faatino se amioga e faatoilalo ai le aiga. Ua atagia mai i manatu e faapea, o le faamatalaga o le uiga o le upu 'faatoilalo' e eseese ona faauigaga ma e le o manino lelei ai le atunuu lautele faapea le faamasinoga. I le tali i lenei faafitauli na tuuina mai ai manatu e tatau i le tulafono ona aofia ai ni faataitaiga o mea moni o loo tutupu e faasino i se *Matai Sa'oua* aveesea ona ua faatoilalo ai le aiga, ae peitai e le tatau ona faatapulaa e nao faataitaiga ua fautua atu.

118. Na faamamafa mai foi e le atunuu lautele le manaoga ina ia faaopoopo mafuaaga mo le aveesea. O nisi o fautuaga e faasino i *Matai Sa'oi* faaiuga fai e faasino i fanua ma meatotino a le aiga e aunoa ma se talanoaga na faautaitaia, o le faatumauina o le soona faaoga le tatau o le pule a Matai Sa'o ma faaitu'au ai, poo se Matai Sa'o ua ia faaeina atu suafa matai e aunoa ma se maliega autasi a le aiga. Ua faamauina e le

Komisi i ana fautuaga ina ia aofia i matafaioi se manaoga ina ia faatalanoa mataupu ma se fautuaga o le le usitaia o tiute ma matafaioi o le Matai Sa’o e avea ma se mafuaaga e aveesea ai.

119. O le isi mafuaaga faaopoopo na tuuina mai e aofia ai le Matai Sa’o ua le mafai ona faaauau le tauaveina o ona tiute ona o le le atoatoa o le malosia o le mafaufau. O loo manino le Komisi o se tasi lenei o faaiuga e talafeagai ona faatino e le aiga. Ae peitai, ua manatu le Komisi o lenei aiaiga e faaono faatumauina pea lona aoga i mafuaaga e pei o le tetee a le Matai Sa’o i se faaiuga ma faaono feteena’i ai le aiga ona o le le atoatoa o le mafaufau. Ua fautua atu le Komisi mo le limataitaia o le Faamasinoga i ana suesuega i ala i se mataupu ona o lea feteenaiga, e tatau ona tuuina mai se faamaoniga mai se tagata suesue faapitoa, mo se faataitaiga o se foma’i.
120. O le tele o manatu na tuuina mai i le Komisi o loo atagia mai ai le manaoga ina ia faamatala auiliili atu i le tulafono mafuaaga mo le aveesea o se Matai Sa’o e ese ma ii mafuaaga o loo faasino i matai. Ua manatu le Komisi e onomea ma talafeagai se aiaiga fou faaopoopo poo le faalautele foi o le aiaiga 20B o le Tulafono ina ia aofia ai aiaiga e patino tonu lava mo le aveesea o se Matai Sa’o.
121. Sa talanoaina e le Komisi i le Vaega 4A o lenei Ripoti agavaa e manaomia. O lea Vaega o loo fautua atu ai le Komisi e tatau ona faatulaga atu i le tulafono tulaga manaomia mo le nofo mau, ma e tatau i le Resitala ona faamautinoa ua faamalieina tulaga manaomia o se tagata mo le nofo mau ua filifili ao le i resitalaina le tofiga Matai Sa’o. O le matafaioi lea a le Matai Sa’o ina ia tuuina mai faamaoniga e pei o le pepa faamaonia o tautoga, poo le auiliili atu o mafuaaga ua ausia ai le aiaiga mo le faaeeina atu (poo nisi aiaiga pe afai o nisi o aiaiga ua ma’ea ona faatulafonoina). Ua manatu le Komisi e tatau ona iai se avanoa faaetutulafono mo aiga ua aafia i ituaiga matupu faapenei.
122. Ua manatu le Komisi e faapea, e faaopoopo atu i le faalauteleina o mafuaaga mo le aveesea, e fesoasoani tele i le Faamasinoga le iloilo o mataupu ma talosaga ua tuuina atu mo le aveesea o se Matai Sa’o. O le sini autu o le tuuina atu o nei mataupu e fesoasoani tele i le faamasinoga i le iloiloina pe faamata o se talosaga na tuuina mo le aveesea ua faamalieina ona itu uma. E tatau ona tagofia ma le faaeteete nei aiaiga ina nei faatapulaa ai le malosia o le faamasinoga, ma e le tatau foi ona gata iloiloga a le faamasinoga i na’o mataupu ua ta’ua i lalo. O faataitaiga o nei mataupu e aofia ai:
- le mafuaaga tonu ua le usitaia ai le faatinoga o tiute (ma pe faamata o le le faatinoina o tiute o se tulaga e faa-tasi ona tupu poo se mafuaaga ua masani a’i);
 - o le ogaoga o le faatinoga ua atagia;
 - pe faamata o nei faatinoga e aofia ai ma se soligatulafono;
 - o le tele o le aafiaga poo se faafitauli mai lea faatinoga le talafeagai;
 - pe faamata na faia se faatinoga a le Matai Sa’o ina ia soalaupule ma sui o le aiga ua aafia;

- o le talaaga o le olaga tautua i le aiga i le taimi muamua; poo
- soo se isi lava mataupu ua silafia e le Faamasinoga ua talafeagai.

123. Ua manatu foi le Komisi e iai mafuaaga manino ma malamalama e tatau ona faatulaga atu i le tulafono e pei o le molia o se Matai Sa’o ona o se soligatulafono. Ua manatu foi le toatele, o le aiaiga o loo iai nei e fai sina papa’u i lona faatulagaga ona e na o soligatulafono e faasalaina faa-falepuipui mo le olaga atoa o loo iai. O loo ‘au le Komisi i lea manatu ma e tatau ona foi ona aofia i totonu o le tulafono se aiaiga mo le aveesea i le taimi lava ua faamaonia ai sona moliaga i se soligatulafono ogaoga e aofia ai le fai aiga fai faamalosi, fasioti tagata poo nisi moliaga faapea i totonu o Samoa poo se isi atunuu. I lalo o lea aiaiga, o se Sa’o ua faamaonia i nei soligatulafono e tatau lava ona aveesea. E tatau i le tulafono ona faatulaga manino mai ai poo a ‘soligatulafono ogaoga’. E faaopoopo atu e tatau ona toe teuteu le vaega 22(3) o le tulafono e faaono mafai ai e le Resitala ona aveesea se suafa Matai Sa’o mai le resitala pe afai ua faamaonia o lea tagata o loo molia i se ‘soligatulafono ogaoga’.

124. Ua manatu le Komisi o mafuaaga e tatau ona iloilo e le Faamasinoga mo le aveesea e tatau ona aofia ai moliaga o soligatulafono mamā pe a faatusa atu i le aveesea vave o se suafa ona o se soligatulafono ogaoga, ae peitai e tatau lava ona iloilo e le faamasinoga e ogaoga. Ua manatu le Komisi mo soligatulafono mamā e aafia ai, e tatau ona faia e le aiga se faaiuga mo le aveesea nai lo le aveesea i le taimi e molia ai.

125. Ua manatu ai le Komisi e faapea o manatu ua tuuina atu i luga e tatau ona atagia, pe a manaomia, se aiaiga mo le aveesea o matai i sona tulaga lautele.

Fautuaga

15. O le pule poo le malosiaga mo le aveesea o se matai poo se Matai Sa’o e tatau ona faatinoina e le aiga, ma e tatau ona soalaupule ni feeseese’aiga i tua ao lei tuuina atu i le faamasinoga.

16. E tatau i le tulafono ona iai se aiaiga fou poo le faaopoopo atu i le aiaiga o loo iai nei (vaega 20B o le Tulafono) ina ia aofia ai aiaiga mo le aveesea o le *Matai Sa’o*.

17. E tatau ona iai i le tulafono e faaono mafai ona tuuina atu se poloaiga a le Faamasinoga mo le aveesea o se suafa Matai Sa’o ona o mafuaaga ua ta’ua i lalo, e fua agai i le talosaga na tuuina atu:

- Leai se faatinoga lelei o tiute ma matafaioi a le Matai Sa’o e tusa ai o le tulafono;
- Faia o se faatinoga e faatoilalo ai le aiga;
- Ua le mafai ona faaauau le faatinoina o tiute ona ua le atoatoa le malosia o le mafaufau e tusa ai o se faamaoniga mai se fomai suesue faapitoa;

- O le tuuina atu ma le iloa o faamatalaga sese i le Resitala e tusa ai o agavaa ma mafuaaga ua ausia mo se resitalaga o se suafa Matai Sa’o (pe afai o loo faatulaga atu i le tulafono agavaa e mafai ai ona faapaleina);
- Moliaga i se soligatulafono. E tatau i le tulafono ona auiliili pe faamanino poo a ituaiga ‘soligatulafono’ e aofia ai ma e le talafeagai ona aofia ai soligatulafono laiti e pei o soligatulafono tau taavale.

18. E tatau i le Faamasinoga ona vaavaai i tulaga ua ta’ua i lalo i le taimi e faatino ai se suesuega mo le aveesea o se *Matai Sa’o*:

- le mafuaaga tonu ua le usitaia ai le faatinoga o tiute (ma pe faamata o le le faatinoina o tiute o se tulaga e faa-tasi ona tupu poo se mafuaaga ua masani a’i);
- o le ogaoga o le faatinoga ua atagia;
- pe faamata o nei faatinoga e aofia ai ma se soligatulafono;
- o le tele o le aafiaga poo se faafitauli mai lea faatinoga le talafeagai;
- pe faamata na faia se faatinoga a le Matai Sa’o ina ia soalaupule ma sui o le aiga ua aafia;
- o le talaaga o le olaga tautua i le aiga i le taimi muamua; poo
- soo se isi lava mataupu ua silafia e le Faamasinoga ua talafeagai.

19. E tatau ona aofia i le tulafono e faaono mafai ona aveesea e le Resitala se Matai Sa’o mai le resitala pe afai o ia lea ua molia i se soligatulafono ogaoga, ma ua faasalaina mo le olaga atoa i le falepuipui, lea e aofia ai le fasioti tagata, fasioti tagata pa’i valea, fai aiga fai faamalosi ma isi. O isi soligatulafono tau faiga aiga ogaoga e pei o le mataifale e tatau ona faatulaga atu o se soligatulafono ogaoga. O le tulafono e tatau ona auiliili manino atu ai poo a soligatulafono e aofia i ‘soligatulafono ogaoga’. O lea tulaga e manaomia ai le toe teuteu o le vaega 22(3) ina ia mafai ona aveesea mai e le Resitala se suafa Matai Sa’o mai le resitala pe afai ua faamaonia e le Resitala o ia lea ua molia i se ‘soligatulafono ogaoga’.

20. E tatau i le tulafono ona atagia mai ai suiga ua ta’ua i luga, pe afai ua talafeagai, i le aiaiga o loo iai nei i le tulafono (vaega 20B o le Tulafono) mo le aveesea o se matai (toe teuteu pe a talafeagai).

D. Toatele Sa’o ma Matai

126. O se tasi lenei o faafitauli matuia sa alia’e mai i taimi o faatalanoaga, o le iai o Sa’o poo matai e toatele i totonu o se aiga e tasi, ma le tele o faafitauli ma feeseeseaiga i totonu o aiga lea e faai’u ai lava i le tuuina atu i le Faamasinoga.

127. E tusa ai o suesuega a le Komisi sa faatautaia, e lua ituaiga vaega ua faavasega iai matai. Lea e aofia ai *matai filifilia* ma *matai tofia*. O le *matai filifilia* o le Matai Sa’o. *omatai tofia* o suli ia e filifilia e le Sa’o e fesoasoani ia te ia i le faatinoga ma le

tauaveina o ona tiute ma matafaioi faa-Sa'o. E iai le talitonuga o loo iai o se Matai Filifilia o ia lea ua autasi iai e filifilia e avea ma Matai Sa'o e tusa ai o tu ma agaifanua.

Mafuaaga mo le tofia o Matai Sa'o e toatele

128. O le to'atele oi latou ua faaeeina atu iai se suafa matai se tasi e pei ona iai faatinoga ua atagia mai i nei taimi, o se tasi lea o mafuaaga ua toatele ai foi Matai Sa'o e tofia i totonu o aiga. O lea tulaga e pei o se faiga faataamilo ona o le tele foi o Sa'o i totonu o se aiga, o le mafuaaga foi lea ua afua ai le tele o tagata e faaeeina atu ai se suafa matai se tasi.
129. O se tasi o folasaga sa faatautaia i le Konoferenisi o Measina lona 7 a le Iunivesite Aoao o Samoa sa atagia mai ai nisi o mafuaaga o le toatele o matai ua tofia e avea ma Sa'o. O se tasi o mafuaaga ona o le pule aoatetele a suli moni e umia se suafa Sa'o, e filifilia ai se Matai Sa'o. I lea malosiaga ua pule ai lava suli o le aiga i le filifiliga pe to'afia Matai Sa'o i totonu o le aiga. Sa faamatala mai foi i lea folasaga ua telē le malamalama o suli ma ua lava le tomai tau aoaoga ua silafia ā latou aiāfaapea le pule ma malosiaga e umia e se Sa'o, ma i le taimi nei ua toatele suli ua fiapa'i-i-vai o le tama ma mananao e filifilia e avea ma Sa'o.
130. O le isi mafuaaga na tuuina mai ona o nisi o taimi e faia ai se faaiuga a le Faamasinoga e vaevae aiga i vaega o le *fa'aitupaepae o suafa, fa'afuafalesuafa, fa'afaletamasuafa, fa'amavaevaefilifiligae* tusa ai o talosaga e tuuina atu e suli. O lea tulaga o le a mafai ai loa e nei vaega taitasi ona tofia a latou Sa'o e fua lava i le latou manaoga.
131. O le tofia o Matai Sa'o e fua agai le tele o le tamaoiga, ma le tele o le fesoasoani tau seleni i mea fai a le aiga o se tasi lea o mafuaaga.
132. E tusa ai o lea tulaga, sa atagia mai ai foi o suli o loo aumau i atunuu e mamao e iai taimi e manana'o ai i ni suafa Sa'o ina ia mafai ai ona fesoasoani ma faatumauina o latou gafa i aiga. Ae peitai, e iai foi taimi e talosaga mai ai mo se isi Sa'o e aumau i Samoa ina ia tauave ma faatino tiute ma matafaioi ona o le Sa'o o loo aumau i fafo e le mafai ona faatino lea tulaga.
133. O le isi mafuaaga ma faiga ua masani ai i le taimi nei mo le tofia o matai Sa'o e toatele ona ua faatupulaia ma siitia le numera o aiga i totonu o Samoa, ma o le iai o le Matai Sa'o e tasi e le gafatia ona o le a le mafai ona tauave ona tiute ma matafaioi ma i'u ai i le le faamalieina o le tupu ma ola ai le aiga. O nisi o tulaga faapenei e faatagaina e le faamasinoga le tofia o se numera o Matai Sa'o pe afai o lea faiga o se auala o le a mafai ona fo'ia ai faafitauli ma feeseeseaiga.

Aafiaga o le iai o Matai Sa’o e toatele

134. O le faaeeina atu o suafa Matai Sa’o e tele ua afua ai le tele o faafitauli ua aafia ai aiga ma le aganuu. O le faafitauli ua alia’e so’o mai i le taimi nei o le toatele o Matai Sa’o ua alia’e mai ai le tele o le feteenaiga ma faafitauli i le va o Sa’o aemaise lava i le faasoasoani ma le umiaina o meatotino ma punaoa a le aiga. Mo se faataitaiga, o se Sa’o ua finauina e tatau ona ia te ia le pule toatasi i se fanua o se aiga ona sa ia galue malosi i luga o lea fanua ma pa’u ai lona afu pe a faatusa i le isi Matai Sa’o.
135. E tusa ai o suesuega sa faatautaia e le Komisi ua atagia ai o le faafitauli taatele ua alia’e mai i le iai o Matai Sa’o e toatele e faasino lea i faaiuga fai (mo se faataitaiga o le lisiina o fanua tau Samoa poo fanua o le aiga) ona o le tete’e a se matai poo ni Matai Sa’o. O le Matai Sa’o o loo tete’e e faaono puipua lea faaiuga ona o loo iai lana aiā tutusa, pule ma le malosiaga tutusa ma le isi Matai Sa’o i luga o se fanua. Mo se faataitaiga, o suli o loo lagolagoina le faaiuga e latou te tuuina atu se mataupu i le faamasinoga, ae peitai e amanaia e le faamasinoga le aia a le o loo tete’e i sea faaiuga – ona o loo amanaia tutusa e le Faamasinoga isi Matai Sa’o uma, e tusa lava pe to’afia, po o le a foi le umi na umia ai se suafa Sa’o. E le mulimulitaia e le Faamasinoga le talitonuga o loo iai nei i le faa-Samoa “*e fa’alogomulimaiiamuamai*”.
136. E faaopoopo atu, o le tele o Matai Sa’o ua tele ina faa’itu’au ai i nisi o sui o le aiga ma avea ma se tulaga e aafia le va lelei ma le nofo lelei i totonu o le aiga potopoto ma le Sa’o. Mo se faataitaiga, ua iai mataupu ua ripotia atu e faapea:
- ua faae’eina atu e le Matai Sa’o suafa matai i ona alo, e aunoa ma se silafia e le aiga potopoto;
 - ua filifilia se tasi o ona alo e avea ma Sa’o o le a soso’o ai e aunoa ma se amanaia o le tautua mai aiga i le taimi a’o soifua le Matai Sa’o; poo
 - ua faia faaiuga i mataupu e aafia ai le aiga atoa ona ua faaitu’au i le Sa’o ma ona alo poo tagata e patino i le Sa’o.
137. I aso nei, e ui lava i le toatele o Matai Sa’o ua filifilia i totonu o aiga, o faia ua masani ai e iai lava le matai sa’o e toatasi e tofia e fai ma sui o le aiga i totonu o fononuu (poo le faaaloaloga poo le aliimatua). O le *Faaaloaloga* o loo atagia ai faiga sa iai ona e toatasi lava le Matai Sa’o e tofia e fai ma sui o le aiga, ae peitai e fesiligia foi le faaaloaloga i totonu o le Faamasinoga.

Mafuaaga o le Toatele o Matai

138. E pei ona ta’ua muamua o le toatele o suafa matai e faaeeina atu o se faiga ua taatele i nei aso, ma e faaono agavaa ai mo le filifilia o le toatele o Sa’o i totonu o aiga. E pei ona faamauina e le Alii Palemia, o le mafuaaga tonu lea ua afua ai le toatele o matai ua faaeeina iai suafa i le tele o vaega o le atunuu.

139. O le toatele o le mamalu o le atunuu sa faapea mai o nisi o mafuaaga o le tofia o matai e toatele ina ia faaitiitia ai le tau mo le sauniga, o nisi e faa-toafilemu ai vaega eseese i totonu o aiga.

140. O i latou e faaono faaeeina atu iai suafa matai e le faatapulaaina e na'o suli. O suafa matai e faaono faaeeina atu i suli poo suafa ulufatu ma e faaono mafai foi ona faaeeina atu i ai latou e ese atu mai fafo ua loa le tautua i totonu o le aiga poo le suafa igagato. E iai taimi e faaeeina atu ai suafa matai iai latou e le'i tautua ae o loo iai se tamaoaiga. O le toatele o le mamalu o le atunuu sa faatalanoaina sa faapea mai o le faaiuga mo le faaeeina atu o suafa matai ona o loo mauoloa ma faatamaoaigaina ai le Matai Sa'o. Mo se faataitaiga, e faatoa faaeeina atu se suafa matai pe afai ua ma'ea ona tuuina atu i le Matai Sa'o se seleni(\$1000) ae le'e o le tautua i le aiga. Ae peitai, a faapea ua fai se faaiuga a le Matai Sa'o e faaee atu ni suafa matai pe tusa ma le 50, o le a maua le \$50,000 ma e faaono le'vaevaeina tutusa leni seleni i le aiga.

Aafiaga o le iai o Matai Sa'o e toatele

141. Sa folasia mai e le Alii Palemia i sana folasaga faalauaitetele o le tele o suafa matai e faaeeina atu ua avea ma tulaga ua faaitiitia ai le mamalu ma le taua o se suafa. O se faataitaiga e faasino i aiga ua toatele Matai Sa'o, ma o nei Matai Sa'o ua faaeeina atu le tele o suafa matai.

142. O le toatele o matai ua faatupulaia ai le tele o feeseeseaiga ma feteenaiga i le va o sui o aiga, poo le va o aiga ma Sa'o, poo le va o Sa'o nei e toatele i totonu o le aiga. I le pepa sa folasia i e Koneferenisi lona 7 a le Measina, sa ripotia mai ai o le tele o feteenaiga e i le va o suli suafa ulufatu ma suli suafa igagato. O sui o le aiga ua faaeeina atu iai suafa matai ua latou luiina ma fesiligia le umiaina ma le pule a le Matai Sa'o ma ua afua ai feteenaiga ma feeseeseaiga.

143. O le tulaga ua afua ai foi le tele o luitau i se maliega autasi poo ai le isi Sa'o o le aiga o le a sosoo pe afai ua ma'ea ona tofia se Matai Sa'o fou. O le mafuaaga o lea tulaga ona o nei Matai Sa'o (pe afai e sili atu ma le tasi se Matai Sa'o i le aiga) e fia pa'i lava e fai sona sao i faaiuga fai ma fai ma sui o le aiga.

Amerika Samoa ma le resitalaga o se suafa matai e 'tasi'

144. O tulafono a Amerika Samoa o loo atagia mai ai "e le mafai ona silia ma se tasi se suafa matai e resitala i le taimi e tasi". Ae peitai, a faapea o se tagata e toatasi sa faaeeina atu iai suafa matai e lua, e na o le tasi lava e amanaia. O se suafa e faaeeina atu e le tusa ai o le tulafono e le mafai ona resitalaina, e tusa lava pe aoga (o le faaogaina o se suafa matai e lei resitalaina) o se soligatulafono.

145. Ua fautua mai e faapea o le 'aiaiga mo le tasi o le suafa matai' i tulafono a Amerika Samoa ua avea ma tulaga e fesoasoani mo le atina'ega o aiga aemaise o se faiga ua mafai ona ola ma soifua ai aiga e aunoa ma le tele o suafa matai. Ua atagia mai ai foi e

faapea o lenei aiaiga ua mafai ai ona tuufaatasia aiga i lalo o se pulega e tasi ona sea matai ua resitalaina ua ia te ia le pule ma le matafaioi e ta'ita'ia ai le aiga.

Manatu na tuuina mai

146. I totonu o le Pepa o Talanoaga, sa manaomia ai e le Komisi ni manatu e tuuina mai mo mafuaaga ua ta'ua i lalo:

- *A faapea o le a silia ma le tasi se Sa'o i totonu o se aiga, e faapefea ona ausia se faaiuga autasi? Faamata e tatau i le Sa'o ua loa lana tautua ona faia faaiuga?*
- *Faamata e tatau ona toatasi le Sa'o e tatau ona tofia?*
- *Faamata e faapefea ona faaitiitia feteenaiga e aliae mai i va o Matai Sa'o e toatele? Faamata e tatau ona faatulaga atu lea tulaga i le tulafono?*
- *Afai o le a silia ma le toatasi se tagata ua faaeina atu iai se suafa matai se tasi (mo se faataitaiga pe afai e sili ma le 50 tagata) faamata e faapefea ona aliae mai ai faafitauli i totonu o aiga? E faapefea pe afai e iai ni vaega e tatau ona tilotilo mo le aofia i le tulafono ina ia faaitiitia ai faafitauli ma feteenaiga?*

Taunuuga mo se maliega autasi ma le tagata e tatau ona faia le faaiuga mulimuli

147. O le tele o manatu na tuuina mai o loo 'au i le manatu o le toatele o Sa'o ua fai ma luitau pe a taunuu i se maliega autasi. O nisi oi latou na faapea mai o se maliega autasi e tatau ona tuu le faaaloalo i le Matai Sa'o ua loa lana tautua (tausaga na ia umia ai le suafa) e faia se faaiuga mulimuli e pei ona iai faatinoga i le taimi nei mo faaaloaloga. O lea tulaga e fesootai ma le aganuu faa-Samoa lea e tatau ai ona ave le faaaloalo, faamuamua ma le ava fatafata i sui matutua o le aiga poo se faalapotopotoga. Ae peitai, o le toatele oi latou matutua e umia se suafa matai o le tele foi lea o le pule e faia ai faaiuga pe a faatusa i le au laiti o loo umia suafa.

148. Na tuuina mai foi e nisi o sui o le atunuu e tatau foi ona ave le faamuamua i le Matai Sa'o ua loa lana tautua e fai ma sui o le aiga i totonu o le Fono a Nuu. Na tuuina mai foi e faapea e tatau i le Faamsinoga ona ave le faamuamua iai latou matutua o loo umia se suafa nai lo le ave o le aia tutusa i ai latou uma o loo umia suafa e fua agai i lana aia tatau. Na faamamafa mai foi e le toatele afai o le a ave le faamuamua i le tagata matua o loo umia se suafa matai e fai ma sui o le aiga potopoto i le fono a nuu, e tatau i lea tagata ona atoatoa lelei le malosi o le tino ma le mafaufau e fai ai ma sui o le aiga.

149. Na fautua mai Polofesa AsofouSo'o e faapea, o mataupu tau fanua ma suafa ppo sui o le aiga i Samoa nei ua faasea ma le malie mai ai le Matai Sa'o o loo aumau i atunuu i fafo, e tatau i le faamasinoga ona ave le faamuamua i ai latou o loo umia suafa iinei i Samoa.

150. O nisi sa fautua mai i se isi faiga mo le faafesoaaiga lelei ina ia fesuisuia'i matai sa'o nei e toatele e fai ma sui o le aiga i fonu a nuu.

Toatasi poo le silia ma le toatasi se Matai Sa'o?

151. O le toatele o le mamalu o le atunuu sa faatalanoaina o loo lagolago i le faatulafonoina o le toatasi o le Matai Sa'o i totonu o se aiga, ona o le toatele o Matai Sa'o o le tele foi lea o feeseeseaiga ma faafitauli e aliaie mai i totonu o aiga.

152. O nisi sa faaali le le malilie i le toatasi o le Matai Sa'o i le aiga ona e le o gatasi ma faatinoga o loo iai nei, ona ua faatupulaia le numera o tagata i totonu o aiga Samoa ma o loo salalau solo sui o aiga i totonu o Samoa ma fafo atu, ma o le ala lea o le talafeagai o le iai o le Matai Sa'o e toatasi ona e le mafai ona ia tauaveina ona tiute faa Sa'o i se tulaga lelei ona o le toatele o tagata ma le faatupulaia o le numera o aiga.

153. O nisi sa fautua mai e tatau i le Malo ona filifili e faatapulaa le numera o Matai Sao i totonu o le tulafono, pe tusa ma le 3 tagata e faasuafaina. E lagolagoina lea manatu i se fautuaga na tuuina mai i le ripoti a le Komisi Suesue na fautua mai ai mo se auala e fesoasoani ina ia le toe tutupu ai faafitauli e tatau ona e na'o le 5 Matai Sao i totonu o se aiga i se taimi e tasi.

154. Na auiliili mai foi e Polofesa So'o o le tulaga o loo iai Amerika Samoa poo le iai o se Matai Sa'o e tasi e faaono talafeagai mo Samoa ina ia faaititia ai le soona faaoga le tatau o le pule e umia e le Matai Sa'o. Ae peitai, o le famamafa e tatau lava ona faatumauina le faatinoga o loo iai nei o le iai o Matai Sa'o e toatele mo Samoa. O lona taofi e faasino lea i le faafitauli o le iai o Matai Sa'o e tasi ona o lea Sa'o o le Sa'o o le 'aigapotopoto' ma afai o lea tagata e le faaaloaloga ma le lagolagoina e sui ole aigapotopoto, o le a faaono tutupu mai ai le tele o faafitauli faapea le aafiaga i le nofo lelei i totonu o aiga.

155. O nisi o sui o le atunuu na matuai le lagolagoina le aiaina e le Malo o mataupu faaleaganuu ma faafitauli i totonu o aiga, ona o le talitonuga o nei tulaga e soalaupule lava i totonu o aiga. E tele le popolega ona o le faatulafonoina o lea mataupu o le a faalavelavea ai aia a aiga e filifilia ai a latou Matai Sa'o faapea le manaoga e filifilia le silia ma le toatasi se Matai Sa'o. Sa fautua mai ai e faapea e tatau ona faatagaina pea le iai o matai Sa'o e toatele ae mo le tulafono ina ia faamnino mai e tuu lava le faitalia i aiga e filifilia ma tofia ai a latou Matai Sa'o e fai ma sui o aiga i totonu o mea fai a le nuu ma fonu a nuu. O nisi o fautuaga na tuina mai ina ia fesoasoani i faaiuga fai a le aiga e tatau ona aofia ai le matua o le soifua, ma le umi na tautua ai i le aiga ma le afioaga. I lea tulaga o le a faatumauina ai pea le faitalia ma le aia o le aiga e filifilia ai a latou Matai Sa'o.

Matai e toatele

156. Na tuuina mai manatu e faapea o le iai o matai e toatele pe a faatusa atu i le iai o Matai Sa’o e toatele ua avea ma tulaga o le tele o feeseeseaiga i totonu o aiga. O se tasi o faafitauli o luitau e faasino i le faiga o faaiuga ma se maliega autasi i se Sa’o o le a sosoo le umiaina o le suafa Sa’o. E tusa lava o le iai o nei faafitauli o le iai o matai e toatele, sa faamamafa mai e faapea o le filifilia o matai o le matafaioi lea a le Matai Sa’o ma o lea tagata e iai le pule e filifilia ai le toatele o matai ua ia manatu e talafeagai e fesoasoani i le Matai Sa’o. Ina ia faaitiitia faafitauli o le toatele o matai, e tataui i le Matai Sa’o ona iai ni mafuaaga patino e fua iai le filifilia o matai fou.

157. Ua matauina e le Komisi le lavelave o nei faafitauli ona e eseese lava aiga ma a latou faatinoga i le filifilia o a latou Sa’o faapea agavaa ma mafuaaga e tataui ona ausia mo nei tofiga.

Manatu o le Komisi

Sa’o e toatele

158. I faatalatalanoaga faalauaitele ma manatu na tuuina mai sa atagia mai ai le eseese o mafuaaga mo le tofia o Sa’o e toatele ona o le faatinoga faaleaganuu sa masani a’i. O nisi o nei mafuaaga e aofia ai:

- Ua faatupulaia le numera o tagata i totonu aiga Samoa pe a faatusa atu i aso anamua ma o loo salalau solo nei tagata i totonu o le atunuu, ma e talafeagai le tofia o Sa’o e sili atu ma le tasi ina ia faamautinoa o loo tagofia ma le faaeteete mataupu e aafia ai le aiga, aemaise o le tausia lelei o measina a le aiga. O le toatele o tagata o le aiga ua iai nisi mafuaaga ua le malosia ai le pule a le Sa’o i le aiga e patino lava pe afai e iai itupaepae eseese ua tofia i totonu o aiga.
- O le malosiaaga aoaotetele a suli e filifilia ai le numera o Sa’o e mananao ai, e iai taimi e filifilia ai i latou e faaitu’au iai.
- Ua toatele matai ua fia pa’i i le Suafa Sa’o ona e manao e faatupulaia le pule ma le malosia e pulea ai fanua ma suafa o le aiga.
- O faaiuga a le Faamasinoga ua vaevae ai aiga i itupaepae ma o nei itupaepae ua filifili e i latou le numera o a latou Sa’o ua manatu e talafeagai.
- Tamaoaiga faaletagata o le ua filifilia.

159. O faafitauli ua tutupu soo mai mo le filifilia o Sa’o e toatele sa atagia mai i le tiami o faatalanoaga faalauaitele e aofia ai:

- Faafitauli poo feteenaiga i le tufatufaina ma le umiaina o meatotino a le aiga ma punaoa ma le faaeina atu o suafa matai. O nei mafuaaga e faasino i faagaulemalie ona o le leai o se talanoaga na faatino poo le faaitu’au o le Matai Sa’o i nisi o sui o le aiga;

- Lisiina o fanua faaleaganuu o le aiga – e manasi lava ona amanaia e le Faamasinoga le aia a se matai o loo tetee mo le lisiina o se fanua e tusa lava pe toatele nisi o Sa’o ua malilie autasi iai;
- O le toatele o Matai Sa’o ua filifilia ai foi ma le toatele o matai ua faaopoopo atu i le lavelave ma le faatupulaia o le faafaigata o le iai o se maliega.

160. O le toatele o manatu o le atunuu na faatalanoaina faapea manatu na tuuina mai o loo lagolagoina le iai o Matai Sa’o e toatele i totonu o aiga e pei ona iai faatinoga i le taimi nei. Ae peitai, o loo ave la latou faamamafa ina ia faatulafonoina ni tapulaa poo si taiala e faaitiitia ai faafitauli e alia’e mai ai.

Matai Sa’o ina ia ausia Manaoga mo le Ausia ma mafai ai ona Faapaleina e avea ma Sa’o

161. Ua manatu le Komisi e faapea o le faatulafonoina o agavaa mo le filifilia o Sa’o (e pei ona iai le Fautuaga 1) o le a fesoasoani i le faaitiitia o nisi o faafitauli e faasio i le Matai Sa’o, e tusa lava pe na faia pe le’i faia foi ni toe teuteuga e manaomia ai le toatasi o le Matai Sa’o mo se aiga, poo le faaauau foi o le faatinoga o loo iai nei mo le toatele o aiga o loo iai a latou Matai Sa’o e toatele.

162. Ua matauina foi e le Komisi e faapea, e eseese lava aiga taitasi ma a latou tu ma agaifanua, ma e avea ma luitau i le taumafai e fausia se fautuaga e fo’ia ai nei popolega. I lea tulaga ua tuuina atu ai e le Komisi ni Vaega mo le Toefuataiga mo le Malo ina ia tagataga’i iai.

163. O nei vaega e aofia ai le faatumauiina pea o le iai o Matai Sa’o e toatele poo le suia o lea faatinoga ina ia tasi le Matai Sa’o. I lalo nei vaega taitasi, ua tuuina atu ai e le Komisi nisi mafuaaga faaopoopo mo le Malo e talanoaina, ina ia taumafai e faaititia ai le numera o faafitauli e alia’e mai i le toatele o Sa’o faapea foi le faaitiitia o le soona faaogaletatau o le pule pe afai e nao le toatasi le Sa’o. E fua agai i le vaega o le a mafuli iai lagona ma faaogaina, o nisi e tatau ona faatulafonoina a’o nisi e tatau ona tuu atu i le faitalia a le aiga e filifilia ma faia iai faaiuga.

VAEGA 1: Faaauau pea ma faataga le iai o Sa’oe toatele

164. Muamua, e toe faamamafa atu e le Komisi, o le pule ma le malosiaga mo le tofia o Sa’o e toatele e tatau ona tuu i le faitalia a le aiga, e fua agai i a latou tu ma agaifanua.

165. O le vaega lenei ua manatu le Komisi ua talafeagai. Afai ae filifilia e le Malo lenei fautuaga, o lona uiga e tatau ona tagatagai i tulaga nei:

- i. Pe faamata e tatau ona faatumauiina pea le faaiuga e filifili lava e le aiga le numera o a latou tusa e tusa ai o a latou manaoga; poo
- ii. E tatau ona faatapulaa le numera o Matai Sa’o e tatau ona filifilia.

166. Na faamauina e le Komisi le fautuaga a le Komisi Suesue ina ia faatapulaa i le 5 le numera o Matai Sa’o. Ua manatu le Komisi e faaono faigofie ona faatino faaiuga ma taunuu i se maliega pe afai e 5 pe itiiti ifo foi le numera o Matai Sa’o. Ae peitai, e le o manino mai i le ripoti a le Komisi Suesue, pe faapefea ona filifilia le toalima (5) pe na tuuina mai foi se fautuaga a le Komisi Suesue pe faapefea ona soalaupule tulaga o loo aliaie mai le toatele pe silia ma le 5 Matai Sa’o i totonu o aiga.

167. E tus lava pe faatumauina le tulaga o loo iai poo le faatapulaa o le numera o Matai Sa’o i totonu o aiga, e tulai mai pea le faafitauli o le maliega autasi. Lea ua manatu ai le Komisi e faapea e tatau ona tagatagai i le talosaga ua tuuina atu i lalo i faaiuga fai e patino tonu i famua ma suafa o le aiga pe afai e sili atu ma le toatasi se Matai Sa’o i totonu o se aiga:

- i. O faaiuga e fai i le ‘maliega autasi’ a Matai Sa’o uma; poo
- ii. O faaiuga e fai pe afai e ‘toatele’ Matai Sa’o ua ‘au iai; poo
- iii. O faaiuga e fai e le Matai Sa’o ua ta’ua o le Sa’o ulumatua, poo le Matai Sa’o Matua.

Faaiuga e fai i luga o le maliega autasi

168. Afai o le a faia faaiuga i luga o le maliega autasi, ua fautua atu le Komisi e tatau ona tagatagai pe afai o le uiga o lenei mafuaaga e:

- i. O le maliega autasi a Matai Sa’o uma o loo aumau i Samoa ma atunuu mamao; poo
- ii. Le maliega autasi a Matai Sa’o o loo aumau i Samoa.

169. E faaopopo atu, afai e le ausia se maliega autasi ma e tuuina atu nei faafitauli i le Faamasinoga, ua manatu le Komisi e tatau i le Faamasinoga ona silasila i vaega nei:

- i. *Matai Sa’oo* loo aumau i Samoa, pe afai o le Matai Sa’o o loo aumau i atunuu i fafo o loo tete’e i se faaiuga; poo
- ii. *Matai Sa’oua* au tausaga o umia se suafa matai (aofaiga o tausaga sa umia ai); poo
- iii. Mafuaaga uma e lua.

170. Ua faamauina e le Komisi e faapea e ui lava o nei talosaga ua tuu eseese ai le Matai Sa’o o loo aumau i Samoa ma atunuu e mamao, o le a le faaaogaina leni eseese pe afai e faatino ma faamaonia le fautuaga a le Komisi e tatau i le Matai Sa’o ona aumau i Samoa.

Faaiuga e fua agai i le toatele ua autasi

171. E tusa ai o faaiuga e fai e fua agai i le toatele o Matai Sa’o e autasi, e iai lona itu e faapopole ai ona e faaono siitia ai le numera o Matai Sa’o ina ia siitia ai le numera e lagolagoina nei faaiuga.

172. A faapea o le faaiuga o le a tutusa, e tatau i le Faamasinoga ona tagatagai i ai latou ua umi ona umia se suafa matai (aofaiga o tausaga na umia ai se suafa). Mo se faataitaiga, afai na umia e Simi se suafa Matai Sa’o mo le umi e 20 tausaga, ma o isi Matai Sa’o e to’atolu o loo umia suafa Sa’o mo le itiiti ifo ma le 10 tausaga le umi, e tatau ona tele se sao o Simi i totonu o faaiuga fai pe a faatusatusa atu i isi Sa’o, ma o ia foi lea o le a fai ma sui o le aiga i le fonu a nuu. O lea tulaga, e tatau ai i isi Matai Sa’o ona ave le faaaloalo ia Simi ma o ia foi lea o le a fai faaiuga mulimuli i mataupu uma e aafia ai le aiga.

173. Afai e silia ma le tasi se Sa’o e tutusa le aofaiga o tausaga sa tautua ai ma umia ai ni suafa, e tatau ona iai se maliega autasi a Sa’o uma, poo Sa’o ia ua umi tausaga o tautua.

Faaiuga a le Matai Sa’o Ulumatua

174. O le Matai Sa’o lea ua ta’ua o le Sa’o e iai le pule maualuga nai lo isi Matai Sa’o i totonu o le aiga, ma o ia lea e faia faaiuga mulimuli i mataupu taua e faasino i fanua ma suafa o le aiga.

175. O mafuaaga ua ta’ua i lalo na fautuaina mo le filifilia o le Matai Sa’o Ulumatua:

- i. E filifilia e le aiga mai Matai Sa’o o loo iai poo ai e tatau ona ave ma Matai Sa’o Ulumatua; poo
- ii. Matai Sa’o uma i totonu o le aiga e latou te filifilia lava poo ai e ave ma Matai Sa’o ulumatua (e atagia mai i lea tulaga faatinoga o le faaaloaloga e pei ona iai le taimi nei); poo
- iii. Matai Sa’o matua pe a faatusa i le umi na ave ai ma Matai Sa’o ma lana tautua i le aiga. Ae peitai, afai e silia ma le toatasi se tagata na tautua mo le umi e tasi, e tatau ona filifilia lava e i latou poo ai le Matai Sa’o ulumatua e tatau ona filifilia.

VAEGA 2: Faatapula’a e nao le Tasi le *Matai Sa’o*

176. E toatele le mamalu o le atunuu sa to manatu i faatinoga i aso ua tuana’i, lea na masani lava i le toatasi o le Matai Sa’o. O le itu lelei o le toatasi o le tagata e tatau ona faia faaiuga. E aveesea ai foi faafitauli ma feeseeseaiga i le va o Matai Sa’o e toatele (mo se faataitaiga, o le faaiuga ina ia lisiina se fanua o le aiga, e taofia uma lenei faatinoga pe afai e iai se Matai Sa’o e tetee ma le malie i lea faaiuga e tusa lava poo le a le toatele o Matai Sa’o ua autasi i sea faaiuga).

177. O nisi nei o popolega mo le iai o le Matai Sa’o e toatasi:

- i. O le iai o le Sa’o e toatasi e faaono le talafeagai ona o le faatupulaia o numera o tagata i totonu o aiga i le taimi nei ma o loo salalau solo i totonu o le atunuu ma fafo atu;
- ii. O le a faaitiitia ai le mamalu o le va fealoai, faaaloalo ma le lagolago mai sui o le aigapotopoto e patino lava pe afai e faaitu’au le faiga o faaiuga e aafia ai le aiga potopoto atoa. E iai foi le popolega o le a faaitu’au i faaiuga fai aemaise lava I le faaeeina atu o suafa matai.

178. Afai o le a faamaonia ma filifilia e le Malo lenei Vaega, e tatau lava ona tagatagai I se faatinoga i le faaputuga o Matai Sa’o o loo iai i le taimi nei I totonu o aiga.

179. A’o lei filifilia ma faamaonia se Vaega e tatau ona faatino, ua fautua atu le Komisi e tatau i le Malo ona faatagaina se taimi mo nei fautuaga ina ia faatino ma tino mai, ona o isi fautuaga e faaono faaitiitia ai faaaitaui mo le soona faaoga le tatau o le pule a le Matai Sa’o ma o lena faaiuga e faaono le talafeagai mo sea faaaitaui i lea taimi.

Fautuaga

21. E tatau i le Malo ona tagatagai i le Vaega 1 ma le Vaega 2, ma ia faamauina nisi o mafuaaga faaopoopo i lalo o nei vaega taitasi.

VAEGA 1: E faaauau pea le iai o Matai Sa’o e toatele

21.1 O le fautuaga a le Komisi e mafuli i le Vaega 1 lenei. Ma e tatau ona tagatagai I mafuaaga faaopoopo mo lenei vaega:

- A. Pe faamata e faatumauiina pea le tulaga o loo iai mo aiga ina ia filifilia ai le numera o a latou Sa’o e tusa ai o la latou manaoga; poo
- B. Le faatapulaa se numera maualuga mo le filifilia o Matai Sa’o (mo se faataitaiga e to’a 5) e pei ona fautua mai le Komisi Suesue.

21.2 E tatau ona tagatagai pe faapefea ma e poo ai foi e tatau ona faia faaiuga e faasino i fanua (e pei o le lisiina o fanua) ma le faaeeina atu o suafa matai pe afai e sili atu ma le toatasi se Matai Sa’o i totonu o se aiga. O nei vaega o le:

A. Faaiuga e fai i le maliega autasi a Matai Sa’ouma.

- a. E tatau ona tagatagai pe faamata o le uiga o le autasi o le:
 - i. Faaiuga e fai ona o le maliega autasi a Matai Sa’o uma o loo ‘aumau I Samoa ma atunuu mamao’; poo
 - ii. Faaiuga e fai i luga o le maliega autasi a Matai Sa’o ‘o loo aumau i

Samoa nei’.

- b. Afai o le a le ausia se maliega autasi, ua fautua atu le Komisi e tatau i le Faamasinoga ona tagatagai i tulaga nei:
 - i. *Matai Matai Sa’oo* loo aumau i Samoa, pe afai o le Matai Sa’o o loo aumau i atunuu i fafo o loo tete’e i se faaiuga; poo
 - ii. *Matai Sa’oua* au tausaga o umia se suafa matai (aofaiga o tausaga sa umia ai); poo
 - iii. Mafuaaga uma e lua

Faamauina: o le eseese i le va o Matai Sa’o oloo aumau i Samoa ma atunuu i fafo e faaono le talafeagai pe afai o le Fautuaga 2 a le Komisi o le a faatinoina mo le Matai Sa’o e tatau ona aumau I Samoa.

B. Faaiuga e fua agai i le toatele o Matai Sa’oua autasi

Afai o le a tutusa le numera, e tatau i le Faamasinoga ona tagatagai i ai latou ua autausaga o umia se suafa matai (e tusa lava pe afai e sili atu ma le toatasi) poo le poloai atu foi e le Faamsinoga (pe afai o nei Matai e toa lua o loo feteenai o la manatu ma oi laua foi nei o loo tutusa le umi na umia ai se suafa).

Faamauina : E tatau ona faamalosia *Matai Sa’o* uma ona ave le faaaloalo i manatu o le Sa’o ua au tausaga ona umia se suafa matai (e le tatau ona faatulafonoina lea tulaga).

C. Faaiuga e fai e le Matai Sa’o ulumatua

- a. O le faaiuga mulimuli e faasino i fanua ma suafa o le aiga e faia e le Matai Sa’o ulumatua ma o nei faaiuga e tusa ai ma isi Matai Sa’o uma i totonu o le aiga.
- b. E tatau ona filifilia le Matai Sa’o ulumatua e fua agai i mafuaaga nei:
 - i. E filifilia e le aiga mai Matai Sa’o uma i totonu o le aiga poo ai e tatau ona ave ma Matai Sa’o ulumatua; poo
 - ii. Le filifilia mai e Matai Sa’o uma o le aiga poo ai oi latou e tatau ona ave ma Matai Sa’o ulumatua (e atagia mai ai le ave o le faaaloalo e pei ona iai faatinoga i le taimi nei) poo
- iii. O le Matai Sa’o ua loa le soifua ma e umi se taimi na umia ai se suafa matai ma ua loa foi lana tautua i le aiga. Ae peitai, afai e iai ma se isi Matai Sa’o e tutusa le umi na tautua ai, e tatau i nei Matai Sa’o ona filifili mai lava ei latua poo ai le Matai

Sa’o ulumatua.

VAEGA 2 :Faatapulaa e nao le tasi le Matai Sa’o

Afai o le a faamaonia e le Malo lenei vaega, e tatau ona tagatagai poo le a le tulaga e tatau ona faatino i le toatele o matai sa’o o loo iai nei i totonu o le tele o aiga.

22. A’o lei filifilia ma faamaonia se Vaega e tatau ona faatino, ua fautua atu le Komisi e tatau i le Malo ona faatagaina se taimi mo nei fautuaga ina ia faatino ma tino mai, ona o isi fautuaga e faaono faaitiitia ai faafitauli mo le soona faaaoga le tatau o le pule a le Matai Sa’o ma o lena faaiuga e faaono le talafeagai mo sea faafitauli i lea taimi.

F. Soalaupulega

23. “*E fofo e le alamea le alamea*”. O le alagaupu faa-samoa mo le soalaupulega faaleaganuu o faafitauli e fofo lava e le faa-samoa. O faafitauli ma feeseeseaiga i totonu o Samoa e foia lava i le soalaupulega ma faatalanoaga i totonu o fonu a nuu poo totonu o aiga mo mataupu i totonu lava o le aiga. O faafitauli uma e aliae mai i totonu o fonu a nuu poo talanoaga a le aiga e ta’ua o le soalaupulega. O lea tulaga e faaalua ai manatu o matai taitasi (o loo fai ma sui o aiga potopoto taitasi) ao le’i faia se faaiuga mulimuli. E masani lava ona ausia se maliega autasi mo faaiuga ona o soalaupulega lea e mafai ai lava e i latou o loo feeseesea’i ona soalaupule a latou faafitauli ma sailia ai fofo mo a latou lava faafitauli.
24. E pei ona talanoaina i le Vaega 3, o le Tulafono o Fanua ma Suafa 1981 o loo maioio mai ai aiaiga mo soalaupulega. O lea tulaga e aofia ai le manaoga mo sui o loo feeseeseai e faia se taumafaiga moni mo le soalaupulega i le tulaga faaleaganuu, ma ia faamanino vaega poo mafuaga mo se leleiga. E faaono mafai e le Resitala ona faatuai le valaauga o se faaiuga o se mataupu pe afai o loo taumafai i latou o loo finau e soalaupule nei mataupu i tua e tusa ai o tu ma aganuu a Samoa. I lea tulaga o loo faataatia mai foi i le Tulafono e le mafai ona faatino e le faamasinoga se mataupu pe afai e lei soalaupuleina e itu finau nei faafitauli i tua, ma e faaono faaliliu atu lea mataupu i le vaega o soalaupulega (e tusa lava pe malilie pe le malilie iai itu finau) poo le fautua atu iai e faaoga le faatinoga mo le soalaupulega.
25. O le tele o faafitauli e aliae mai e afua mai i le tagata e tatau ona iai le pule maualuga i se fanua. Na fautuaina le Komisi o le pule i luga o se fanua o le aiga o loo umia e se Matai Sa’o o se aiga. I le tele o tulaga, e iai le talitonuga masani e faapea o le Matai Sa’o e pule i fanua, pule i tagata. O le tali mai a tagata o loo aafia, e tusa lava poo le a le maualuga o le pule a le Sa’o i suafa ma fanua o le aiga, e tatau lava o iai le aia a le aiga e fesiligia pe luitauina ai le pule a le Matai Sa’o. O le aia a le aiga i nei ituaiga

mataupu e afua mai pe afai ua le faatalanoaina ma ua faalavelavea ai le nofo filemu i totonu o aiga.

26. O le *Soalaupulega* e tatau ona faatino a'o lei faia se faaiuga a le Sa'o, ona o le faaleaganuu lava ia e faamuamua le sailia o manatu o tagata uma o le aiga e aofia ai ma le au matutua. O le aiga ma le faamoemoe o lenei tulaga o le faia o se faaiuga a le Sa'o ina ua ma'ea ona faatalanoa ma tuuina mai manatu o le aiga atoa i se mataupu. O lea tulaga e faamautinoa ai foi o loo silafia e sui o le afioaga suiga o loo iai ma ia mafai ona mataitu le soona faaogaletatau o le pule a le Matai Sa'o.

Manatu na tuuina mai

27. I totonu o le Pepa o Talanoaga, na sailia ai e le Komisi ni manatu e tusa ai o mafuaaga ua ta'ua i lalo:

- *O a ni faafitauli e masani ona aliae mai i le va o Matai Sa'o ma Suli ma e faapefea ona iai ni auala faigofie e soalaupule ai?*
- *O le tulafono i le taimi nei o loo manaomia ai itu finau e faatino se taumafaiga moni e soalaupule ai faafitauli i le auai lea i soalaupulega e pei ona iai tu ma aganuu faaSamoa, ma e le mafai ona valaau e le Faamasinoga se mataupu sei vagana ai ua ma'ea ona soalaupule i tua. E faapefea ona faamautinoa e le Faamasinoga ua ma'ea ona faia se taumafaiga moni i tua mo le foia o faafitauli? Faamata e tatau ona iai ni aiaiga poo agavaa e tatau ona ausia ia faamalieina ai lea tulaga pe faamata e tatau ona faatulaga atu i le tulafono?*

O faafitauli masani ona tulai mai i le va o Matai Sa'o ma Suli

28. O nisi nei o faafitauli e masani ona tulai mai i le va o Matai Sa'o ma Suli na laga i faatalanoaga faalauaitele ma manatu tusitusia na tuuina mai:

- E le'o faatalanoaina e le *Matai Sa'o* lona aiga i faaiuga fai
- E tetee ma le faamaonia e le *Matai Sa'o* le faaaogaina o fanua ma le faaeeina atu o suafa matai
- O le faaaoga le tatau ma e le sa'o le tufatufaina o tupe o lisi
- O le umi ona tofia e avea ma *Matai Sa'o*
- Faaitu'au i nisi o sui o le aiga
- Le mafai ona faatumauina le nofo filemu i totonu o le aiga

O le le faatalanoaina o le aiga i faaiuga fai a le Matai Sa'o

29. O le tele o manatu na tuuina mai i faatalanoaga lautele na atagia mai ai o le tele o faafitauli e alia'e mai i totonu o aiga e faasino lea i le le faatalanoaina o sui o le aiga ao lei faia se faaiuga taua e aafia ai meatotino a le aiga.

30. Na sailia foi e le Komisi se finagalo o Polofesa So’o lea na ia ta’ua ai o nisi o faafitauli e aliae mai e faasino tonu lea i le faaaogaina e le Matai Sa’o o punaoa aemaise lava o fanua, mo le tamaoaiga o ia lava, e aunoa ma se silafia e le aiga poo e aunoa ma se faatalanoaga o le aiga ina ia ausia se faamaoniga. Mo se faataitaiga, o le fausia lea o se maota poo se faia o se faato’aga poo se pa manu i luga o le fanua o le aiga.
31. Na ia fautua mai e iai tulaga manino e atagia mai ai le talitonuga o le Matai Sa’o e tatau ona faatalanoa faapea foi tulaga e le tatau ona faatalanoaina. Na ia faaopoopo mai, i mafuaaga e lē tatau ai ona faatalanoa e le Matai Sa’o, e tatau i sea faaiuga ona atagia mai ai le faatumauina o le nofo filemu i totonu o aiga. Mo le faataitaiga i mafuaaga o le fausia o se maota, poo le faatuina o se faatoaga poo se pa manu i luga o le fanua o le aiga e aunoa ma se faatalanoaga, o nisi sui o le aiga ua manatu o lea tulaga ua faatino e le *Matai Sa’o* mo lona lava lelei ma lona tamaoaiga. Ae peitai, e mafai ona tetee e le *Matai Sa’o* se faagaulemalie ma faapea mai o le faaiuga e mo le lelei o le aiga, mo se faataitaiga, o se maota o le aiga e tua iai i faigamea a le aiga aua faalavelave ma tuufaatasiga. E faaopoopo atu foi, sa faamalamalama atili mai e Polofesa So’o e iai tulaga ua manatu le Sa’o ua talafeagai e faaoga ai punaoa a le aiga ina ia mafai ona faa’aupegaina ma faatamaoaigaina ai le aiga mo saofaga i mea fai a le aiga ma le nuu.
32. Na faapea mai le Afioga i le Faamasino Sili ia Sapolu, o le faatupulaia o mataupu i le faamasinoga e aofia ai suli o loo tuuina atu la latou aia e taofia ai se Matai Sa’o mai le faaaogaina o fanua o le aiga e lisiina e aunoa ma le silafia ma se faatagana a le aiga. E pei ona faailoa mai e le Matagaluega o Faamasinoga ma le Pulega o Faamasinoga, o le tele o faafitauli o loo tuuina atu i le Faamasinoga e faasino lea i mafuaaga o le lē iai o se maliega a le aiga mo le faaaogaina o fanua mo le lisiina. Sa faasoia mai foi Polofesa Malama Meleisea i nisi o faafitauli e faatatau i le logoina e le Matai Sa’o o se faatalanoaga e na’o nisi o sui o le aiga e auai. Sa ia faamamafa mai le taua o le taumafaiga moni a le Sa’o e logoina ma faatalanoaga sui uma o le aiga i mataupu e patino i le lisiina o fanua.
33. Sa fautuaina e faapea e tatau i le tulafono ona iai se manaoga e tatau ai i le Matai Sa’o ona faatalanoa lona aiga ao lei faia se faaiuga e lisi fanua o le aiga i le au fai pisinisi o loo mananao e fausia pisinisi i luga o fanua o le aiga.

Tetee a le Matai Sa’o i le faaaogaina o fanua ma le faaeeina atu o suafa matai

34. Na maua e le Komisi nisi o manatu o loo atagia mai ai nisi o faafitauli e aofia ai se sui o le aiga o loo fia maua se fesoasoani ma ia taumafai ai i se faamaoniga a le Matai Sa’o e faaaogaina sina vaega o se fanua, ae peitai e le taliaina lea talsoaga e le Matai Sa’o. O le toatele o le mamalu o le atunuu na faaali faaseā i lea faatinoga a le Matai Sa’o ona o loo fai ana faaiuga e fua agai i tagata e fiafia iai.
35. I faatalanoaga a le Komisi i Savaii sa faaalua ai e le toatele se manatu e patino tonu i le Matai Sa’o o loo aumau i atunuu mamao, o loo faapea mai o sui o le aiga o loo nonofo

i luga o fanua o le aiga e masani lava ona lē amanaia ma lē talia a latou talosaga ma manaoga mo le faaaogaina o le fanua o le aiga ina ia faatamaoigaina ai le aiga i Samoa. Na faasoa mai le popolega o le Afioga i le Faamasino Sili ia Sapolu ma faamalamalama atili mai ai o le tele o mataupu e tuuina atu i le Faamasinoga o loo valaau ai faafitauli i le va o aiga ma le Matai Sa’o o loo aumau i atunuu mamao, ma o ia lea ua tetee i se talosaga e tuuina atu e sui o le aiga o loo aumau i Samoa o loo mananao e faaoga sina vaega o le fanua o le aiga ina ia tausi ai aiga ma fai ai saofaga i mea fai a aiga poo faalavelave (matafaioi).

36. Mo nisi o i latou o loo maua i lea tulaga, o le tele o faafitauli e masani ona aliae mai ona ua le taliaina e le Matai Sa’o le fausia o fale o nei sui o le aiga, i luga o le fanua o le aiga. Mo se faataitaiga, na tuuina mai e faapea o nei faafitauli e aliae mai pe afai ua tuuina atu se poloaiga poo se faatinoga a le Matai Sa’o e tulia ma aveesea sui o le aiga mai luga o se fanua ua tele tausaga o aumau ma nonofo ai.

37. O nisi o faagaulemalie e faasino lea i faaiuga na faia e le Matai Sa’o sa iai muamua ua faaleaogaina e le Matai Sa’o ua iai nei. Mo se faataitaiga, o se Matai Sa’o sa ia faatagaina se vaega o le fanua o le aiga e atina’e ma fausia ai se aiga ae peitai ina ua maliu, o le isi Matai Sa’o o le a sosoo ai o le a ia aveesea lea aiga mai le fanua.

38. E tusa ma le faaeeina atu o suafa matai, o nisi o aiga sa latou tuuina atu le latou Matai Sa’o i le faamasinoga ona ua faalavelave i le maliega autasi a le aiga mo le faaeeina atu o suafa matai i nisi o suli o le aiga. O nisi o faafitauli na atagia mai i faaatalanoaga o le faaeeina atu lea o suafa matai iai latou e le tino ma toto, ma ua ta’ua o matai tautua ae peitai e lei tautua i le aiga.

Tufatufaina o le tamaoaiga mai lisi o fanua

39. O manatu na tuuina mai i le Komisi i le taimi o faatalanoaga lautele na faailoa mai ai o le tele o faafiauli e faasino lea i le lē tufatufaina atu i le aiga e le Matai Sa’o o tamaoaiga e maua mai i le lisiina o fanua o le aiga. Na faailoa mai e taulimaina e le Matai Sa’o lea tamaoaiga pe na tufatufa foi e nao sina vaega o le aiga.

40. O se tasi na fautua mai na faapea mai o se tasi o fofu e foia ai leni faafitali o le faatulafonoina lea ina ia tatau ona malilie le aiga potopoto pe faapefea ona tufatufa tamaoaiga e tusa ai ma la latou maliega. O le isi fautuaga na tuuina mai o le faatulafonoina lea mo le Matai Sa’o ina ia vaevae tutusa leni tamaoaiga i sui uma o le aiga ma ia atagia mai le maualuga e 50:50.

41. Na toe fautua ma faamanatu mai e le Faamasino Sili ia Sapolu le popolega o le mamalu o le atunuu i lea faafitauli. Na ia ta’ua e faapea o nisi o mataupu, ua faapopoleina ma lē faamalieleina le aiga potopoto atoa ona o le tele o le tamaoaiga ua ia faaagagaina mo lana faletama ae ua le vaevae tutusa i tagata uma o le aiga. Na faamautinoa mai foi e le Matagalega a le Faamasinoga o se tasi leni o faafitauli ua

faatupulaia ma tuuina atu i le faamasinoga ona o le lē faasoasoina lelei e le Matai Sa’o o tamaoaiga e maua mai i lisi o fanua o le aiga.

42. Na fautua mai le Faamasino Sili ia Sapolu e faapea, o le auala muamua e tataua ona fai ma taiala e limataitaia ai le Faamasinoga mo le talanoaina o faafitauli faapenei, o le faatulafonoina lea ma e lē tataua ona iai se aia poo le pule a le Matai Sa’o e faaoga ai tamaoaiga a le aiga mai lisi o fanua, ma e tataua ona tufatufaina ma vaevae tutusa i le aiga. Sa ia fautua mai foi e faapea e tataua ona faaoga le tofa ma le faautautaga a le faamasinoga e filifili ai pe faamata e amiotonu, sa’o ma o loo ō gatasi ma le tulafono ma tu ma aganuu e tuuina atu ai nei tamaoaiga i sui o le aiga i ituaiga mataupu feteenai faapenei. Mo se faataitaiga, na faailoa mai i nisi o mataupu, e iai taimi e tetee ai le Sa’o ma faapea mai, o sui o le aiga o loo finauina ma tetee i se faaiuga o le lē tufatufaina atu o tamaoaiga o lisi, oi latou nei e le faia monotaga poo saogamea i faalavelave o le aiga, leai se tautua pe o le lē aliali mai foi i mea fai a le aiga ma le nuu, ae peitai ona oi latou o sulii, e tataua lava ona maua tamaoaiga poo seleni mai lisi o fanua o le aiga. Na saunoa le Faamasino Sili o mataupu faapenei pe a vaalaa i luma o le faamasinoga, e na te fesiligia pe faamata e talafeagai le tuuina atu o tamaoaiga poo seleni o lisi iai latou e le o faatinoina o latou tiute i totonu o aiga.

O le umi o le tofiga Matai Sa’o

43. Na faamauiina e le Komisi mai manatu na tuuina mai e iai taimi e atagia mai ai nisi o faafitauli ona ua fesiligia e sulii o le aiga le umi o le aoga o le tofiga Matai Sa’o. O nei mataupu ua fesiligia ai e sulimoni i le faamasinoga le filifiliga ma le tofiga o sulitamafai ona o lā latou mau tetee e aga’i i le lē amiotonu o lea faiga ona o se suafa e patino tonu iai latou ma e tataua ona faatumauina e nao sulii o le aiga e faaeeina atu iai. I nisi o mataupu, ua lu’iina ai e sulii le tofiga o sulii o sulii tamafai i le taimi e maliliu ai (ona e tapulaa lea tofiga e na’o le sulii na faaeeina atu iai) ma e aunoa ma se silafia e le aiga e umia moni pe patino tonu iai lenei suafa.

44. O nisi sa tuuina mai ni faagaulemalie agai i le lē talitonuina o faamaumauga a le faamasinoga ona o loo tuuina mai ai o le tofiga o se Matai Sa’o o ia lea o le sulii moni lava o se aiga, ae peitai o le mea moni lava e le o se sulii moni ma o loo loa silafia e le aiga.

45. Na ripotia mai foi ni mataupu o le tofiaina lea e le Matai Sa’o o le isi Matai Sa’o o le a sosoo lona faapaleina, e tusa lava poo se sulii moni pe leai, ma e aunoa ma se maliega autasi a le aiga.

Faaitu’au i nisi o sui o le aiga

46. Na maua e le Komisi nisi o manatu na tuuina mai na faailoa mai ai o nisi o feeseeseaiga o loo faaauau pea ona tulai mai ona o le faaitu’au o le Matai Sa’o i nisi o sui o le aiga. Na faailoa mai foi e faapea o lea faaitu’au ua o’o ai i se tulaga ua faaitu’au

ai i le tufatufaina o tamaoaiga a le aiga, oloa, fanua ma suafa. Na faaopoopo mai foi o lenei faaitu'au ua avea ma mafuaaga ua mavaevae ai aiga ma ua faaleaogaina ai le auga ma le faamoemoe o le soalaupulega.

47. Na ta'ua foi e faapea e afua ona mavaevae aiga ona ua faamalosia e le Matai Sa'o nisi o le aiga e tetee i manatu o nisi o le aiga, ma avea ai foi ma tulaga ua faaleaogaina ai le faamoemoe o le soalaupulega.
48. O nisi o manatu na tuuina mai i le Komisi e faasino lea i nisi o feseeseaiga o loo aliae mai ma faaauau pea ona tupu i totonu o aiga ona e le o mafai e le Matai Sa'o ona faatupu le nofo filemu i totonu o le aiga, pe o loo faaaogaina lona malosia e taumafai ai e faamaopoopo (pe leai foi) le aiga, e le o se tulaga e faaono ave iai se faaaloalo, poo le le faatinoina ona o nisi o mafuaaga.

O le taumafaiga moni ia fo'ia faafitauli i tua ae lei faaooina atu i le Faamasinoga

49. O le tele o manatu na tuuina mai e mo aiga ina ia soalaupule a latou faafitauli i tua ao lei tuuina atu i le Faamasinoga, sei vagana ai ua ogaoga ma lavelave se mataupu.
50. O le 'taumafaiga moni' i totonu o le tulafono i le taimi nei e tataua ona faatino e fai ai se faaleleiga i tua ona e le mafai ona talia e le Faamasinoga se mataupu sei vagana ua uia auala o le soalaupule muamua i tua. O lea aiaiga i le tulafono o loo manaomia ai auai sui finau ina ia faia se faatinoga/taumafaiga moni ma auai i soalaupulega o faafitauli ma faamauiina talanoaga tusitusia i le va o sui, ina ia mafai ona atagia mai ni vaega e filifili iai e fo'ia ai nei faafitauli. O lenei aiaiga o loo iai ona tapulaa, ae peitai, e iai mataupu na ripotia mai o loo auai sui finau e soalaupule faafitauli ina ia faamalieina ai lea aiaiga, ae peitai e le o iai se taumafaiga/manaoga moni e fo'ia se faafitauli. E le o iai foi se taiala i totonu o lea aiaiga, pe faapefea ona faia soalaupulega i tua i aiga ina ia faamalieina ai lenei aiaiga.

51. Na sailia e le Komisi ni manatu pe faamata e faapefea ona faamautinoa e le Faamasinoga ua faatino se 'taumafaiga/manaoga moni' e le Matai Sa'o ma sui o aiga e soalaupule ai faafitauli, ma pe faamata e tataua ona iai ni aiaiga poo ni agavaa e faatulaga atu i le tulafono ina ia fai ma taiala agai i le faatinoga o le soalaupulega.

52. Na fautua mai le toatele o le mamalu o le atunuu e tataua ona faatino e aiga se 'taumafaiga/manaoga moni' ina ia sailia ai se maliega autasi mo le soalaupuleina o faafitauli i totonu o aiga, ae faatoa faaoo atu i le Faamasinoga pe afai ua leai lava se isi fofo. O fautuaga pe faamata e faapefea ona iloilo e le Faamasinoga sa faia se taumafaiga moni mo le soalaupulega o faafitauli i totonu o aiga i le va o le Matai Sa'o ma aiga ua faatulaga atu i vaega e 3:

- *Soalaupulega* i totonu o aiga
- Faasalalauina o se faatinoga o se *soalaupulega* e faaoga ai upega o fesootaiga eseese
- Fono a Nuu ina ia auai i *Soalaupulega* i le va o aiga

53. Na matuai faamamafa mai e le mamalu o le atunuu e tatau ona faatulafonoina nei aiaiga ma ia le mafai ona talia ma valaau e le Faamasinoga se mataupu e le faamalieina ai nei aiaiga mo le faatinoga o se taumafaiga/manaoga moni e foia ma soalaupule ni faafitauli.

Soalaupulega i totonu o Aiga

54. O manatu e masani ai e faasino i le Matai Sa’o ina ia faatalanoa muamua mataupu ma le aiga. O le tele foi o manatu e taula’i i aiga ina ia soalaupule muamua a latou faafitauli a’o lei tuuina atu i le Faamasinoga mo le mapusaga mulimuli. E iai le manatu ua mafuli ai ma ua masani ai lea ua filifili ai itu finau e tuuina sa’o se mataupu i le Faamasinoga ona o le tele o mataupu e mulimuli ane ua toe oo lava i le Faamasinoga.

55. Na faamamafa mai e Alii ma Faipule i Upolu e tatau lava ona faaauau ona faatino soalaupulega i totonu o aiga se’ia iai se maliega autasi. O le isi tulaga e tatau ona faamanino mai i le tulafono e tatau lava ona soalaupule muamua ma ia taumafai aiga e auai pe itiiti ifo i le faalua ona talanoa a’o lei faaoo atu se mataupu i le Faamasinoga pe afai ua leai se maliega autasi ua mafuli iai. O le isi manatu na faailoa mai e tatau i suli moni uma o le aiga ona auai i talanoaga ma fonotaga a le aiga ma o mataupu talanoaina e tatau ona matuai maioio ma manino i le taimi o fonotaga.

56. O le tele o manatu na tuuina mai i vaega na vaevaeina iai faatalanoaga ma le mamalu o le atunuu, na talosaga mai ai e tatau i le tulafono ona faamamafa mai le sili atu talanoaga i le va o aiga nai lo le soalaupulega lea e valaauina e le Resitala. O nisi o manatu na faailoa mai lo latou tetee i le faatinoga o le soalaupulega lea e valaauina e le Resitala, ona o le talitonuga mautu e tatau lava i mataupu faapenei ona talanoaina e na o aiga o loo aafia. Ae peitai, o le isi manatu na talosaga mai le auai o le Resitala i soalaupulega i totonu o aiga ae mo aiga ina ia fausia a latou taiala e mulimulita’ia e le Resitala.

57. Na fautua mai le toatele, afai ae le mafai e le Faamasinoga ona soalaupule ni mataupu e faaoga ai le faatinoga mo soalaupulega a le Faamasinoga, ma ua le maua se maliega autasi a itu finau, e tatau ona toe faaliliu atu sea mataupu e taumafai nei aiga e soalaupule a latou lava faafitauli. Afai ae leai lava se maliega autasi e ausia, e tatau loa ona toe tuuina atu i le Faamasinoga. Ae afai e faamanuiaina, e tatau ona sainia se maliega tusitusia i le va o le aiga ma le Sa’o na auai i se talanoaga ma toe ripoti atu lenei maliega/faamaumauga i le Faamasinoga ina ia mafai ona faamauina i faamaumauga a le Faamasinoga. Na fautua mai foi e tatau ona iai se aiaiga e faatagaina ai itu finau i soo se taimi o taualumaga i le Faamasinoga i se mataupu ina ia mafai ona toe tuuina atu i aiga aua sa latou talanoaga.

58. O se tasi na tuuina mai ona manatu na fautua mai o le taiala o le a faatulafonoina ai matafai oi a le Matai Sa’o e fesoasoani lea ina ia limataitaia ai aiga o loo taumafai e fo’ia faafitauli i le taimi o soalaupulega. E ‘au lea manatu i se tasi foi na faailoa mai lona finagalo i le taimi o faatalanoaga lautele, ina ia iai se taiala i totonu o le tulafono e faamanino mai ai tulaga e mulimulitaia e aiga i le faatinoga o soalaupulega.
59. O se tasi o faafitauli na atagia mai i le taimi o faatalanoaga e faasino i se faaiuga na faia e le aiga i Samoa nei ae peitai e tetee iai sui o le aiga o loo aumau i atunuu i fafo ma i’u ai ina tuuina mai se talosaga tetee i le Faamasinoga. Na faamauina foi i manatu na tuuina mai i mataupu faapenei, afai o i latou o loo aumau i atunuu i fafo o loo silafia sea talanoaga na faia ai se faaiuga, e le tatau ona tetee ma faalavelave i se faaiuga ua faia e le aiga o loo aumau i Samoa.
60. O le isi manatu mai faatalanoaga faalauaitele o le manaoga lea ia iai se aiaiga i le tulafono ina ia faamalosi ai le Faamasinoga ina ia lē taliaina ni talosaga tetee na tuuina atu e se tasi e le o tautua i le aiga. Na faaali mai foi se manatu e tatau i se ofisa faigaluega a le Faamasinoga ona faailoa ma faamauina pe faamata o sui finau o sulitautua, sulitautua, sulitautua, sulitautua, sulitautua. Afai e le oi latou o ni sulitautua, e le tatau ona faia se taulumaga o se mataupu.
61. E tusa ai o le faatinoga o le soalaupulega, na manatu nisi e le tatau i sulitautua e le tau toto ona auai i soalaupulega. Na faailoa mai o sulitautuai ma sulitautuai e le tatau ona agavaa e auai i se soalaupulega.

Faalauiloaina o le faatinoga o se soalaupulega i luga o upega o fesootaiga eseese

62. Na faailoa mai i faatalanoaga ma manatu tusitusia na tuuina mai o le matafai oi masani lava a le Matai Sa’o o le logoina o matai uma o le aiga e faatatau i se talanoaga. Ae peitai, ua masani ona faasea aiga ona e lei faailoaina atu se talanoaga a se aiga.
63. O le tele o manatu mai faatalanoaga faalauaitele na faailoa mai e tatau lava ona faalauiloa lautele se talanoaga a le aiga e faaoga ai le televise, leitio, nusipepa ma isi. O le faamoemoe o nei faasilasilaga faalauaitele ina ia faamautinoa ai o loo faailoa atu i sulitautua ma sulitautua atu se avanoa e auai ai i le faatinoga o se soalaupulega. Na fautua mai o leni faasalalauga e tatau ona tuuina le masina e tasi a’o lei oo i le aso e faia ai le talanoaga, ma e tatau ona aofia ai le taimi, nofoaga ma le mataupu o le a talanoaina i le fonotaga. Na faaopoopo mai i lea faatuaga e tatau ona manaomia e le tulafono lea tulaga, ma afai na faamalieina manaoga o le tulafono mo le faasalalauina, ae iai sui o le aiga e lei auai, o lona uiga o loo faamalieina le faatinoga e le Sa’o o lona tiute.

O le auai o le Fono a Nuu i Soalaupulega i le va o aiga finau

64. O nisi na fautua mai e tatau ona auai le Fono a Nuu ma fesoasoani e taitai'a se talanoaga pe afai ua le ausia le manulauti o se soalaupulega. Na fautua mai foi nisi e tatau ona auai faafeagaiga ina ia tuuina atu fautuaga i le aiga i le taimi o le faatinoga o le soalaupulega. O se tasi na tuuina mai lona manatu na faapea mai o le auai o le faafeagaiga e iai foi ni faafitauli ona e faaono faamalositia ai sui o le aiga ina ia usitaia ana fautuaga, e tusa lava pe le o malilie iai.
65. O le toatele oi latou na manatu e tatau i le tulafono ona iai ni aia a le Fono a Nuu e auai ai i soalaupulega o mataupu, e tuuina atu la latou fautuaga e fesoasoani ai i aiga ina ia faamautinoa ua iai se maliega autasi ma fesoasoani e fo'ia ni feeseeseaiga.
66. O le isi manatu na faamauina o le fausia lea e Fono a Nuu o taiala ma tulafono faatonutonu ina ia mafai ona fesoasoani i aiga mo le soalaupulega o faafitauli.
67. O se tasi manatu na 'au i le auai o le Fono a Nuu, ae peitai na fautua mai, e tatau ona fua agai i le ogaoga o le mataupu le auai o sui o le Fono a Nuu i mataupu talanoaina. Mo se faataitaiga o le lisiina o fanua o le aiga mo mafuaaga faapisinisi.
68. O nisi o manatu na tetee i le auai o sui o le Fono a Nuu ona e tatau lava i sui o le aiga ona soalaupule a latou faafitauli i le va oi latou lava. O le popolega ona o mataupu e patino lava i le aiga ma o mataupu e popo'e manatu e faailoa atu i le Fono a Nuu pe afai e auai. E faaopoopo atu, o nisi na manatu e iai le popolega i le faailoa atu o mataupu i le Fono a Nuu ona ina ne'i mea ane ua faasala ai le aiga, poo le tuuina atu o manatu faaitu'au o le Fono a nuu i nisi o sui o le aiga.

Agai i luma o le Faatinoga o le Soalaupulega

69. Na faamamafa mai e i latou na tuuina mai manatu ina ia toe lloilo le taua o le faatinoga o soalaupulega, ona ua manatu nisi e le o faamalieina ona e le lava le agavaa oi latou o loo faatinoina ma taita'ia. O le vaega o Alii ma Faipule i Upolu na faasea i matafaioi faatino a resitala i le taimi o le soalaupulega, ona e itiiti se malamalama e faailoa mai e faasino i tulaga e talanoaina i totonu o se soalaupulega. O se tasi o finagalo na faailoa mai se faatinoga na alia'e mai ma atagia ai le le malamalama o le Resitala i le faafitauli o le a soalaupule. Sa faamamafa mai ai e tatau i le Resitala ona faamasani i mataupu ma suesue faaiuga ale Faamasinoga na faatino i isi mataupu ua tuanai pe afai o loo iai. Na fautua mai e manaomia ni aoaoga faaopoopo mo nei resitala ma e patino lava i le aganuu faa-Samoa. E talitonu Polofesa Asofou Soo o le faafitauli lenei e afua ma ii le leai o se faapalepale i nei tagata ina ia mafai ona fo'ia faafitauli poo le toe faaleleia o sootaga malepelepe. O le tele o manatu na faailoa ma ii faatalanoaga faalauaitele e faasino i le Resitala o le Faamasinoga ina ia lava tapena ma ia iai se malamalama atoa i le faafitauli ao lei auai e vaavaai ma taitaia se soalaupulega i le va o aiga.

70. O nisi o finagalo mai faatalanoaga lautele na ta'ua ai o lenei faatinoga e le o lelei ona o feeseeseaiga e aliae mai i le va o se itu finau ma le Resitala, ona o loo silafia e le Resitala le isi itu finau. E tatau ona iai ni faiga faavae e mulimulita'ia ina ia fo'ia ai lenei faafitauli ma ia faia ni siaki talafeagai o le gafa o le aiga mo aoaoga ma ia faamautinoa o le faatinoga e le o toe iai se faaitu'au i le va o aiga finau ma le o loo taitaia se soalaupulega. Na lagolagoina foi e Polofesa Malama Meleisea lenei finagalo, ma e talitonu lona taofi e manaomia e i latou nei ni aoaoga faaopoopo ma ia faamautinoaina o lenei faatinoga mo soalaupulega e le o atagia mai ai se faaitu'au i le va o resitala ma itu finau. Na faamauina foi e Polofesa Asofou So'o e tatau ona iai ni faamaumauga o nei faafitauli ina ia fausia ai ni faataitaiga e limataitaia ai resitala i faatinoga i le lumanai.
71. O le toatele na finagalo e auai o Faafeagaiga e taitai'a ma vaavaai le faatinoga o le soalaupulega, faapea sui o le Fono a Nu'u ma loia e auai. O nisi na ta'ua le auai o Faamasino.
72. O nisi o le atunuu na finagalo e tatau ona toe faaopoopo aso e faatautaia ai le faagasologa o lea faatinoga nai lo le 45 aso o loo i le tulafono e tatau ona faama'ea ai. O lea finagalo o lea taimi faatumauina e atagia mai e na'o le auai o itu finau e aunoa ma se manaoga moni e soalaupule ai se faafitauli. O nisi na finagalo e le tatau ona iai se taimi faatapulaa o lea faatinoga ae ia matuai tuu le avanoa i aiga e taumafai ai e soalaupule a latou faafitauli i totonu o latou aiga.

Manatu o le Komisi

73. E 'auai le Komisi i le manatu o le toatele e avea le Faamasinoga ma mapusaga mulimuli o se faafitauli ua le mafai ona soalaupule e aiga i tua. O loo amanaia e le Komisi le aiaiga o loo iai ne ii le Tulafono, lea e manaomia ai le loto gatasi ma le manaoga moni o le aiga e auai a ii le soalaupulega o faafitauli ma taumafai e Iloilo ni vaega mo le toe faaleleia. O le vaavaai a le Komisi e mafai ona toe faalautele le aiaiga o loo iai nei, ina ia mafai ai e le Faamasinoga ona mautinoa ua faatinoina le 'loto gatasi ma le manaoga moni', ma ia toe faamalamalama atili le faagasologa o le faatinoga o le soalaupulega i fafo atu ma le faamasinoga o loo avanoa mo itu finau. Ae peitai o le faamamafa lava a le Komisi o le ave o le faamuamua e soalaupule e aiga ma nuu nei faafitauli ao lei faaliliu atu nei mataupu i le Faamasinoga.
74. Ua tuuina atu e le Komisi se taiala ua ta'ua i lalo e tatau ona mulimulita'ia aua le limataitaia o galuega mo le soalaupuleina o faafitauli e aliae mai ona o le soona faaoga le tatau o le pule a le *Matai Sa'o*:
- i. E fai fonotaga a aiga e talanoaina ma soalaupule ai mataupu i le va oi latou lava. E tatau ona silasila toto'a ma faamautinoa o loo iai uma itu finau poo i latou e tatau ona auai i le faatinoga o le soalaupulega. E tatau ona iai ni faamaoniga sa faasalalau faalauaitele se faasilasilaga e valaau ai sui uma o

le aiga, ma e Iloilo foi e le Faamsinoga lea tulaga e faamautinoa ai sa faia sa taumafaiga moni e taumafai e soalaupule se faafitauli.

- ii. Afai o le a le mafai ona soalaupule se faafitauli i le taimi o le talanoaga a le aiga, e tatau loa ona vaavaai itu um ape faaono tatau ona auai se sui o le fonu a nuu, e fua agai i le faafitauli o loo taumafai e soalaupule, poo se faafeagaiga pe afai ua latou silafia e faaono fesoasoani e soalaupule se faafitauli. E tatau ona ta mau faamaumauga o loo maioio atu ai talosaga e auai mai nei sui, faapea faamaumauga o minute o nei fonotaga. O lea tulaga e folasia i se taimi mulimuli ane i le Faamasinoga e faailoa ai sa faia se taumafaiga moni e soalaupule se faafitauli.
- iii. A faapea e le mafai lava e nei auala ona soalaupule se faafitauli, e tatau loa i sui finau, ona tuuina atu loa i le Faamsinoga, o se mapusaga mulimuli e faalagolago i le faatinoga o loo faia e Faamsinoga mo le soalaupulega e pei ona aiaiga o loo i totonu o le Tulafono, ina ia iai se Resitala e faatinoina lea tulaga poo se poloaiga le Faamasinoga.

75. Faamaoniga o se *'taumafaiga moni'*. O le manatu taatele i totonu o lenei pepa o le leai o ni talanoaga i le va o le Matai Sa'o ma le aiga i faaiuga fai. E pei ona fautua atu le Komisi i le amataga o lenei ripoti, e tatau ona faatulafonoina tiute o le Matai Sa'o mo mataupu patino faapea. O le matafaioi foi mo le logoina o aiga mo talanoaga, e patino lava iai latou o loo taumafai e talanoa ona o se faafitauli o loo taumafai e soalaupule, e tatau foi ona faasilasila faalauaitele, pe a talafeagai. Afai ae lei mafai ona soalaupule se faafitaulil, e tatau ona folasia i le faamsinoga faamaoniga i se taimi mulimuli e faailoa atu ai sa faia se faasilasilaga ina ia Iloilo e le Faamasinoga ma faamautinoa sa faia se *'taumafaiga moni'* e soalaupule se faafitauli.

76. A manatu le Komisi e tatau ona toe teuteu le vaega 34A o le Tulafono o Fanua ma Suafa 1981 ina ia faamanino mai ai pe faamata sa faia se *'taumafaiga moni'*, ma e Iloilo foi e le Faamasinoga faamaoniga o fonotaga, mo se faataitaiga o faasilasilaga faalauaitele, o minute o fonotaga faapea faamaumauga oi latou na auai ma mataupu na talanoaina.

O le auai o sui o le Fono a Nu'u ma Faafeagaiga i Soalaupulega i le va o Aiga

77. E tusa ai o le auai a le fonu a nuu, ua manatu le Komisi e le tatau ona faatulafonoina le auai o le fonu a nuu ona e le talafeagai i mataupu uma e soalaupule ma e le talafeagai lea faatinoga mo aiga uma. Ae peitai, ua manatu le Komisi e faamalosi le auai o le fonu a nuu i le soalaupulega o faafitauli aemaise lava i mataupu e faasino i le lisiina o fanua faaleaganuu. Mo se faataitaiga, o se maliega e lisi se fanua faaleaganuu i se fai pisinisi mai fafo o le a tele se aafiaga i le toatele o le afioaga ona o le a faaono sopoia soo o lea fanua, o le a faaono siitia faatinoga mo tagata tafafao maimoa mai fafo poo le faalavelavea i le siitia o le tulaga o leo i totonu o le nuu, ma o ituaiga mataupu faapea e tatau ona auai ai le fonu a nuu. Ae peitai, o le faaiuga mo le

auai o le fonu a nuu i faaiuga fai a le aiga, e tatau ona filifili lava e le aiga ia pe talafeagai pe leai.

78. Ina ia fesoasoani i le faagasologa o le faatinoga o le soalaupulega ae peitai, ua fautua atu le Komisi ina ia fausia e le Fonu a Nuua latou lava taiala e limataitaia ai le faatinoga, mo se faataitaiga, pe faapefea poof ea foi e fai ai le soalaupulega, o ai e tatau ona auai, e faapefea ona faailoa atu lea faatinoga ma isi tulaga uma faapena.
79. Ua faamalosia'au atu le Komisi i aiga ina ia sailia fesoasoani a faafeagaia mo le soalaupulega o faafitauli ao lei faaoo atu se mataupu i le Faamasinoga, pe afai e talafegai ma le faafitauli ma itu finau o loo auai. E faailoa atu a ii lea tulaga o loo taumafai e sailia uma ituaiga fesoasoani mo le soalaupulega o faafitauli.

Agai i luma o le faatinoga o le soalaupulega

80. Ua manatu le Komisi e tatau ona faatinoina le faiga faavae mo alafua ua ta'ua i lalo ina ia faaleleia ai le faagasologa o le faatinoga o soalaupulega:
- i. Ia faavaeina se faagasologa e limataitaia ai aia feteenai i le va o Resitala ma itu finau. E ausia lea tulaga i se faiga faavae lautele mo le limataitaia ai aia feteenai poo le toe suia o le pepa faatumu mo talosaga tetee ina ia mafai ai e le Resitala ona faailoa aia feteenai ao lei tuuina atu le mataupu e soalaupule, mo se faataitaiga. O le isi auala o le tuuina atu lea e le Faamasinoga o se Taiala mo le Faatinoga e faatumu ai siaki o le gafa o se aiga ina ia faamautinoa ai e leai se sootaga i le va o Resitala ma itu finau. O lea tulaga o le a faamautinoa ai se taumafaiga e soalaupule faafitauli ma e leai se faaitu'au, i le faatinoga o le soalaupulega.
 - ii. O le matagaluega talafeagai e tatau ona faailoa atu se Taiala mo le Faatinoga o Soalaupulega i aiga, ina ia limataitaia ai i le taimi o le faagasologa o le soalaupulega. O lea taiala e tatau ona manino mai ai faatonuga e faasino i le eseese o soalaupulega e alia'e mai (mo se faataitaiga, o soalaupulega i le faamasinoga, ma soalaupulega e faia i totonu o aiga), ma ia aofia ai le umi faatapulaa e faatino ai, o ai e auai, o fea le nofoaga e faatino ai, o a faamaumauga e manaomia mai sui auai (pe afai e iai), e faapefea ona faamaumau faamatalaga o se talanoaga, e faapefea ona faailoa atu i le faamasinoga o loo gasolo lelei se soalaupulega ma poo a nisi laasaga e sosoo ai pe afai ua le ausia se fofo o se faafitauli na soalaupule. O Tulafono Faafae mo Soalaupulega 2013 a Samoa o loo tuuina mai ai ni tailala fesoasoani mo nisi mataupu o le a le aofia i totonu o lea taiala. E tatau i lea taiala ona maua e tagata i luga o upega tafailagi faapea le Resitala o le Faamasinoga o Fanua ma Suafa, pe a talsoagaina.

- iii. O aoaoga mo Resitala e tatau ona faatautaia i le aganuu a Samoa ina ia saunia mo soalaupulega. O nei aoaoga e tatau ona aofia ai mataupu e fesiligia ai poo a tulaga e tatau ona faailoa atu i itu finau ao lei faatino le soalaupulega, oa tulaga manaomia e tatau ona tau aao mai e itu finau ma poo a foi mataupu e tatau ona suesue muamua e Resitala ao lei faia se soalaupulega, mo se faataitaiga.
- iv. E tatau i Resitala ona lava saunia ma ia iai se malamalamaga atoa i le faafitauli o le a soalaupule. E tatau ona atagia lea manaoga i totonu o faiga faavae a resitala ma ia faalautele ai i aoaoga e pei ona faamatala atu i luga.
- v. Ia toe tagatagai pe faamata e talafeagai le toe iloilo o le 45 aso o loo i lalo o le Tulafono e faatautaia ai ma auai ai itu finau i se faagasologa o se soalaupulega. E tusa ai o finagalo na lagolagoina lea manatu, o loo faaeteete le Komisi e faatino i le taimi nei lea tulaga ona e faaono taofia ai itu finau mai le tuuina mai o a latou mataupu i le Faamsinoga, pe afai e faaauau pea ona faatuai e le Matai Sa'o le faatinoga o le soalaupulega seia oo lava ina le gafatia. O le taimi faatapulaa o loo iai nei e tusa ma le 6 vaiaso e faatautaia ai soalaupulega a aiga lava ia, ma ua manatu le Komisi e gafatia e lea umi ona faia se faasilasilaga faalauaitete ma faatautaia ai se soalaupulega e tasi pe lua.

Fautuaga

23. O le taiala ua tuuina atu i lalo e tatau ona faaogaina e limataitaia ai mataupu e aofia ai le soona faaogaletatau o le pule a le *Matai Sa'o*:

- i. E fai fonotaga a aiga e talanoaina ma soalaupule ai mataupu i le va oi latou lava. E tatau ona silasila toto'a ma faamautinoa o loo iai uma itu finau poo i latou e tatau ona auai i le faatinoga o le soalaupulega. E tatau ona iai ni faamaoniga sa faasalalau faalauaitete se faasilasilaga e valaau ai sui uma o le aiga, ma e iloilo foi e le Faamsinoga lea tulaga e faamautinoa ai sa faia sa taumafaiga moni e taumafai e soalaupule se faafitauli.
- ii. Afai o le a le mafai ona soalaupule se faafitauli i le taimi o le talanoaga a le aiga, e tatau loa ona vaavaai itu um ape faaono tatau ona auai se sui o le fono a nuu, e fua agai i le faafitauli o loo taumafai e soalaupule, poo se faafeagaiga pe afai ua latou silafia e faaono fesoasoani e soalaupule se faafitauli. E tatau ona ta mau faamaumauga o loo maioio atu ai talosaga e auai mai nei sui, faapea faamaumauga o minute o nei fonotaga. O lea tulaga e folasia i se taimi mulimuli ane i le Faamasinoga e faailoa ai sa faia se taumafaiga moni e soalaupule se faafitauli.
- iii. A faapea e le mafai lava e nei auala ona soalaupule se faafitauli, e tatau loa i sui finau, ona tuuina atu loa i le Faamsinoga, o se mapusaga mulimuli e faalagolago i le faatinoga o loo faia e Faamsinoga mo le soalaupulega e pei ona aiaiga o loo i totonu o le Tulafono, ina ia iai se Resitala e faatinoina lea tulaga poo se poloaiga le Faamasinoga.

24. Toe teuteu le vaega 34A o le Tulafono o Fanua ma Suafa 1981 e fua iai pe faamata sa faia se taumafaiga moni, e tatau ona Iloilo e le Faamasinoga faamaoniga o talanoaga, mo se faataitaiga o faasilasilaga faalauaitetele o talanoaga, o faamaumauga o minute o talanoaga, o faamaumauga oi latou na auai ma mataupu na talanoaina.
25. Ia faamalosia le fonu a nuu e auai i le soalaupulega o faafitgauli mo mataupu patino, aemaise lava i mataupu e faasino i le lisiina o fanua faaleaganuu. O le faaiuga e auai le fonu a nuu e tatau ona fai e le aiga, ma e le tatau ona faatulafonoina.
26. Ia fausia e le Fonu a Nuu ni taiala e limataitaia ai le faagasologa o le soalaupulega o faafitauli, mo se faataitaiga, e faapefea ma poo le a le nofoaga e faatautaia ai, o ai e auai ma e faapefea ona faasilasila atu.
27. O aiga ina ia amanaia faafeagaiga i le soalaupulega o faafitauli pe a talafeagai ma le faafitauli ma itu finau o loo aafia. E le tatau ona faatulafonoina lea vaega.
28. Ia Iloilo ma faatino alafua ua tuuina atu i lalo aua le agai i luma o le faatinoga o soalaupulega o faafitauli:
- a. Ia fausia se taiala mo aia feteenai i le va o Resitala ma itu finau. E ausia lea vaega i se taiala e limataitaiga ai aia feteenai, ia toe teuteu ma suia pepa faatumu poo Faatonuga mo le Faatinoga.
 - b. O le matagaluega e fitoitonu iai lenei galuega ina ia faailoa i aiga se Taiala mo le Soalaupulega o Faafitauli. O lea taiala e tatau ona faatulaga atu ai faamatalaga o le eseese o ituaiga faatinoga o soalaupulega, ma ia aofia ai le umi faatapulaa, o sui auai, o le nofoaga e faatino ai ma faamaoniga e manaomia.
 - c. Ia faatautaia ni aoaoga mo Resitala, e patino lava i tu ma aga faasamoa ma ia lava saunia mo le faagasologa o soalaupulega.
 - d. E tatau ona lava saunia Resitala ma ia iai se malamalamaga atoa i le faafitauli o le a soalaupule.
 - e. Ia tagatagai pe faamata e tatau ona toe Iloilo ma suia le umi e 45 aso o loo i lalo ole tulafono e faatino ai ae peitai e vaavaai foi ma le faaeteete i aiga poo itu finau o le faalautetele atu o le taimi, o le a taofia ai aiga mai le tuuina mai oa latou mataupu i le faamasinoga pe afai o loo faatuai ona faaaauu e le Matai Sa'o se talanoaina o se mataupu seia oo lava ina uma le taimi.

G. Alafua e le faatulafonoina

29. O loo amanaia e le Komisi o soo se alafua lava e le faatulafonoina e sili atu le 'aanoa mo le fo'ia o faafitauli o loo ta'ua i lenei ripoti e faatatau i le soona faaogaletatau o le pule a le Matai Sa'o. O nei alafua e le faatulafonoina e aofia ai polokalame faalauiloa, polokalame o aoaoga, ma taiala e faailoa atu i sulii, matai, Matai Sa'o ma sui uma o le aiga a latou aia ma tiute i totonu o le faasamoa.

30. O lenei vaega o loo talanoaina ai foi le matafaioi taua a le fonu a nuu i le faasamoa ma le soalaupulega o faafitauli i totonu o aiga ma nuu.

Manatu na tuuina mai

31. O manatu na tuuina mai le mamalu o le atunuu na faailoa mai o le isi auala mo le tuu itiitia o faafitauli ma popolega e faasino i le soona faaogaletatau o le pule a le Matai Sa'o o le faaoga lea o alafua e le faatulafonoina.

O le auai o le Fonu a Nu

32. Na faailoa mai i manatu na tuuina mai le taua o le fonu a nuu i le faasamoa ma le auai i soalaupulega o faafitauli i totonu o aiga ma nuu. O se tasi na saunoa mai e tatau ona amanaia le matafaioi a le fonu a nuu. O nisi o finagalo mai Savaii na faapea mai e tatau ona faamalositia ma uunai le fonu a nuu ina ia auai i le soalaupulega o faafitauli i totonu o nuu. Na faamamafa mai le faamalositia o le auai o le fonu a nuu ma ia faatagaina i latou e tuuina atu faasalaga talafeagai i le Matai Sa'o, poo le faatula'i ese ma le nuu pe afai e talafeagai pe afai ua le usitaia tulafono faatonutonu a le nuu.

33. Na faasoa mai foi e tatau ona faamalositia le fonu a nuu e vaavaai ma taitaia le faatinoga o soalaupulega mo aiga ina ia taunuu i se faaiuga autasi e malilie uma iai le aiga. O le tulaga lelei o le faatinoga o le a galulue faatasi ai aiga ma le fonu a nuu e faatumau le filemu i totonu o le nuu ma le atunuu.

34. Sa saunoa mai Malama Meleisea o le tele o faafitauli i totonu o aiga e faigofie ona soalaupule ma fo'ia i le auai o le fonu a nuu, e faaoga ai le vatapuia poo le faaaloalo i le va o se tasi ma tagata matutua, e ui lava ina faapea mai o lenei faatinoga ua leai se aoga e toe faatino ai ona sa faaoga i aso ua tuana'i ona o le taimi nei ua atagia mai le 'fai vaega' i le faiga pulega a nuu. Na atagia mai e faaono mafai lava e le vatapuia ona taitaia le fonu a nuu e soalaupule faafitauli a aiga.

35. Na fautua mai se tasi o Sa'o mai Matautu, Apia i le aoga o le iai o taiala mo le fonu a nuu e auai ai mo le soalaupuleina o faafitauli i totonu o faiga nuu. Na faamamafa mai e lea sui le taua o le fesoasoani a le fonu a nuu i aiga e soalaupule a latou faafitauli nai lo le tuuina atu e fai iai faaiuga a le faamasinoga ma na ia faaopoopo mai e tatau ona faamalositia lea tulaga i totonu o le tulafono.

36. Na faamamafa mai e Polofesa Asofou e tatau ona faalauiloa atu i le atunuu le eseese o matafaioi o le fonu a nuu e fesoasoani ai i le soalaupuleina o faafitauli i totonu o aiga. E faasino lea tulaga ona o le tele o faafitauli i totonu o aiga o loo mafai lava ona soalaupule ma fo'ia i totonu o aiga ma le nuu e aunoa ma le faatulafonoina o nei taiala e taumafai ai e faalelei se feeseeseaiga.

Aoaoga ma Polokalame Faalauiloa

37. O le toatele o le atunuu na faamatala mai le aoga ma le manaomiaga e faatino polokalame faalauiloa ma aoaoga i totonu o nuu ina ia fesoasoani e faamanatu i le Matai Sa'o ona tiute ma ona matafaioi.

38. O se tasi na faailoa mai lona finagalo i faatalanoaga e tatau ona faia nei polokalame faalauiloa i totonu o nuu ina ia faailoa ai faafitauli ma tulaga e patino i le faasamoa ma tiute ma matafaioi a le Sa'o.

39. O le finagalo o Polofesa Asofou e faasino i le alafua autu lava o aoaoga, aemaise lava i le faatumauina o le faagasologa o le faamatai. Na ia fautua mai e tatau ona faia ni polokalame tau aoaoga ina ia mafai ona aoao atu faamatalaga amata e faatatau i le Matai Sa'o ma ia faamautinoa o loo tuufaasolo atu nei faamatalaga. Na ia faaopoopo mai o le toatele o tagata Samoa i le taimi nei e lei faia ni aoaoga i tulaga faaleaganuu i totonu o aiga ma nuu, e pei ona taatele i aso ua tuana'i. O nei aoaoga o le a mafai ai e matua, matai poo le au matutua ona tuufaasolo atu lo latou malamalama i le faamatai ma le faaleaganuu e faasino i le pule ma le malosiaga o le Matai Sa'o agai i isi sui o le aiga. Na ia faamamafa mai o aoaoga ma polokalame faalauiloa o ni auala taua ina ia toe faaolaola ai nei vaega o le aganuu faasamoa.

O le auai o le Faafeagaia o se Tapuaiga

40. O manatu o nisi o tagata e faasino i le matafaioi taua a tapuaiga i le faasamoa ma e taua le amanaia o le taumafaiga a faafeagaia o ekalesia e fesoasoani e faatalanoa sui o aiga i le taimi o soalaupulega.

41. Na saunoa Malama Meleisea e tatau ona matuai faama'oti mai le taua o le matafaioi a ekalesia i le fesoasoani e soalaupule faafitauli ma le Matai Sa'o ma ia amanaia tutusa ma le auai o le fonu a nuu i le taumafaiga e soalaupule faafitauli.

Polokalame a le Malo

42. Na fesiligia mai e nisi pe faamata e iai ni polokalame a le malo e fesoasoani ai i faiga pulega lelei a le Matai Sa'o. Na fautua mai foi nisi e tatau i le Malo ona faatuina ni polokalame talafeagai ina ia faatagaina ai le auai o le fonu a nuu.

Manatu o le Komisi

43. O manatu na tuuina mai ua malifa e tatau ona iai se matafaioi a le fonu a nuu i soalaupulega o mataupu a se aiga ma le afioaga, ona o le latou auai e faamautinoa ai o faaiuga na faia i aiga o loo malilie uma iai itu. Ae peitai, o loo amanaia e le Komisi o mataupu a le aiga e faalilolilo ma e iai le popolega o le auai o le fonu a nuu i ituaiga mataupu ogaoga e le mafai ona faailoaina. E ui i lea, ua manatu le Komisi e tatau ona iai se mafuaaga o le auai o le fonu a nuu pe afai ua le usitaia e le Matai Sa'o tulafono faatonutonu a nuu poo mataupu e pei o le lisiina o fanua o le aiga i le au fai pisinisi mai fafo. I le faaitaiga mo le lisiina, o le a toatele tagata o le nuu o le a aafia i le siitia o faatinoga a tagata tafafao maimoa mai fafo, o le maualuga o leo i totonu o le nuu. O lea tulaga e faaono auai ai loa le fonu a nuu i mataupu a se aiga.
44. O manatu na tuuina mai na faamamafa mai ai e tatau ona faatuina ma faatinoina polokalame faalauiloa ma aoaoga e faasino i tiute ma matafaioi a le Matai Sa'o. O nei aoaoga e tatau ona faalautele ma faamanino mai ai agatausili ma itu taua o faiga pulega lelei ma le manino o faaiuga fai. E tatau foi ona aafia ai ma agavaa mo le tofia, mafuaaga o le aveesea, o itu manaomia mo soalaupulega ma soo se suiga i le tulafono ua atagia i lenei Ripoti.
45. Na faaopoopo mai foi e aoga foi aoaoga i itu e lape ai poo ni aafiaga matuia o faafitauli i totonu o aiga ma le tele o le aafiaga e afua mai i nei faafitauli lea e i'u ai ina oo atu i le faamasinoga. O lea ua manatu ai le Komisi e tatau ona iloilo le aoga o le faatino o aoaoga ma polokalame faalauiloa ina ia faaolaola ai tu ma aganuu faasamoa.
46. E tusa ai o faatalanoaga, na faamauina e le Komisi e eseese faatinoga i totonu o aiga eseese. Ua tuuina atu i lalo se taiala lautele e faaono fesoasoani i aiga pe afai o le a auai i faatalanoaga taua:
- a. Tatau ona lava se taimi e faatino ai faatalanoaga.
 - b. E tatau ona iai se taumafaiga moni a sui e taumafai e auai i nei talanoaga.
 - c. E tatau ona faamautinoa e le Matai Sa'o poo se tagata na logoina le talanoaga ia faalauiloa i le aiga i mataupu o le a talanoaina ae le'i oo i le taimi e faatino ai.
 - d. E tatau ona lava se taimi e faatino ai faagasologa o talanoaga talafeagai, e fua agai i mataupu o le a talanoaina. O talanoaga talafeagai e faasino i le silia ma le tasi le talanoaga e manaomia.
 - e. E tatau i le matai Sa'o ona amanaia uma finagalo ua faaalua ae lei faia se faaiuga mulimuli.
 - f. O le auga o talanoaga o le faia lea o se taumafaiga moni e taumafai e ausia se maliega i le mafai e oo iai, ona o talanoaga uma e ausia se maliega autasi.

Fautuaga:

29. E tatau i le Matagaluega e fitoitonu iai lea tulaga ina ia faatuina aoaoga ma polokalame faalauiloa e faasino i matafaioi ma tiute a le Matai Sa’o. O nei polokalame e tatau ona atagia mai ai le taua o faiga pulega lelei ma le manino o faiga faaiuga faapea le ogaoga o aafiaga pe afai e faaiu atu se mataupu e soalaupule i le faamasinoga. E tatau ona aofia ai agavaa mo le tofia, mafuaaga mo le aveesea, tulaga manaomia mo soalaupulega ma soo se ituaiga suiga i le tulafono ua tuuina atu i lenei Ripoti.
30. E tusa lava pe faatino ma faamaonia fautuaga o le faatulafonoina o tiute mo le faatinoga o talanoaga ma faalauiloa faasilasilaga, ua manatu le Komisi o le taiala lautele ua tuuina atu i lalo e faaono fesoasoani i aiga ia auai i talanoaga taua:
- a. Tatau ona lava se taimi e faatino ai faatalanoaga.
 - b. E tatau ona iai se taumafaiga moni a sui e taumafai e auai i nei talanoaga.
 - c. E tatau ona faamautinoa e le Matai Sa’o poo se tagata na logoina le talanoaga ia faalauiloa i le aiga mataupu o le a talanoaina ae le’i oo i le taimi e faatino ai.
 - d. E tatau ona lava se taimi e faatino ai faagasologa o talanoaga talafeagai, e fua agai i mataupu o le a talanoaina. O talanoaga talafeagai e faasino i le silia ma le tasi le talanoaga e manaomia.
 - e. E tatau i le matai Sa’o ona amanaia uma finagalo ua faaalua ae lei faia se faaiuga mulimuli.
 - f. O le auga o talanoaga o le faia lea o se taumafaiga moni e taumafai e ausia se maliega i le mafai e oo iai, ona o talanoaga uma e ausia se maliega autasi.

5. LISI O FAUTUAGA

Agavaa mo le filifilia o le Matai Sa'o

1. Ina ia o gatasi ma le tele o finagalo o le atunuu sa faatalanoa lea e mafuli i le filiina o Matai Sa'o i totonu o aiga i Samoa, o agavaa moomia nei e tatau ona faatauaina e aiga o le filiina ma le tofia o Matai Sa'o mo le manuia o aiga. O lea e faatoa agavaa le tagata i le tofiga pe afai e na te ausia agavaa nei:

- i. O le *suli*;
- ii. Lava le silafia i tiute ma matafaioi tauave a le *Sa'o* ;
- iii. Lava le silafia i measina a le aiga, gafa o le aiga ma le talaaga ma ia iai le agavaa e tausi ai le filemu ma le fealofani i totonu o le aiga;
- iv. Sa faatino le tautua lelei i le aiga ma le nuu; ma
- v. Nisi agavaa e patino i le aiga e tusa ai o ana tu ma agaifanua.

2. O nei aiaiga e mafai ona:

- i. Faataoto mai i le tulafono (e faailoa ai le taua o nei agavaa ma faamanino ai agavaa moomia mo aiga e matua iloilo lelei iai pe a filifili poo ai e tatau ona tofia i le Matai Sa'o); poo
- ii. Le le faatulafonoina ae mo matagaluega a le Malo (faataitaiga o le Matagaluega o Faamasinoga ma le Matagaluega o Tina ma Tamaitai) e tuuina atu le lagolago e ala i polokalame faalauiloa i aiga ma nuu, e faalauiloa ai le faatau o nei agavaa pe a filifili ma tofia Matai Sa'o ina ia faaitiitia ai le tulai mai o tofiga e le talafeagai ma tuuitiitia ai foi feeseeseaiga a aiga e tuuina atu i le Faamasinoga o Fanua ma Suafa i le va o Matai Sa'o ma *suli*.

3. Pe faatulafono pe le faatulafonoina foi ia agavaa moomia, e le faapea o le a pau ai lea o agavaa ae e iloilo lava e aiga pe iai nisi agavaa faaopopo pe a filifili ma tofia a latou Matai Sa'o, aemaise o le tulaga e talafeuga ma a latou tu ma agaifanua.

4. E tatau foi ona faatau le aiaiga o le mea e nofo ai lea e tatau ai i le ole a avea ma Matai Sa'o ona alala i Samoa mo se taimi umi, o se tasi o aiaiga e tatau ona agavaa ai le tagata mo le tofiga (tai pei o le aiaiga e agavaa ai le sui tauva mo le faigapalota). E aiaia ai le o le a avea ma Matai Sa'o e alala i Samoa mo le umi e le i lalo ifo o le 1 le tausaga ma e faaiuina le i le aso o le tofiga, ma e ausia lea vaega pe a nofo le tagata i totonu o Samoa ia le i lalo ifo o le tasi vae tolu o le tausaga (poo le 120 aso). Afai ae faaoga lea aiaiga o le mea e nofo ai, e fautuaina le tatau ona tuu i totonu o le tulafono.

5. Afai ae faatulafono lea aiaiga o le mea e nofo ai, e tatau ona faatoa faaaoga ini tofiga o Matai Sa’o i le lumanai.
6. Afai ae faatulafono le aiaiga o le mea e nofo ai, e tatau ona faatau le ausia o lea aiaiga, ae mafai lava ona filifili aiga ise aiaiga e umi atu pe a finagalo e talafegai.
7. E tatau ona teuteu le Tulafono o Fanua ma Suafa 1981 (vaega 14):
 - a. Faamalosia faaetulafono le tatau ona ave o le faaaliga o finagalo i le Resitala mo le tofia o se matai (poo le Matai Sa’o); ma
 - b. O le tagata e nafa ma le tuuina atu o lea faaaliga o le matai (poo le Matai Sa’o) lea o le a tofia.
8. Teuteu le (vaega 15) o le Tulafono o Fanua ma Suafa 1981 e aiaia ai le faasalalau i nusipepa, leitia ma isi uma nofoaga e iloa gofie i Apia ma Samoa faaaliga o finagalo e tofi ai se matai. O tau o ia faasalalauga o le a totogi e le o le a tofia i le suafa matai (poo le Matai Sa’o).
9. E tatau ona aofia i le Vaega 4 le auese, lea e mafai ai e le Resitala ona aveese le aiaiga o le 3 masina o le faasalalauga pe afai ae faamalieina sa talo le aiga ma faia se soalaupulega e faaoga ai auala o faasalalauga e pei ona aiaia i le vaega 15.
10. Afai ae faatulafono le fautuaga 1 poo le 3, e tatau ona tuu iai ma se aiaiga faaopoopo i lalo o le Vaea 4 o le Tulafono, o le tagata o le a tofia e avea ma Matai Sa’o e tatau ona tuuina atu i le Resitala le faamaoniga e nate ausia uma agavaa moomia mo le tofiga e pei ona faataoto mai i le Tulafono. E tatau ona iai se pepa mo lea faamoemoe. E tatau ona taulimina e le Resitala lea Pepa ao lei resitalaina le suafa i lalo o le Tulafono.

Mataifaioi a le Sa’o

11. O tiute ma mataifaioi a le Matai Sa’o e tatau ona faataoto mai i le tulafono. O nei tiute ma mataifaioi e le tatau ona tamau, ma e tatau ona aofia ai:
 - Tiute e logo ma faatalanoa mataupu i le faaeeina o suafa matai;
 - Tiute e logo ma faatalanoa mataupu i lisi o eleele e aia tutusa iai le aiga (ma mataupu tau pisinisi);
 - Tiute o le Tausimea e vaaia lelei meatotino a le aiga;
 - Tiute ia nofo i Samoa;
 - Tiute e faatumau le toafilemu ma ia mautinoa le soifua manuia o le aiga;
 - Tiute e fai sao i mea fai a le aiga ma faatino le tautua i le nuu; ma le
 - Tiute e fai faaiuga talafeagai, sa’o ma tusa ai ma le tulafono, tu ma aganuu mamalu a Samoa.

12. Talu ai e iai faafaituali i le faatinoina o le faavasegaina o le tiute ia faatumau le toafilemu ma le manuia o le aiga, afai ae aofia i le tulafono, e tatau ona lautele lona faauigaina.
13. I le tulaga o le tiute ia nofo i totonu o Smoa, e tatau ona manino mai i le tulafono o le aiaiga mo le Matai Sa'o ia nofo I Samoa, o lona uiga e tatau ona nofo i totonu o Samoa mo le umi e le i lalo ifo o le 120 aso o le tausaga ao ia tauaveina le Matai Sa'o.
14. E tatau foi ona faatonu mai i le tulafono, a'o lei faia le talanoaga e faatatau i suafa matai poo eleele, e tatau ona tuuina atu se faasilasilaga i totonu o le masina e 1 ao lei oo i le aso tuupoina ma e tatau foi ona aofia ai le taimi, nofoaga ma mataupu o le a talanoa i le feiloaiga. O lea faasilasilaga e tatau ona faataamilo e ala i nusipepa, leitio ma isi nofoaga iloga i Apia ma Samoa.

Aveesea o le Matai Sa'o ma le Matai

15. O le pule poo le malosiaga mo le aveesea o se matai poo se Matai Sa'o e tatau ona faatinoina e le aiga, ma e tatau ona soalaupule ni feeseese'aiga i tua ao lei tuuina atu i le faamasinoga.
16. E tatau i le tulafono ona iai se aiaiga fou poo le faaopoopo atu i le aiaiga o loo iai nei (vaega 20B o le Tulafono) ina ia aofia ai aiaiga mo le aveesea o le *Matai Sa'o*.
17. E tatau ona iai i le tulafono e faaono mafai ona tuuina atu se poloaiga a le Faamasinoga mo le aveesea o se suafa Matai Sa'o ona o mafuaaga ua ta'ua i lalo, e fua agai i le talosaga na tuuina atu:
 - Leai se faatinoga lelei o tiute ma matafaioi a le Matai Sa'o e tusa ai o le tulafono;
 - Faia o se faatinoga e faatoilalo ai le aiga;
 - Ua le mafai ona faaaau le faatinoina o tiute ona ua le atoatoa le malosi o le mafaufau e tusa ai o se faamaoniga mai se fomai sutesue faapitoa;
 - O le tuuina atu ma le iloa o faamatalaga sese i le Resitala e tusa ai o agavaa ma mafuaaga ua ausia mo se resitalaga o se suafa Matai Sa'o (pe afai o loo faatulaga atu i le tulafono agavaa e mafai ai ona faapaleina);
 - Moliaga i se soligatulafono. E tatau i le tulafono ona auiliili pe faamanino poo a ituaiga 'soligatulafono' e aofia ai ma e le talafeagai ona aofia ai soligatulafono laiti e pei o soligatulafono tau taavale.
18. E tatau i le Faamasinoga ona vaavaai i tulaga ua ta'ua i lalo i le taimi e faatino ai se sutesuega mo le aveesea o se *Matai Sa'o*:
 - le mafuaaga tonu ua le usitaia ai le faatinoga o tiute (ma pe faamata o le le faatinoina o tiute o se tulaga e faa-tasi ona tupu poo se mafuaaga ua masani a'i);
 - o le ogaoga o le faatinoga ua atagia;
 - pe faamata o nei faatinoga e aofia ai ma se soligatulafono;

- o le tele o le aafiaga poo se faafitauli mai lea faatinoga le talafeagai;
- pe faamata na faia se faatinoga a le Matai Sa’o ina ia soalaupule ma sui o le aiga ua aafia;
- o le talaaga o le olaga tautua i le aiga i le taimi muamua; poo
- soo se isi lava mataupu ua silafia e le Faamasinoga ua talafeagai.

19. E tatau ona aofia i le tulafono e faaono mafai ona aveesea e le Resitala se Matai Sa’o mai le resitala pe afai o ia lea ua molia i se soligatulafono ogaoga, ma ua faasalaina mo le olaga atoa i le falepuipui, lea e aofia ai le fasioti tagata, fasioti tagata pa’i valea, fai aiga fai faamalosi ma isi. O isi soligatulafono tau faiga aiga ogaoga e pei o le mataifale e tatau ona faatulaga atu o se soligatulafono ogaoga. O le tulafono e tatau ona auiliili manino atu ai poo a soligatulafono e aofia i ‘soligatulafono ogaoga’. O lea tulaga e manaomia ai le toe teuteu o le vaega 22(3) ina ia mafai ona aveesea mai e le Resitala se suafa Matai Sa’o mai le resitala pe afai ua faamaonia e le Resitala o ia lea ua molia i se ‘soligatulafono ogaoga’.

20. E tatau i le tulafono ona atagia mai ai suiga ua ta’ua i luga, pe afai ua talafeagai, i le aiaiga o loo iai nei i le tulafono (vaega 20B o le Tulafono) mo le aveesea o se matai (toe teuteu pe a talafeagai).

Toatele o Sa’o ma matai

21. E tatau i le Malo ona tagatagai i le Vaega 1 ma le Vaega 2, ma ia faamauina nisi o mafuaaga faaopopo i lalo o nei vaega taitasi.

VAEGA 1: E faaauau pea le iai o Matai Sa’o e toatele

21.10 le fautuaga a le Komisi e mafuli i le Vaega 1 lenei. Ma e tatau ona tagatagai i mafuaaga faaopopo mo lenei vaega:

- A. Pe faamata e faatumauiina pea le tulaga o loo iai mo aiga ina ia filifilia ai le numera o a latou Sa’o e tusa ai o la latou manaoga; poo
- B. Le faatapulaa se numera maualuga mo le filifilia o Matai Sa’o (mo se faataitaiga e to’a 5) e pei ona fautua mai le Komisi Suesue.

21.2E tatau ona tagatagai pe faapefea ma e poo ai foi e tatau ona faia faaiuga e faasino i fanua (e pei o le lisiina o fanua) ma le faaeeina atu o suafa matai pe afai e sili atu ma le toatasi se Matai Sa’o i totonu o se aiga. O nei vaega o le:

- A. Faaiuga e fai i le maliega autasi a Matai Sa’ouma.
 - a. E tatau ona tagatagai pe faamata o le uiga o le autasi o le:
 - i. Faaiuga e fai ona o le maliega autasi a Matai Sa’o uma o loo ‘aumau i Samoa ma atunuu mamao’; poo

- ii. Faaiuga e fai i luga o le maliega autasi a *Matai Sa'o* 'o loo aumau i Samoa nei'.
- b. Afai o le a le ausia se maliega autasi, ua fautua atu le Komisi e tatau I le Faamasinoga ona tagatagai I tulaga nei:
- i. *Matai Matai Sa'oo* loo aumau i Samoa, pe afai o le Matai Sa'o o loo aumau i atunuu i fafo o loo tete'e i se faaiuga; poo
 - ii. *Matai Sa'oua* au tausaga o umia se suafa matai (aofaiga o tausaga sa umia ai); poo
 - iii. Mafuaaga uma e lua

Faamauina: o le eseese i le va o Matai Sa'o o loo aumau i Samoa ma atunuu i fafo e faaono le talafeagai pe afai o le Fautuaga 2 a le Komisi o le a faatinoina mo le Matai Sa'o e tatau ona aumau i Samoa.

B. Faaiuga e fua agai i le toatele o *Matai Sa'o* ua autasi

Afai o le a tutusa le numera, e tatau i le Faamasinoga ona tagatagai i ai latou ua autausaga o umia se suafa matai (e tusa lava pe afai e sili atu ma le toatasi) poo le poloai atu foi e le Faamsinoga (pe afai o nei Matai e toa lua o loo feteenai o la manatu ma oi laua foi nei o loo tutusa le umi na umia ai se suafa).

Faamauina : E tatau ona faamalosia *Matai Sa'o* uma ona ave le faaaloalo i manatu o le Sa'o ua au tausaga ona umia se suafa matai (e le tatau ona faatulafonoina lea tulaga).

C. Faaiuga e fai e le Matai Sa'o ulumatua

- i. O le faaiuga mulimuli e faasino i fanua ma suafa o le aiga e faia e le Matai Sa'o ulumatua ma o nei faaiuga e tusa ai ma isi Matai Sa'o uma i totonu o le aiga.
- ii. E tatau ona filifilia le Matai Sa'o ulumatua e fua agai i mafuaaga nei:
 - a. E filifilia e le aiga mai Matai Sa'o uma i totonu o le aiga poo ai e tatau ona ave ma Matai Sa'o ulumatua; poo
 - b. Le filifilia mai e Matai Sa'o uma o le aiga poo ai oi latou e tatau ona ave ma Matai Sa'o ulumatua (e atagia mai ai le ave o le faaaloalo e pei ona iai faatinoga i le taimi nei) poo

- c. O le Matai Sa’o ua loa le soifua ma e umi se taimi na umia ai se suafa matai ma ua loa foi lana tautua i le aiga. Ae peitai, afai e iai ma se isi Matai Sa’o e tutusa le umi na tautua ai, e tatau i nei Matai Sa’o ona filifili mai lava ei latua poo ai le Matai Sa’o ulumatua.

VAEGA 2 :Faatapulaa e nao le tasi le Matai Sa’o

Afai o le a faamaonia e le Malo lenei vaega, e tatau ona tagatagai poo le a le tulaga e tatau ona faatino i le toatele o matai sa’o o loo iai nei i totonu o le tele o aiga.

- A’o lei filifilia ma faamaonia se Vaega e tatau ona faatino, ua fautua atu le Komisi e tatau i le Malo ona faatagaina se taimi mo nei fautuaga ina ia faatino ma tino mai, ona o isi fautuaga e faaono faaitiitia ai faafitauli mo le soona faaaoga le tatau o le pule a le Matai Sa’o ma o lena faaiuga e faaono le talafeagai mo sea faafitauli i lea taimi.

Fofo o Feeseeseaiga

- O le taiala ua tuuina atu i lalo e tatau ona faaaogaina e limataitaia ai mataupu e aofia ai le soona faaogaletatau o le pule a le *Matai Sa’o*:
 - i. E fai fonotaga a aiga e talanoaina ma soalaupule ai mataupu i le va oi latou lava. E tatau ona silasila toto’a ma faamautinoa o loo iai uma itu finau poo i latou e tatau ona auai i le faatinoga o le soalaupulega. E tatau ona iai ni faamaoniga sa faasalalau faalauaitete se faasilasilaga e valaau ai sui uma o le aiga, ma e Iloilo foi e le Faamsinoga lea tulaga e faamautinoa ai sa faia sa taumafaiga moni e taumafai e soalaupule se faafitauli.
 - ii. Afai o le a le mafai ona soalaupule se faafitauli i le taimi o le talanoaga a le aiga, e tatau loa ona vaavaai itu um ape faaono tatau ona auai se sui o le fono a nuu, e fua agai i le faafitauli o loo taumafai e soalaupule, poo se faafeagaiga pe afai ua latou silafia e faaono fesoasoani e soalaupule se faafitauli. E tatau ona ta mau faamaumauga o loo maioio atu ai talosaga e auai mai nei sui, faapea faamaumauga o minute o nei fonotaga. O lea tulaga e folasia i se taimi mulimuli ane i le Faamasinoga e faailoa ai sa faia se taumafaiga moni e soalaupule se faafitauli.
 - iii. A faapea e le mafai lava e nei auala ona soalaupule se faafitauli, e tatau loa i sui finau, ona tuuina atu loa i le Faamsinoga, o se mapusaga mulimuli e faalagolago i le faatinoga o loo faia e Faamsinoga mo le soalaupulega e pei ona aiaiga o loo i totonu o le Tulafono, ina ia iai se Resitala e faatinoina lea tulaga poo se poloaiga le Faamasinoga.
- Toe teuteu le vaega 34A o le Tulafono o Fanua ma Suafa 1981 e fua iai pe faamata sa faia se taumafaiga moni, e tatau ona Iloilo e le Faamasinoga faamaoniga o talanoaga, mo se faataitaiga o faasilasilaga faalauaitete o

talanoaga, o faamaumauga o minute o talanoaga, o faamaumauga oi latou na auai ma mataupu na talanoaina.

- Ia faamalosia le fono a nuu e auai i le soalaupulega o faafitgauli mo mataupu patino, aemaise lava i mataupu e faasino i le lisiina o fanua faaleaganuu. O le faaiuga e auai le fono a nuu e tatau ona fai e le aiga, ma e le tatau ona faatulafonoina.
- Ia fausia e le Fono a Nuu ni taiala e limataitaia ai le faagasologa o le soalaupulega o faafitauli, mo se faataitaiga, e faapefea ma poo le a le nofoaga e faatautaia ai, o ai e auai ma e faapefea ona faasilasila atu.
- O aiga ina ia amanaia faafeagaiga i le soalaupulega o faafitauli pe a talafeagai ma le faafitauli ma itu finau o loo aafia. E le tatau ona faatulafonoina lea vaega.
- Ia lloilo ma faatino alafua ua tuuina atu i lalo aua le agai i luma o le faatinoga o soalaupulega o faafitauli:
 - i. Ia fausia se taiala mo aia feteenai i le va o Resitala ma itu finau. E ausia lea vaega i se taiala e limataitaiga ai aia feteenai, ia toe teuteu ma suia pepa faatumu poo Faatonuga mo le Faatinoga.
 - ii. O le matagaluega e fitoitonu iai lenei galuega ina ia faailoa i aiga se Taiala mo le Soalaupulega o Faafitauli. O lea taiala e tatau ona faatulaga atu ai faamatalaga o le eseese o ituaiga faatinoga o soalaupulega, ma ia aofia ai le umi faatapulaa, o sui auai, o le nofoaga e faatino ai ma faamaoniga e manaomia.
 - iii. Ia faatautaia ni aoaoga mo Resitala, e patino lava i tu ma aga faasamoa ma ia lava saunia mo le faagasologa o soalaupulega.
 - iv. E tatau ona lava saunia Resitala ma ia iai se malamalamaga atoa i le faafitauli o le a soalaupule.
 - v. Ia tagatagai pe faamata e tatau ona toe lloilo ma suia le umi e 45 aso o loo i lalo ole tulafono e faatino ai ae peitai e vaavaai foi ma le faaeteete i aiga poo itu finau o le faalautele atu o le taimi, o le a taofia ai aiga mai le tuuina mai oa latou mataupu i le faamasinoga pe afai o loo faatuai ona faaauau e le Matai Sa’o se talanoaina o se mataupu seia oo lava ina uma le taimi.

Alafua e le faatulafonoina

- E tatau i le Matagaluega e fitoitonu iai lea tulaga ina ia faatuina aoaoga ma polokalame faalauiloa e faasino i matafaioi ma tiute a le Matai Sa’o. O nei polokalame e tatau ona atagia mai ai le taua o faiga pulega lelei ma le manino o faiga faaiuga faapea le ogaoga o aafiaga pe afai e faaiu atu se mataupu e soalaupule i le faamasinoga. E tatau ona aofia ai agavaa mo le tofia, mafuaaga

mo le aveesea, tulaga manaomia mo soalaupulega ma soo se ituaiga suiga i le tulafono ua tuuina atu i lenei Ripoti.

- E tusa lava pe faatino ma faamaonia fautuaga o le faatulafonoina o tiute mo le faatinoga o talanoaga ma faalauiloa faasilasilaga, ua manatu le Komisi o le taiala lautele ua tuuina atu i lalo e faaono fesoasoani i aiga ia auai i talanoaga taua:
 - i. Tatau ona lava se taimi e faatino ai faatalanoaga.
 - ii. E tatau ona iai se taumafaiga moni a sui e taumafai e auai i nei talanoaga.
 - iii. E tatau ona faamautinoa e le Matai Sa’o poo se tagata na logoina le talanoaga ia faalauiloa i le aiga i mataupu o le a talanoaina ae le’i oo i le taimi e faatino ai.
 - iv. E tatau ona lava se taimi e faatino ai faagasologa o talanoaga talafeagai, e fua agai i mataupu o le a talanoaina. O talanoaga talafeagai e faasino i le silia ma le tasi le talanoaga e manaomia.
 - v. E tatau i le matai Sa’o ona amanaia uma finagalo ua faaalua ae lei faia se faaiuga mulimuli.
 - vi. O le auga o talanoaga o le faia lea o se taumafaiga moni e taumafai e ausia se maliega i le mafai e oo iai, ona o talanoaga uma e ausia se maliega autasi.